

صوت الأهالي

الجزء الثاني: أبريل – مايو - يونيو 2022



الجزء الأول: رابط ملف صوت الأهالي يناير – فبراير - مارس 2022 <https://rb.gy/9pZR5w>

لا يكتمل توثيق "ما حدث" و"يحدث" إلا بأصوات كافة أطرافه.. الكلمات التالية أصوات مواطنين ومواطنات ليس لهم مكان على شاشات الإعلام ولا صفحات الجرائد.. لم يتبق لهم سوى صفحاتهم على وسائل التواصل الاجتماعي.. يقصون فيها حكاياتهم، ومعاناتهم، يناشدون السلطات، يناجون ربهم ويتوجهون له بالدعاء بالفرج. يستمرون في الكتابة باعتبارها آخر مخرج ومنفذ لما يحملون في قلوبهم من أحزان وشعور بالفقد، زوجات وبناء وبنات، أخوة وأخوات، آباء وأمهات يتحدثون عن أحبائهم المفقودين أو المعتقلين أو عن ظروف السجن الذي حرمهم لم الشمل، في غياب قانون أو منطق يفسر الغياب وتجديد الغياب واستمراره بدون سقف.. يقرأون عن العفو فيصمتون وينتظرون، تخفق قلوبهم بالأمل مع كل وعد جديد لعل وعسى أن يشمل أسماء أحبائهم. لا يتوقفون عن المطالبة، عن المناشدة، عن الاستغاثة، عن الدعاء.. أصوات الأهالي.. أصوات لا يكتمل توثيق المرحلة بدونها.

1 أبريل

عن آل ثابت (صفوان وسيف ثابت)

ماما..
في أول ليلة رمضان..
روحي أشتكيهم عند ربنا يا أمي ..
اللي أمر..
واللي قهر..
واللي حبس..
واللي أيد الظلم..
واللي نفذ الأوامر..
واللي صدق الكلام..
وقبله اللي قال الكلام..



وما تنسيش اللي كلبش الايدين..
وسلميلي على الحبايب اللي عندك هناك ..

<https://bit.ly/3Dxyu5v>

عن أمين الصيرفي

كل سنة وانت طيب يا حبيبي ❤️
رمضان #العاشر بيعدني علينا من غيرك
مفتقدينك ومفتقدين كل طقوس الشهر الكريم معاك، ولكن عندنا
يقين بأن الله سيجعل لك وإخوانك مخرجًا من حيث لا نحتسب،
ويجمعنا بك عاجلاً غير آجل.

#سجن_العقرب

#حبس_انفرادي

#كل_عام_وانتم_بخير_ياساكني_الزنازين

<https://bit.ly/3JYqEUN>



عن هدى عبد المنعم



بكرة رمضان كل سنة وانت طيبة يا ماما
انا اسفة اني مش عارفة ابوس ايدك واحضنك
واقولك كدة في وشك

<https://bit.ly/3K6HWzd>

2 ابريل

عن ياسر الجارحي

#رجاء تدعوا لياسر أخويا وكل مظلوم وقت إفطاركم وفي صلواتكم يخرجوا بالسلامة لأهاليهم

<https://bit.ly/3x6JR3a>

عن زياد العليمي



عرفت دلوقت ان زياد دخل الاضراب عن الطعام تضامنا مع
زملائه وتم نقله من السجن من يوم الاربعاء ومش عارفة في
اي سجن. دعواتكم اعرف ابني فين وربنا يحفظه وينجيه.
زياد مريض سكر وقرحة وضغط، وحياته في خطر. دعواتكم

<https://bit.ly/3LHhiNL>

عن خالد سحلوب

رمضان وراه رمضان وأنا حقيقي مش فاكـر ده رمضان رقم كان من غير خالد
من غير خالد !! رمضان وخالد في مكان مش عارفين عنه
حاجة فيه، ولا عارفين نسمع صوته ولا صورته، شكله
دلوقتي عامل ازاي!!
-شقيق المعتقل خالد سحلوب
#الحرية_لخالد_سحلوب
<https://bit.ly/36OQ8FG>



عن أحمد سمير سنطاوي

والد أحمد سمير تمكن من زيارته النهدة أخيرا علشان نتيقن
من خبر إضرابه عن الطعام. أحمد سمير قرر يدخل في إضراب
عن الطعام من يوم الاثنين اللي فات تضامنا مع إضراب أحمد
دومة، وبيقولنا: "مش هعرف أشوف حد بيتئذي قدامي
وماتحركش."

دومة من ساعة نقله لسجن المزرعة في راس السنة بيتعامل
معاملة غير آدمية وبيتعرض لاعتداءات متكررة. وفيه ثلاث
سجنا رأي آخريـن قررـوا يدخلـوا في إضراب عن الطعام
معاهم.

الوضع في سجن المزرعة سيء للغاية بداية من الزنازين
الضيقة جدا واللي بيبقى فيها حمام (فتحة في الأرض) مفتوح وتعنيت في دخول مستلزمات أساسية
كثير، ومضايقات غير مبررة كان سبب واحد منها ان أحمد يفوته امتحان من امتحانات الترم الأول
حقوق في يناير ده بعد ما الكتب أخيرا اتسمحت تدخله بعد ما الامتحانات ما بدأت. الجوابات من
الأصدقاء ممنوعة وجواباتنا لبعض بعد ما كانت أسبوعية بقيت مابتدخلش غير كل شهر مرة. دي
حاجات رغم انها تعدي مباشر على حقوقنا كنا بنحاول فيها بهداوة، بس رؤية أحمد سمير لزمائله في
السجن بيتم الاعتداء الجسدي والنفسي المتكرر عليهم خلاه مايقدرش يرضى بالظلم ده ويدخل
معاهم في إضراب تضامني.

احنا مرة تانية بنحمل رئيس الجمهورية ووزير الداخلية والنائب العام مسؤولية حياته وصحته البدنية
والنفسية وبنطالب بسرعة التدخل والاستماع لمطالبنا ولمطالبات المضربين عن الطعام لحل الأزمة
قبل أن تتفاقم.

<https://bit.ly/3DOFznb>



عن زياد العليمي

رحت عشان اسأل في مصلحة السجن عن السجن اللي زياد اتنقل له، كلمني مالك عدلي وقال لي ان المصلحة بتقفل من الساعة واحدة ورجعت قبل ما اوصل! وحاروح بكره اعرف مكانه!!
اما هو مضرب عن الطعام، ونقلتوه من السجن من يوم الأربع، طب مش تبلغوا اهله عشان يعرفوا يزوروه فين؟ لولا ان فيه اهالي زاروا اولادهم النهارده وعرفوا، ما كناش حنعرف!! ايه الإجرام ده؟ ربنا يحرق قلوب كل من يبعد حد عن ضناه او ابن عن أهله او بريء عن أحبابه، ويحرق قلوب كل من يبرر او يطبل ويحرق قلوب الشمتانين. ويدوقوا جميعا زي ما دوقنا
#الحرية_لزياد_العليمي
#جوعى_للحرية

<https://bit.ly/35Acs5x>

عن محمد عادل

أول أذان فجر ف رمضان، وأول دقائق صيام، اللهم لا تعجل
هذا الشهر ينقضي إلا وقد فككت كربي ورددت لي زوجي، يا
رب


<https://bit.ly/3LE5N9C>



عن جعفر الزعفراني

8 سنين يبجي رمضان واعياد ومناسبات الناس تتجمع وتفرح
وانا لوحدي من غيرك وانت هناك وحيد يا طيب.
- زوجة المعتقل جعفر الزعفراني

<https://bit.ly/35Clb7g>



عن عبد المنعم أبو الفتوح

يا أقدر أهل الأرض ياللي قررت تتعامل مع أبويا بالعنف
وتدخله الزنزانة بالدفع لحد لما جاله أزمة قلبيه وكان هيموت
فيها ، كل ده علشان بيطلب حقه في زيارة طبيعية يشوف
ويلمس فيها ولاده وأحفاده ، للسنة الرابعة الزيارة تكون
بالشكل ده وهو صابر ولما قرر يمتنع عن الزيارة حرمتوه من
التواصل حتي من خلال كم سطر كان بيكتبهم يطمنا عن
أخباره ، ولما قرر انه عايز يثبت حقه ويعمل محضر
استخدمتم العنف معاه ، أبويا قرر يرجع تاني الزيارة علشان
يقولنا ان بيتم التعدي عليه وعلى حقوقه من ضباط وزارة
الداخلية داخل السجن وبمعرفة واشراف ضباط الامن الوطني
الي مصممين يتجاهلوا كل محاولات طلبنا بحقنا في زيارة



طبيعية

<https://bit.ly/3LAvS9E>

عن عبد الرحمن طارق موكا (أخلى سبيله)

موكا كدة بيتم 48 يوم مضرب عن الطعام
لا تنسوه من دعائكم
#موكا_في_خطر

<https://bit.ly/3K6Dbpk>



عن عمر محمد علي

رمضان التامن لعمر في السجن بعد ما اتقبض عليه غلطة
واتوعد إنه يخرج بعد أيام واتحولت الأيام لحكم بالمؤبد قضي
منه ٧ سنين رغم ورق قضية بينفي ثبوت أي تهمة عليه
أملنا في معجزة من رب رحيم ترجعه لحضننا تاني وحد عاقل
يوقف نزييف عمره اللي بيضيع في السجن.
السنة دي رمضان بيهل وعمر صحياً ونفسياً تعبان ويبنزف
ومحتاج عملية جراحية .

<https://bit.ly/3uSrpIM>



عن أحمد حسن (مختفي قسرياً)

كل حاجة ناقصة وانت مش هنا الله يهون علي قلوبنا وعقولنا
ويبرزقنا الصبر علي مصيبتنا وغيابك يا احمد
الله يرد كل غايب لاهلة وناسه
كل سنة وانت طيب يا حبيبي

<https://bit.ly/3DA2LAW>



عن عبد المنعم أبو الفتوح

أبويا النهاردة بلغني انه تم الاعتداء عليه يوم الاربعاء ٢٣ مارس عصرًا بعد انتهاء فترة التريض، بدفعه
بعنف وإدخاله الى الزنزانة بالقوة عبر العميد أحمد الوكيل مفتش مباحث منطقة سجون طره وضابط
اخر اسمه أشرف شلبي "بأنفسهم" وبقوة من العساكر، والاعتداء ده تسبب له في نوبة قلبية حادة
استمرت ٦ ساعات تقريبا تناول خلالها جرعتين من موسع الشرايين. مأمور سجن المزرعة العقيد
أسامة الرويني لم يسمح له بعمل محضر كما لم يسمح له بعمل محضر اثبات امتناعه عن الزيارة، بعد
عدم استجابة إدارة السجن لطلب ابويا بعودة الزيارة الطبيعية .

بعد الزيارة رجعت لسجن المزرعة علشان أعرف ليه متسمحش لابويا بعمل محضر اثبات امتناعه عن
الخروج للزيارة او محضر واقعة الاعتداء عليه، وطلبت أقابل مأمور سجن المزرعة العقيد أسامة
الرويني وقابلته فعلا قدام باب السجن وسألت سيادته ليه لم يتم عمل محضر رد عليا "مينفesch

مسجون يعمل محضر " فبلغت سيادته ان ده مش صح وان قانون تنظيم السجون، القانون رقم ٣٩٦
اقر حقه وحق اي مسجون في ده وألزم مأمور السجن به .

بإذن الله هناخذ كل الاجراءات القانونية، وبحمل المسؤولية المباشرة عن سلامة أبويا الجسدية
والنفسية لسيادة العقيد أسامة الرويني مأمور سجن المزرعة وسيادة العميد أحمد الوكيل مفتش
مباحث منطقة سجون طره وسيادة الضابط أشرف شلبي (أول مرة اسمع اسمه الحقيقة النهاردة
ومعرفش رتبته ايه او وظيفته ايه تحديدًا)

<https://bit.ly/37cMPrF>

عن معتز صبيح



كل عام وأنت بخير يامعتز
سابع رمضان من غيرك

<https://bit.ly/3Dytrlb>

3 أبريل

عن معتز عبد الوهاب (أخلي سبيله)



من عادات رمضان اني اول يوم رمضان اروحك المكتب واعقد
معاك لحد قبل المغرب بنص ساعه علشان اروح افطر مع ماما
، بكره اول يوم رمضان وانت مش معنا ، ثالث رمضان وانت
مكانك فاضى ، انا وحيد في الدنيا دي من غيرك !

<https://bit.ly/3x5FBAJ>

عن زياد العلمي

الحمد لله وبفضل دعواتكم زرت زياد في سجن الاستقبال واطمنت عليه.. وعرفت منه ان نقله لسجن الاستقبال كان بسبب انه مضرب عن الطعام من يوم الاثنين وعن الطعام والشراب من يوم الاربع ، والسجن ده فيه مستشفى لمتابعة حالته الصحية.. وعرفت من زياد ان سبب الاضراب سوء تفاهم بسبب عدم وجود قنوات تواصل سليمة مع المسئولين في محبسه، وانه اما اعلن عن الاضراب يوم الاثنين قيل له انه لو اضرب حيثنقل من السجن فاعتبر ده ضغط عليه او تهديد، وزى ما قال لي "انتي عارفة انا مش باجي بالضغط".. فبعد ما كان مضرب اكل بس ، اضرب -من الاربعاء - اكل وشرب. وبعد ما اتنقل سجن الاستقبال عرف ان الموضوع ما كانش ضغط وانما دي لوائح السجن التي تقضي بعزل المضرب، وتم نقله لسجن يتوافر له فيه المتابعة الصحية نظرا لكومبو الامراض اللي عنده! وفعلًا كان فيه دكتور بيشفوه مرتين في اليوم لمتابعة الضغط والسكر وعمل محضر يومي.. وفهم ان الموضوع كان تطبيقا للائحة السجن مش للضغط عليه، وتم تسوية الوضع واتخاذ الاجراءات اللي زياد شافها كافية للتسوية. وقرر فك الاضراب بعد المغرب النهارده ان شاء الله.. (طبعا زياد كان بيحاول يبدو متماسك صحيا، لكن كان واضح اثر الاضراب لمدة اسبوع على كلامه وطريقته في اخذ النفس وعلى لون جلده، وكان دقنه طويلة وبيضا) واصبح لزاما علينا شكر كل من تضامن وكل من تفهم الامر وساهم في التسوية

<https://bit.ly/3uVt3cv>

عن أحمد دومة

احمد بلغني انه رجع ياخذ المحلول تاني بعد البدء بحل مشكلة السباكة في الزنزانة اللي اتنقل ليها والسماح بوجود جزء من متعلقاته ف الانفرادي -مصحف مصلية راديو كتب....- ومكمل اضراب عن الاكل والشرب والأدوية أحمد بيأكد ان مشكلته مش هي التريض والجرايد والتلفزيون وبس لكن المشكلة الحقيقية اللي عجلت بالاضراب هي الاعتداءات المتكررة اللي مش بيحصل فيها تحقيق والحالة الصحية اللي بتتأخر كل يوم عن اللي قبله "مشكلتين الجهاز التفسى -الرئة وكسر الانف- غير مشاكل العظام -ركبته والكتف وظهره- والمشاكل النفسية وغيرهم. وضع أحمد الحالي بيسوء كل يوم بدأ مغص كلوي مرتين لحد دلوقتي بيصحى من النوم من الألم وصوته بيخفني بسبب جفاف الحبال الصوتية وييتعب بالليل بيحصله ضيق تنفس وهبوط ومش بيقدر حتى يقوم ولا يبطلع صوته علشان ينادي حد يلحقه وبيستمر لساعات في وضع انه مش قادر يطلب المساعدة ودا اتكرر مرتين من بداية الاضراب.



<https://bit.ly/3r2AKfX>

عن عبد الرحمن طارق موكا

اليوم 49 لإضراب عبد الرحمن طارق موكا عن الطعام
موكا مضرب عن الطعام طول الوقت ده عشان بس يطالب بتحسين ظروف احتجازه الغير آدمية،
وحالياً هو في مستشفى السجن - حسب كلام سارة أخته - غير إن أسرته غير قادرة عن الوصول أو
التواصل معاه لاي شكل من الأشكال، وده لأنه من بداية الإضراب مخرجش ولا زيارة ...
ادعموا عبد الرحمن موكا واتكلموا عنه لأنه حقيقي في خطر كبير جداً، ولأنه من انضف وأنقى شباب
الثورة.

<https://bit.ly/3NQBcYz>

عن عبد المنعم أبو الفتوح

وجعتونا مرتين في أبويا بشكل غير مسبوق ... التزامنا وواجبنا الأخلاقي تجاه دعمه وحمايته وحفظ
حقوقه أمر بديهي وأبدي لا نملك فيه رفاهية التردد أو الاختيار ولن يتوقف

<https://bit.ly/3LGxY7V>

عن معتز صبيح

ملعون يا سارق ضحكة الأحرار

<https://bit.ly/3KeoMr1>

عن محمد صلاح (أخلى سبيله)

تالت رمضان لمحمد صلاح في السجن، بعيد عن أولاده وأسرته
وحياته

#حرية_صلاح_حقه

#جوه_السجن_بره_القانون

<https://bit.ly/3qYKYOr>



4 أبريل

عن عبد الرحمن طارق موكا

النهارده اليوم ال ٥٠ لاضراب عبدالرحمن عن الطعام ٥٠ يوم مش بياكل وصحته بتدهور ونفسيته سيئه جدا ويرفض الزيارات ومفيش اي حاجه نطمنا بس انه بخير وقلبنا مقبوض وخايفين طول الوقت ٣ يوم رمضان وبندي ونتمنى ربنا يحفظه ويكون بخير ويخرجلنا يارب
#موكا_في_خطر

<https://bit.ly/3j89CI4>

عن أحمد دومة

وانتوا بتتسحروا افتكروا ان أحمد بقالة اكثر من 200 ساعة ما أكلش ولا شرب ولا خد علاج حتى ... كل دا علشان بيطلب يتحقق ف الاعتداءات اللي بتحصل ف حقه و بيطلب تريض طبيعي وكافي لحالته الصحية وبيطلب بالسماح له بالجرايد القومية والتلفزيون الرسمي دول كل مصادرة في السجن عن الحياة الخارجية

<https://bit.ly/3DHerI4>

5 ابريل

عن زياد العلمي

"اتق شر الحليم اذا غضب"!!..ما تدفعوش الشباب لاسترخااص حياتهم والتخلص منها بالاضراب عن الطعام، وتخليوا انكم كده حتطمنوا!!.. الشباب اللي وصلوا لان حياتهم ما بقتش تهمهم، ومستعدين يموتوا، ويموتوا وهمه عندهم امل موتهم يصحي ناس غيرهم، عشان يحققوا حلمهم، حتى لو مش النهارده!! ويعملوا بموتهم اللي ماقدروش يحققوه في حياتهم! وبالمناسبة موت ولادنا مش حير يحكم ولا حيقق لكم الاستقرار! ابدأ.. ابدأ!!

وبالمناسبة كمان، لو حصل لحد من ولادنا حاجة لا قدر الله ، مش حنقبل عزا من اي حد طبل، او برر؛ وساهم بتطبيله وتبريره في سجن انبل شباب البلد ، ووصولهم الى حد اليأس من استمرار الحياة!! وحيدفعوا التمن ، دا وعد!!

#الحرية_لكل_سجناء_الرأي

#جنبنا_آخرنا

<https://bit.ly/3KeD4Ib>

عن زياد العلمي

النهارده كان فيه زيارة لاهل عمر زميل دومة في الزنزانة. وعمر بلغ اهله:
-ان دومة فك الاضراب ورجع زنزانته

- وان زياد فك الاضراب ورجع المزرعة
- واحمد سمير فك الاضراب .

ارجو ان الانباء دي تكون دقيقة ويكون المسئولين عن حبسهم تفهموا طلباتهم الانسانية المشروعة.. ولادنا مش طالبين اكثر من تطبيق حقوقهم المنصوص عليها في لوائح السجون . وربنا يطمننا على موكا الي مضرب بقاله خمسين يوم واهله مش عارفين يزوروه وبيقولوا لهم انه رافض الزيارة.

وعلاء عبد الفتاح المضرب من أول رمضان.
طبعا انا حتأكد بشكل يقيني في زيارة زياد يوم الاحد القادم.. يارب يكونوا عرضوه على دكتور لمعالجة تأثير اضراب كامل، بلا نقطة مياه، لمدة اسبوع على مريض سكر وضغط وقرحة.
ممتنة جدا لكل حد تضامن وابدى دعما انسانيا. وربنا يطمن كل الطيبين على ولادهم

<https://bit.ly/36WyHTY>

عن أحمد سمير سنطاوي

الحمد لله أحمد قرر ينهي الإضراب عن الطعام اليوم بعد ما استجيب لمطالبهم وحالته كويسة نسبيا.
شكرا للجميع

<https://bit.ly/3jf376i>

عن أحمد دومة

النهارده كان فيه زيارة لأهل عمر زميل دومة في الزنزانة وأهل دكتور عبد المنعم أبو الفتوح وبلغوا الاتنين بان دومة فك الإضراب ورجع زنزانته.
وان زياد فك الإضراب ورجع المزرعة.
واحمد سمير فك الاضراب.

أرجو إن الأبناء دي تكون دقيقة ويكون المسئولين عن حبسهم تفهموا طلباتهم الإنسانية ونفذوها.

<https://bit.ly/38yKzMH>

عن أحمد حسن

النهارده اليوم 1131 علي اختفاء احمد دخلنا خلاص السنة الرابعة من غير ولا معلومة من غير منوصل لاي حاجة تطمن قلبنا

#الحرية_حق

#احمد_حسن_فين

<https://bit.ly/3xaKKHW>

عن وليد شوقي (أخلي سبيله)



زي النهاردة من ١٠ سنين أول مرة أقابل وليد في ٢٠١٢..
محرومة منه بقالي ٣ سنين ونص!
<https://bit.ly/3Je2uo1>

عن عبد المنعم أبو الفتوح

قدرنا الحمد لله نزور أبويا النهاردة في سجن شديد الحراسة ٢ بنفس الطريقة المعتادة. من خلف حاجز زجاجي بلا تلامس ولمدة ٢٠ دقيقة. طلبنا منه في اخر زيارة بعد ما تعرّض له انه يوقف امتناعه عن الخروج لاننا محتاجين نظمن عليه بصفة مستمرة حاليا ونعرف اخباره بشكل مستمر، وكان عنده امل النهاردة في استجابة ادارة السجن للزيارة الطبيعية في سجن المزرعة بدل استمرار ترحيله كالمعتاد لسجن شديد الحراسة ٢ في كل مرة للزيارة، وخاصة بعد ابلاغه ان ادارة السجن سمحت اليوم بدخول كل من حضر من أسرته وليس فرد واحد فقط كما هو معتاد من قبل. قدرنا نشوفه انا وامي وأختي، وأصغر أحفاده الرضيع. كانت فرصة لأبويا يستشعر فيها بعض لحظات السلام معاه ويعيش في عالمه البريء، بعيدا عن عالم القسوة، بالرغم انه وضع مربك لأي طفل ومؤلم لأبويا دايمًا وأحد أهم أسبابه في سعيه وطلبه على مدار شهور ان الزيارة الطبيعية ترجع. النهاردة كان بيتواصل مع حفيده واحنا حاطين السماعه على ودانه وشايفه من ورا حاجز زجاجي في محاولة انه يتعرف على صوت جده وشكله ويبني اي جسر تواصل ويستشعر مدى حب جده له وافتقاده الشديد انه يضمه ويقضي وقت معاه هو وكل احفاده ...

أبويا طمنا على زياد ودومة الحمد لله وكان قلقان على صحتهم بسبب الاثار المترتبة على الاضراب التام عن الاكل والشرب وتمنى لهم السلامة وانهم بإذن الله يستعيده كامل صحتهم في أقرب وقت، وان تفهم واستجابة إدارة السجن لمطالبهم البسيطة والمشروعة، واللي بدأ يلمسها، بإذن الله تكتمل. كلامه عن الاضراب التام كان فيه جدية شديدة وحالة نداء متجرد لكل مسؤول قادر على حماية الشباب من معاناة بلا أي داعي، وان مفيش اي انسان يضطر يوصل للخيار ده خاصة في ظل مطالب وحقوق بسيطة وممكنة. وان قرار شديد الحساسية زي الاضراب التام ليس فيه أي مجال للمتاجرة او المزايدات او الاستهانة، وان وصول اي انسان لقرار زي ده يستدعي التعامل معه بجدية تامة، وقدر خاص جدا من الاعتبارات الانسانية يلتمسها في إدراك المسؤولين لأهميتها.

<https://bit.ly/3v00iK3>

عن خالد عز الدين (مختفي قسريا)

النهاردة كان يوم ميلاد خالد زوجي التاسع في غيابه
تسع سنين وتسع شهور غياب ... يا تري حالك ايه
يا خالد يا رب تكون طيب الله يردك لي طيب في
الفضل والعافية كل الكلام في وصف الغياب
والفقد خلاص بقي عاجز يوصف حالنا...النفس
راضية بقدره سبحانه بس أنا عندي يقين
برجوعك ربنا أهداني بيه حاشاه سبحانه أنه
يخذلني...ربنا يردك لي يا خالد ويهون عليك
حالك اللي هو وحده عالم بيه وكل اللي زيك يا رب



ويعجل لنا بقاء قريب وبارك في عمرنا اللي باقي سوا.

#خالد_عز_الدين_فين

<https://bit.ly/3NXLoyy>

عن هشام فؤاد

ما أصعب الانتظار على السجناء والمحبوسين، وما أقساها على
ذويهم الذين يعيشون على أمل خروج ذويهم بعد أشهر
وسنوات من المعاناة في غيابهم، بينما يأتي شهر رمضان وتتوق
إليهم مقاعدهم الفارغة على موائد أسرهم، لتعود معها البهجة
الغائبة، في الوقت الذي تنشغل الأيدي بالابتهاج لعودتهم،
وإعداد وجبات الإفطار لتسليمها لهم بوجوه تكسوها الحسرة،
في أقرب زيارة لها خلف القضبان . 1016 يوما مروا على
الصحفي والمناضل الاشتراكي هشام فؤاد وهو قابع خلف
القضبان في محبسه، بينما يزداد نزيف الروح وتدهور الصحة
وتزداد الأوضاع صعوبة. 1016 يوما تمثل 24384 ساعة غياب



منها نحو 1500 ساعة في رمضان خلال السنتين الماضيتين، وها هو رمضان الجاري يحل وما يزال
مقعده شاغرا . هذه هو ثالث رمضان يمر وعلينا ونحن في المأساة نفسها، بل يزداد الوضع سوءا مرة
تلو الأخرى، وما يزيد معاناتنا هو صدور حكم بحبس هشام لمدة 4 سنوات على ذمة القضية 957
لسنة 2021 المعروفة باسم "قضية الإيحاء"، وهي القضية المنسوخة من "قضية الأمل" التي حملت
رقم 930 لسنة 2019، التي ما تزال مستمرة هي الأخرى. عندما يكون يسافر شخص عزيز لديك تشعر
بافتقاده، لكنك تمتلك القدرة على الاتصال به والاطمئنان عليه، فما بالك بالسجين المحروم أحبابه
ومن حريته، ويفتقد أدنى طرق التواصل مع ذويه، إلا على مدار فترات طويلة متفاوتة، لم يعد هناك
شيء مثل السابق، حتى رمضان وجميع المناسبات لم نعد نشعر بطعمها في غياب هشام طوال هذه

المدة. أدعو الله أن يعيدهم إلينا وإلى أحضان أسرهم وأحبابهم في أقرب وقت، وأن يعينهم على تحمل الأوضاع التي يعانونها، ويلهمهم السلام النفسي في ظل حالة الجنون التي نعيشها حالياً، وينجيهم وينجيننا نحن أيضاً .

<https://bit.ly/3DLXOoi>

7 ابريل

عن أيمن عبد المعطي

حتى السلام والحضن ع الماشي
بنتمناه
الاختيار مش مسلسل
الاختيار يعني من حقي أرفض
تصورك للحياه
<https://bit.ly/3LVO261>



عن عبد الرحمن طارق

النهارده موكا بقاله ٥٣ يوم مضرب انا مش عارفه هو حالته عامله ازاي دلوقتي اكيد في اسوء وضع نفسي وجسدي ليه مش عارفه ابطل ابقا مرعوبة عليه طول الوقت ماما كل يوم بتدعي وتعيط يارب بحق الايام المفترجة يخرج ويكون وسطنا والكابوس ينتهي
#موكا_في_خطر

<https://bit.ly/3LQ2s7I>

عن محمد عادل

أكلم مين ف مصر عشان يخرج لي جوزي من السجن؟ أو حتى يقول لي هيخرج امتي؟
أكلم مين وأوصل له ازاي؟
ايه المطلوب مني اعمله عشان تخرجه؟
وايه المطلوب منه يعمله عشان يخرج؟

Mohammed Adel
#الحرية_لمحمد_عادل
<https://bit.ly/3unUKf1>

8 ابريل

عن أحمد دومة

3048 يوم

100 شهر

أحمد مسجون من 100 شهر ... سنين بتمر وهو مش موجود.

#حرية_دومة_حقه

#الحرية_لأحمد_دومة

<https://bit.ly/3DT7pdb>

عن سيد عبد اللاه



“خلال زيارتي له في أول أيام رمضان الحالي، أرجع مسؤولو السجن ما يقارب ثلاث أرباع الطعام الذي أرسلته إليه، حتى أنهم رفضوا دخول الياميش والمشروبات، واكتفوا بدخول نوع واحد من الجبن له، ووجبة ساخنة، بينما تسببت عمليات التفتيش التعسفية في إتلاف ما تبقى من الزيارة. انتظرت طويلا حتى تم السماح لي بمقابلته، خلال أسلاك ضيقة بالكاد أستطيع من ورائها رؤيته وسماع صوته، كانت حالة النفسية تزداد سوءا، بعد مرور رمضان الثالث عليه في ظل هذا الوضع، وأبلغني رسالة يؤكد فيها نيته عدم العمل في

الصحافة مجددا بعد خروجه من محبسه، بسبب ما عانته أسرته بعد القبض عليه لمجرد ممارسته المهنة. كفاية 3 رمضان وأولاد متيمين رغم وجود والدهم، في زيارتي الأخيرة لسيد اضطرت لتركهم وحيدين في المنزل، على الرغم من صيامهم وصغر سنهم، من أجل إيصال الزيارة لزوجي متنقلة من محافظة السويس إلى القاهرة، وعدت إليهم بعد انتهاء وقت الإفطار. في 28 فبراير الماضي، أخذت أطفالا لزيارة والدهم في محبسه، حينها طلبوا مصافحته، لكنه لم يكن أمامه إلا أن يخبرهم بضرورة “الاستئذان” للسماح له بذلك، كان الأطفال يتحايلون على حراس السجن للسماح لهم بمصافحته، إلا أنهم واجهوا رفضا شديدا، على الرغم من أن آخر زيارة لهم معه كانت منذ ما يقارب 10 أشهر، خلال عيد الأضحى الماضي .

“لكم أن تتخيلوا قدر الوجد والذل الذي يتعرض له أب بات مضطرا لأخذ الإذن لمجرد مصافحة أطفاله، الأطفال عادوا إلى المنزل في انهيار شديد، لقد منعنا أنفسنا من الاحتفال بأي مناسبة في ظل استمرار غيابه، باتت زيارات أبنائنا لوالدهم هي كل ما تحمله ذاكراتهم .

لدينا 3 أطفال جميعهم في مراحل تعليمية مختلفة ويحتاجون لوجود والدهم بجانبهم، حيث يمرون بحالة نفسية شديدة السوء، فأحدهم بات يعاني من عصبية شديدة، والثاني أصبح انطوائيا بشكل كبير، بعد ما حدث لوالدهما، كما أن ابني الصغير لا يعرف شكل والده حتى الآن إلا عن طريق الصور، حيث تم القبض على سيد وكان الطفل حينها في الشهر الرابع من عمره، الأمر بات مرهقا عليهم، وعليّ كزوجة وأم وأب في الوقت نفسه.

“القضية المحبوس عبد اللاه على ذمتها لم يتبق من قائمة المتهمين فيها سواه وشخصين آخرين، لم يخرج أي منهم حتى الآن، بينما تواصل محاميته الأستاذة هدى عبدالوهاب بذل ما في وسعها لمحاولة الإفراج عنه، لكن الأمر ليس بأيدينا .

والد سيد أحد أبطال أكتوبر، وتعرض للأسر لمدة عام على أيدي العدوان، حتى أنه تم استخراج شهادة وفاة له، فهل حبس نجله هو التقدير والمكافأة التي يحصل عليها بعد كل ما قدمه للوطن

<https://bit.ly/3r9XRFy>

9 أبريل

عن زياد العليمي

يا مجلس يا قومي لحقوق الانسان:

موكا مضرب عن الطعام من ٥٥ يوم واهله ما يعرفوش حاجة عنه

-علاء عبد الفتاح مضرب عن الطعام من ٨ ايام

تقدر تعمل لهم ايه يا مجلس؟

تقدر تعمل ايه في حقوق الإنسان؟ قل لي حاجة أي حاجة، بين لنا أمانة انت بتعمل ايه؟

<https://bit.ly/37F8edh>

عن محمد الباقر

سارة أخت باقر زارته النهاردة وبتقول كويس الحمد لله

وبيسلم على الناس كلهم

#الحرية_لباقر

<https://bit.ly/3LTz1S7>



عن سمير الهيتي



“بابا وحشني اوي.. يارب يجي من الجنة عشان يحضني ويديني خمسة جنيه”..

#سمير_الهيتي_فين

<https://bit.ly/3v2B92Y>

10 أبريل

عن زياد العليمي

كتبت البوست ده بس ما كانش عندي انترنت فما وصلش.. اعتذر عن التأخير للأصدقاء الي بيكونوا عايزين يطمئنوا:

الحمد لله وبفضل دعواتكم، زرت زياد في سجن المزرعة وصحته افضل كثير من الاسبوع الي فات ومعنوياته كويسة. وبيشكر كل الحلوين الي تضامنوا معاه وباعت سلام لكل اللي بعثوا له سلامات. هو صايم، وانا زي ما متعوده من وهمه صغيرين، باقول رأيي مرة واحدة و بلغته كلام الاطباء؛ وبعد كده كل واحد حر في اختياره

<https://bit.ly/3KzXv2r>

عن عبد الرحمن طارق موكا

النهارده عبدالرحمن بقاله ٥٧ يوم مضرب انا تعبت من فكرة عد الايام وانا بتخيل ان كل دي ايام اخويا مكالش فيها وبينهار جسديا ونفسيا مش قادرة افضل احس كل مرة وكل يوم بالنغزة الي في قلبي والخوف من اي خبر وحش ييجي في اي وقت يارب لطفك يارب #موكا_في_خطر

<https://bit.ly/38BxFgp>

11 ابريل

عن مصطفى النجار

هو بعد وفاة أيمن هدهود الله يرحمه ازاي هيغمض لنا جفن؟!
#مصطفى_النجار_فين
<https://bit.ly/37AH2wo>



عن عمر محمد علي

كنت في زيارة عمر ومن ساعة مارجعت وأنا حاسه أن الدنيا بتزداد سواد في عنيا.. عمر كان ساكت وشكله مهموم جدا سألته فيك ايه يا عمر قالى انتى عامله أيه في ارتفاع الأسعار الحاجه عندنا أسعارها ارتفعت بجنون.. طبعا استغربت لرده بصلى وقالى انتى تعبتى أوى يا ماما كان نفسى ابقى جنبك وماسبكيش لوحدهك شايه كل حاجه وكمان أنا حملى تقيل عليكى أوى حملتك فوق طاقتك انتى واخواتى نفسى ترتاحو نفسى اقولك يا ماما ماتجيش تانى اعتبري أنى مهاجر بس مش قادر لأن بستمد قوتى منك زيارتك متنفس لى.. قالى طاقتى خلصت ومش قادر أحملك انتى كمان اكثر من كده.. ادعيلى أخرج أما معاكى أو مع بابا بس ماتزعليش لأن هبقى مرتاح بس هبقى قلقان عليكى. دعوانكم يا أحباب ليه لأنه في أسوأ حالاته.. ربنا ينجيه ويلطف بيه وبيننا.

<https://bit.ly/3E6h68e>

عن آل ثابت

أسمه ايه ده لما القاضي انهارده يوافق اننا نشوف بابا
وسيف في المحكمة والأمن ما يرضاش؟!
و اسمه ايه لما يمنعوا اصلاً بابا وسيف يشوفوا بعض في
المحكمة؟!
ولا عاملين حساب لقانون ولا حساب للحزن ال كلنا فيه
ولا حساب حتى لرمضان!
لحد امتى حنفضل كده؟!!



كل ده ليه وعشان ايه؟
#خرجوهم_كفايه_كده

<https://bit.ly/3LZU4mb>

عن عمر محمد علي

#الحياة_لعمر مطلبنا الوحيد حالياً مش إنه يخرج يعيش وسطنا .. احنا عاوزينه بس يعيش .. عمر بيعدي باكتئاب شديد وحالة صحية ونفسية سيئة جداً..
عمر مسجون في زنزانة بدون شباك أو أي مصدر تهوية ومع ارتفاع حرارة الجو حاولنا أكثر من مرة ندخل له مروحة وإدارة السجن بترفض .. جنب ده عمر بيعاني من شرخ وبواسير محتاجة جراحة من ٦ شهور بنطلب تتعمل على حسابنا في المكان اللي تحدده إدارة السجن وبيترفض طلبنا بدون مبرر .. طلب نقله للمستشفى فطلعت بيه عربية الترحيلات مرتين على تخشيبية الجيزة واتختم الورق إن عمر راح المستشفى وكشف وخذ تأجيل وما فيش حاجة من دي حصلت وعمر بينزف بقاله ٦ شهور .. وزيادة على كدة ممنوع يخرج من الزنزانة غير ساعة واحدة في اليوم وجسمه تعبان جداً من قلة الحركة والشمس..

آخر زيارة لعمر طلب مني أوقف أي محاولات تاني لعمل العملية أو دخول المروحة وطلب نبطل نجيبه أكل وقال لي اقنعي ماما ان موتي هيكون أحسن لينا كلنا أنا تعبت وماما تعبت .. سيبني كل حاجة زي ما هي لحد اما اموت.

عمر دخل السجن وهو عنده ٢١ سنة عشان اتقبض عليه غلطة وهو بيتعشى في مطعم وخذ حكم ٢٥ سنة قضى منهم ٧ على ورق قضية بينفي ثبوت أي تهمة عليه وبدل ما نكتفي بنزيف عمره في السجن طلع حد خد قرار إنه يفضل وراه لحد اما يموته في سجنه.
عشان موته بيعمي أمن البلد في إيه ؟ عشان منع التهوية عنه ورفض إجراء العملية بيثبت قوة الدولة في إيه ؟ عشان حرقة قلب أمه بتحقق مجد وانتصار لمين ؟

<https://bit.ly/3JAOoxc>

عن وليد شوقي

ووصل بينا الحال إننا نقول "الحمد لله إنه عايش"
الرحمة والسلامة والأمان يا رب لينا وللكل

<https://bit.ly/3jswhil>

عن هدى عبد المنعم

رسائل لا تصل..

ماما حبيبتي

اخبارك ايه ؟ !

يا ترى عاملة ايه في رمضان ؟ !

عاملة ايه في الصيام مع وجع الكلى وحالتك الصحية ؟ !
انا عارفة ان نفسك تطمني علينا
احنا كمان نفسنا نطمئن عليكي اوي
احنا يا ماما (عايشين)
كويسين اليوم بيعدي علينا بالعافية
متحاصرين بين صورك اللي مالية الحيطان
وذكرياتك اللي في كل ركن في البيت
بنحاول نرزق الأيام
بنحاول نرزق الثواني والدقائق
والساعات والاسابيع والشهور
والسنين اللي عمالة تفوت علينا من غير حساب
الأحفاد ببسألوا عليكي طول الوقت
حليمة اللي مشافتكيش خالص طول الوقت مش فاهمة
هو لو انت موجودة هي ليه مبتشوفكيش ؟ !
رمضان من غيرك مرعب يا ماما
طول الوقت بحس اني مش عوزاه يجي
ولما بيبي بحس اني عاوزاه يخلص بسرعة
فيجي العيد يروح رازعنا بالقلم
احنا معندناش لمة وعيلة يا ماما
احنا معندناش غيرك !
وجودك كان هو العيلة
والدفا والحب والحنية والامان
وجودك كان هو الحياة
يا ماما كل سنة وانت طيبة
يا ماما رمضان كريم
وربنا اكرم يا ماما عسى الكريم ان يرزقنا بك يا ماما

FreeHoda#

<https://bit.ly/3rhtxbS>

عن عامر عبد المنعم (اخلي سبيله)

تعب أكثر من مرة، أصيب في رمضان الماضي بالتهاب فيروسي في عينيه نتيجة ظروف السجن وتفاقم الأمر مع وجود السكري عنده وتحول التهاب مزمن لا يستجيب للعلاج. ”
”بدأ يشعر بالآلام شديدة أسفل الظهر نتيجة النوم على الأرض وعدم الحركة واشتدت الآلام عليه، حاولت أدخله لحاف فاير ينام عليه ومخدة طبية رفضوا، قدمت طلب للنقابة اللي هو عضو فيها من ثلاثين سنة عشان تساعدني أدخل الحاجات دي دون جدوى ولحد الآن يتغلب على الآلام بالمسكنات. ”

رسالة اليوم بتمثل أمهات المعتقلين كلهم.. والدعوة ليهم جميعا..
مرسلة من والدة المعتقل عمرو عيد
#عنبرة زي ما عودتكم هتنسر الرسالة زي ما وصلتنا
"الأمهات اللي محرومين يشوفوا ولادهم ولا يحضنوهم ولا حتى
يسمعوا صوتهم، اللي لما تيجي تاكل ماتحسش بطعم اللقمة ، واللي
الناس كلهم في وادى وهى في وادى تانى خالص ، تتقلب في السرير
بالليل تنادى على ابنها وتقول ياترى نايم ازاى ياابنى، اللي بهجة
الفرح ماتدخلش قلبها ولو بقية ولادها حواليتها ماتحسش غير
باللي غايب.
الى لما حد يطلبها يطمن عليها تقوله ابني وحشني وتبكي.



الأمهات اللي نفسها تضم ابنها قبل ما سهم قضاء الموت يفرق بينهم.
الله بقلوبهن.. يارب كما رددت إسماعيل لهاجر ورجعت موسى إلى حضن أمه.. اربط على قلوب
الأمهات إلى أن تقدر لهم اللقاء بولادهم.
لك حكمة يارب .. كن فيكون يارب.. اجبر خاطرهم يارب.. اشف صدورهم يارب.. ياأرحم الراحمين
يارب.

هذا الدعاء ومنك الإجابة يارب."

اللهم فرجا قريبا

<https://bit.ly/3uRBozi>

13 ابريل

عن هدى عبد المنعم

رسائل لا تصل ٢

ماما حبيبي ..

انا مش عارفة افضفضلك غير هنا ..

الدنيا بقت وحشة اوي يا ماما ..

طول الوقت عمالة فاكرة لما انا في البيت وحواليا كل وسائل التواصل مع الخلق وكل تواصل الترفيه

وزهقانة ومش طايقة نفسي امال انت يا حبيبي عاملة ايه وانت كمان مققول عليكي زنازة الله اعلم

شكلها ايه ..

انا عارفة انك زي مبتطيقيش القاعدة وبتحبي اللف والنزول والشغل والحركة ومبتحبيش قعدة البيت

..

قبل كدة انا كنت ببقى تقريبا بقضي معظم الوقت في الشارع يا ماما من الشغلانة دي للشغلانة دي

للايفنت ده لف ودوران عشان اجي اتخدم ويبقى اليوم خلص وهكذا والأيام كانت شبه بعضها اوي ..

دلوقتي الوضع ابشع بكتير والايام شبه بعضها اكثر من الأول بكتير ..

البيت مضلم يا ماما .. كل ركن فيه مضلم ..
وحشني صوتك وصوت حركتك في البيت صوت التكتكة بتاعتك في المطبخ صوتك وانت في الصالون
برة ضحككتك اللي كانت بتبهز البيت كله حضنك اللي كان أمان مطلق مالوش نهاية ..
كل حاجة بقت من غير روح ..
قعدة البيت مؤخرا اللي بقيت بقعد فيه كتير لأني مش قادرة اعمل حاجة خلتنى طول الوقت
مش طيقاه وانت مش فيه يا ماما ..
على فكرة انا بقيت بطبخ وبيدع في الطبخ اينعم مش زيك وبسأل ثلاث ارباع الناس على وصفات الأكل
بس اهو يحاول اكون قد المسؤولية ..
بس انا مش زيك يا ماما .. مش عشان انا مش قد المسؤولية بس البيت مبهؤ اوي عليا ..
والمسؤولية مرعبة .. وجودك مكنش بيخلي حد فينا حامل هم حاجة مانى موجودة ومنورة حياتنا ..
اتاريكي كنت شايلة كتير اوي وكنت السند لينا كلنا ..
لما بقعد مكانك عالسفرة بتحاشى نظرات بابا اللي مفتقد وجودك في مكانك .. بابا مفتقدك اوي احنا
دمرنا البيت تقريبا ومش عارفين نبقى زيك
بالاضافة الى انهم لما جم دمروا البيت مفيش حاجة رجعت زي الأول بابا مبقاش بياخذ رد فعل غير
انه يدعي بصوت عالي ربنا يرجعك بالسلامة يا هدى .. ماحنا مش زيك يا ماما ..
كل حاجة في البيت كانت بالمسطرة ..
انت ازاي كنت بتركزي في ادق التفاصيل لكل حد فينا على حدى كدة !!?
يا ماما انا روحي شاخى .. وشكلي عجز من فراقك وبُعدك
مقدرش اقول ان في حنة اتطففت او ماتت لأني هبقى متفائلة اوي بالوصف ده لأن اللي انا حساه ابشع
بكتير من ده
انت عارفة اني مبقتش بتكلم عنك ولا بجيب سيرتك الا نادرا بتحاشى اشوف صورك او اسمع
الريكوردات بتاعتك
انت عارفة ان ناس كتير اوي بعدت عني عشان مبقتش برد على حد ..
طب انت عارفة ان مشاعري كلها بقت واحدة ومبقتش بدي رد فعل لأي حاجة ..
انت عارفة اني تحولت لمسخ يا ماما رافض كل حاجة ومش حاسس بأي حاجة الفرح زي الوجدع الألم
زي الراحة الحلو زي الوحش الفراق زي اللقا كله بقى بشع ..
يا ماما انا بقيت العن من عم ضياء ..
الفكرة ان كله بقى لجوة ..
يمكن دي اول مرة اكتب من كتير واخترت اني اكتبك لأني نفسي اعرف عنك اي حاجة ..
انا بقالي شهر من اخر مرة رحتي فيها المحكمة معرفش عنك حاجة عاملة ايه في الجو المتقلب ده طب
صحتك اللي على قدها عاملة ايه في الاوضاع دي يا ماما ..
يا ماما رابع رمضان جه علينا وانت مش موجودة ..
انت عارفة يا ماما يعني ايه رمضان من غير ام!! ..
يعني لعنة والله يا ماما .. يعني وجع وألم لا يتخيله حد ولا اتمناه لحد ابدا ..
انت عارفة ان حليلة حفيدتك الخامسة متعرفكيش يا ماما انت هتحببها اوي يا ماما .. طالعة كربونة
منك شخصية ماشاء الله حليلة بقت ٣ سنين يا ماما ..

يا ماما يوم ١٤ مايو لسة الجلسة يتاعتك يعني شهر كمان على ما نعرف عنك اي حاجة ياترى في امل تقضي العيد الكبير معنا طيب؟!
ماما انا مبخضكيش انا مش يائسة ومش محبطة ومش محطمة يا حبيبة قلبي ..
لا يا حبيبتى انا عدبت المراحل دي كلها .. صدقيني D=
انا فعلا لا حسة حاجة ولا حسة حد انا بكتبلك عشان انا فاض بيا وعشان انا مش زيك وعشان انا كل حاجة بهوئت عليا اوي يا ماما انا مش حسة اني لوحدي اطلاقا .. انا بس مش حسة بحاجة حواليا كأني شفافة او كأن بيني وبين الناس لوح ازاز ..
يا ماما انا مش عاوزة اطول عليكي .. انا بس كنت عاوزة افضفضلك بجزء من اللي جويا ..
اوعي تفكري اني مش صابرة او مش هكمل صبر لاني مقدميش غيره لا انا صابرة ..
بس انا للأسف مش هعرف ارجع زي ما كنت تعرفيني ..
انا مش هعرف ارجع اتعامل مع الخلق انا حسة العزلة هي أسلم طريقة نقدر نتحاشى بيها كل حاجة حوالينا وأذية كل الناس ..
اطلعي بقى يا ماما .. وتعالى نقفل على نفسنا ونستخبي من الناس اطلعي واحضيني وطميني وخبيني عشان انا ماليش غيرك خلاص يا ماما ..
انا زي الصورة دي بالظبط يا ماما خيفة ومحتاجة حضنك رسالة لماما ..

سجن القناطر - الدواعي العسكرية

ابريل ٢٠٢٢

#FreeHoda

<https://bit.ly/3EdKN7j>

عن أسامة ياسين



الدكتور أسامة ياسين، قيل أن يكون وزيراً، كان طبيب أطفال، يداوى بفضل وتوفيق من الله أنات الصغار، يسمع شكوى أمهاتهم بانصات شديد ويطمئنهم، فكيف لهذا الحنون أن تحمل يده سلاحاً أو أن يقبل ذرة من العنف. هكذا عهدناه نحن، زوجاً حليماً كريماً، وأباً محباً عطوفاً

أما حين نصب وزيراً فصدق المخرج والكاتب حين أفاد باهتمام الدكتور بمراكز الشباب وتطويرها حتى وصل عدد تلك المراكز ما يقرب إلى 4300 مركز فأعاد حيويتها وألزم المسؤولين بها على إقامة دورهم في خدمة الشباب، فكان الشباب بجميع ميوله السياسية هم بوصلتته، فصمم على إشراكهم في الحياة السياسية والقيادة الإدارية منذ سن صغير

تعرب الأسرة عن قلقها أن لهذا البهتان غرض وهو تمهيد وتبرير لجريمة قد يرتكبها النظام وهو تنفيذ أحكام الاعدامات، تلتيق التهم ليس بالأمر المستجد، فذاك هو الحال ذاته منذ أن اعتقلوا د. أسامة، لكن تجسيده في الدراما المصرية ما هو إلا توثيق لكذب وتديليس وخصوصية النظام المصري لكل من شارك في ثورة 25 يناير، فستظل ذلك تهمة د.أسامة الأولى، وجريمته الكبرى أن حلم بمستقبل أفضل له ولنا ولشباب حمل همهم الحقائق محفوظة بكل مكان لمن أراد تحرى الصدق

محمد أسامة

ردا على البهتان الذى تم تداوله فى إحدى حلقات مسلسل يهدف إلى تزييف الحقائق وتحريف التاريخ

Haquhum

بيان نيابة عن أسرة د.أسامة ياسين ردا على البهتان الذى تم تداوله فى إحدى حلقات مسلسل يهدف إلى تزييف الحقائق وتحريف التاريخ، وتعرب الأسرة عن قلقها أن لهذا البهتان غرض وهو تمهيد وتبرير لجريمة قد يرتكبها النظام وهو تنفيذ أحكام الاعدامات.

- نجل المعتقل الدكتور أسامة ياسين

<https://bit.ly/3KQRGxN>

عن زياد العلمي

فيه حاجة مش حيقدر اهميتها الا اهالي السجناء اللي ييزوروا ولادهم؛ ومش عارفة الواحد يشتهي فين والا يقول لمين؟ تكررت عدة مرات ان حد يكون داخل يزور فيتمنع حاجة جايها معاه في الزيارة، يدخل يستأذن من ضابط امن الدولة لدخولها ويطلع يدور عليها يلاقها اتسرفت!! كمان ممنوع دخول الزيارة بالموبايل والناس مش بتلاقي حد تسبب معاه موبايلاتها، واحيانا حد يسبب موبايله مع اي حد يطلع ما يلاقيهوش.. يبدو ان فيه ناس بتيجي تندس بين الزوار المنتظرين للسبب ده!! طيب ايه الحل؟ ممكن ببساطة يتعمل رف امانات عند الباب يحرسه عسكري واي حد يحط الحاجة اللي مش حيقدر يدخل بيها في الامانات وياخد رقم، ولما يطلع يلاقيها.. مش معقول!! دي حاجات بديهية، زيتها زي وجود تواليت وكشك فيه مية وعصائر عند مكان الانتظار!!.. نروح لمين ونقول يا مين؟

<https://bit.ly/3KNSJOS>

عن عبد الرحمن طارق موكا

عبد الرحمن بقاله شهرين مضرب عن الطعام كل يوم فيها تهديد لحياته عبدالرحمن في السجن من ٢٠١٤ والشهر الجاي هيتهم ٢٨ سنة كل شبابة قضاه جوا السجن واللي بيعمله دلوقتي هو يأس من كل حازه شاب قضى كل الوقت دا في السجن اترفد من الكليه ومبقاش عنده ولا مستقبل ولا حياه وشايف اللي باقي من حياته قدامه جوا حيطان السجن خرجو موكا اللي فات هيفضل مآثر عليه باقي حياته فكفاية سيبوله اللي جاي

#موكا_في_خطر

<https://bit.ly/3OcsUKG>

عن عبد المنعم أبو الفتوح

قدرنا الحمد لله نزور أبويا النهاردة وطمننا على صحته...

الزيارة تمت بنفس الطريقة المعتادة في سجن شديد الحراسة ٢. إدارة السجن سمحت اليوم بدخول كل من حضر من أسرته، وقامت بنقله من سجن المزرعة لسجن شديد الحراسة للزيارة بسيارة شرطة "فان" مخصصة لنقل المسجونين بدلا من عربية الترحيلات المعتادة، وده أفضل كتير جدا لحالته الصحية من عربية الترحيلات اللي كانت تسببت قبل كدة في إصابته بانزلاق غضروفي مازال بيعاني منه.

أي تغيير بأي درجة من شأنه يخفف عنه أو عن أي محبوس أي قدر أو شكل من المعاناة في ظل الظروف الحالية أمر مهم ومطلوب جدا وعلى رأسه الحرية. وثقتنا في الله وفي رحمته ببلدنا وأهلنا كبيرة جدا طول الوقت ... يارب...

<https://bit.ly/3xvcXsT>

عن هدى عبد المنعم

أنهارة كنت واقفة برة الاوضة بعمل حاجة وسامعة ياسين جوة بيقول بصي يا تيتة هدى ده ماسك سبايدر مان انت عارفاه ؟
عارفة ده بيعمل ايه
فضلت اراقب الموقف من بعيد وانا ماسكة دموعي بالعافية وهو كل اللي بيعمله انه بيكلم صورة على الحيطه ..

حاجات كتير اوي مبتخيلش ان ياسين ممكن يعملها بس أكثر حاجة مفاجآني انه خلال ٣ سنين منسيكيش يا ماما وبيسأل عليكي ودايماً يقولي تيتة هدى وحشتني عايز اروح عندها 😞
آخر مرة ياسين فيها شاف ماما كان عنده سنة ونص !
وحشتي أحفادك وبناتك وكل حبايبك يا هدهد ❤️
ترجعيلنا بالسلامة

<https://bit.ly/3Og2yHN>

14 أبريل

عن محمد محيي الدين (أخلي سبيله)

....قبضة التعديلات الدستورية....
من فبراير لابريل 2019 اتقبض على عدد كبير لاعلانهم رفضهم
التعديلات اللي تمت على الدستور
وده حقهم يعني مقتلوش حد ولا اذوا حد قالوا رأيهم بس
اغلب اللي اعرفهم من قبضة التعديلات دي خرجوا الحمد لله
معرفش حد لسه محبوس منها غير زوجي الحبيب محمد محيي
الدين و احمد بدوي و جايز في اسماء تانية معرفهاش
حصلت بعد كده احداث كتير
مظاهرات محمد على و اتقبض على ناس و خرجوا
كورونا و اتقبض على ناس و خرجوا



من غير سبب و خرجوا
نخنوخ البلطجي خرج
السكري قاتل و خرج و و و
و على المستوى الشخصي كل حاجة اتغيرت اطفال كان عندهم 3 سنين محمد هيطلع يلاقينهم في اولي
ابتدائي
مامته اتوفت و اتحرم منها للابد
اتدمرنا معنويا و نفسيا و ماديا

محتاجين ايه تاني يحصلنا
كفاية كده على معتقلي التعديلات الدستورية و كل المحبوسين ظلم
التعديلات بقت من الماضي بقالها 3 سنين و كله بقى تمام و مشي على اتم وجه
3 سنين و شهرين حبس كفاية
#معتقلي_التعديلات_الدستورية
#الحرية_لمحمد_محي_الدين
<https://bit.ly/36fHBvd>

عن بيتر نشأت

الف حمدالله علي سلامتك يا مريم .. حقيقي انا واحد من الناس اللي مقدر يعني
ايه حد منك فجأة ميبقاش موجود و يعني ايه متبقاش عارف مصيره .. فا
حمدالله عالسلامة و نورتي بيتك و انا فرحتك جدا جدا
كان نفسي الهوجة اللي حصلت دي و القلق اللي حصل عالسوشيال ميديا الاقي
ربعها في مشكلة اخويا بيتر نشأت نعيم راغب المحامي المحبوس علي ذمة
القضية ٦٥ حصر أمن دولة عليا طوارئ لسنة ٢٠٢١ .. بيتر هنا مراحمش
بمزاجه اتقبض عليه من وسط اهله الفجر في مارس اللي فات و حقيقي احنا
مش عارفين مصيره ايه لحد دلوقتي .. بيتر محبوس احتياطيا و احنا مش
عارفين مصيره ايه لحد دلوقتي .. بقالنا سنة كاملة كل يوم نصحي على أمل



إخلاء سبيل او عفو .. ازاي واحد مسيحي متهم بالانضمام لجماعة إرهابية .. ازاي واحد مسيحي
يتحبس مع الإرهابيين و الاخوان و السلفيين .. ازاي واحد مسيحي يتعامل معاملة المخربين اللي في
البلد .. انا تعبت اوووي اوووي فوق ما اي حد يتوقع .. انا صحي راحت من التعب و القلق و ابوه
حرفيا المرض بياكل في جسمه و السكر و التعب و القلق محاصرينه .. يا ريس احنا كل أملنا في عفو
رئاسي و بيتر يطلع يشوف حياته و مستقبله .. حرام الشباب ده يضيع يا ريس .. حرام الشباب ده
يطلع كاره البلد ... احنا تعبان خالص .. انا شاب عندي ٣٠ سنة و مش عارف عندي ايه .. انا جسمي
كله تعبان و واجعني جدا و صحي راحت من الزعل و عمال بقاوم لكن تعبت...

ارجوكم ارجوكم كل الناس تساعدنا و توصل صوتنا لرئاسة الجمهورية و قداسة البابا و تعمل شير
ارجوكم .. بيتر محبوس بقاله سنة و اخدنا وعود كتيرة بخروجه و للأسف مخرجش .. انا بس نفسي
يطلع من السجن قبل ما حد فينا يموت .. ربنا يجيبك بالسلامة يا حبيبي .. وحشتنا اووي يا بيتر

#إفرجوا_عن_بيتر_نشأت

#بيتر_نشأت_مش_إرهابي

<https://bit.ly/36m0InC>

عن وليد شوقي
دعواتكم وصلتني.. الزيارة خلصت بدري الحمد لله وكلها دخلت ووليد بخير الحمد لله
<https://bit.ly/37oWID7>

16 أبريل

عن معتز عبد الوهاب
ببمير علينا ثالث رمضان و معتز مش معانا
يوم ٥ مايو هيكون كمل سنتين ..مش كفاية؟!
ادعولنا بالفرج
<https://bit.ly/3rAZrjY>

عن هدى عبد المنعم
على عيني يا ماما يا حبيبي
على عيني يا قلبي
انا اسفالك اني مش قادرة احميكي
FreeHoda#
<https://bit.ly/30cOzlQ>

عن محمد الباقر
زرت باقر النهاردة .. هوه كويس الحمد لله وبيسلم على الناس كلها وبيضحك وبيهزر .. وبيسألني "فيه
أمل؟ .."
قابلت قبل ما ادخل Esraa Abdel Fattah Ahmed بتزور صلاح .. وقابلت أهل حسام مؤنس لأول
مرة .. وقمة التعاسة والهزلية طبعاً أني قتلهم "فرصة سعيدة" .. وقابلت أسرة جميلة شوفتها كذا مرة
قبل كذا .. والابن النهاردة كان عيد ميلاده ال ٨ .. صغير على الهم حبيبي .. قضاه في انتظار ساعات ادم
السجن عشان يشوف والده تلت ساعة وبينهم أسوار ومسافات .. بدون حضن واحد حتى .. يا رب
يرجع كل الناس في حضن أحبابهم .. النهاردة قبل بكرا ..
#الحرية_لباقر
FreeBaker#
<https://bit.ly/37ZpWIB>

17 أبريل

عن زياد العليمي

الانتظار امام بوابة السجن تحت تاندة صفيح تزيد من الصهد!! المهم انهم معلقين مراوح في التاندة دي لكن منظر بس؛ مش شغالة، والدنيا زحمة ، مش محتاجة اتكلم عن شكل المرضى والاطفال وكبار السن واللي جايين من المحافظات. قاعد ورايا راجل كبير جاي من أسوان! مش فاهمة المجلس القومي لحقوق الإنسان بيعمل إيه بالضبط؟

<https://bit.ly/3M3NR8K>

عن هدى عبد المنعم

انهارده ياسين بيكلمني عن ماما تاني
بس انهارده كان بيعبر عن حبه ليها بشكل مختلف
لقيته جاب شنطة هدايا كانت عندنا بيضا ورسم عليها قلب أحمر وخط فيها لعبة من لعبه ونده عليا
وقالي بصي انا عملت ايه
انا رسمت قلب أحمر وخطيت هدية لتيته هدى عشان اما اشوفها اديها لها واقولها اني بحبها اوي وانها
وحشتني 😞 ..

مممكن تشيلها معاكي لحد ما تيته تيجي
يارب رُدلنا ماما يارب

FreeHoda#

<https://bit.ly/3MbNVDI>

عن محمد الباقر

في الجو الحر والهواء السخن المترب الرهيب ده .. نفتكر أن أهلنا وأصحابنا المعتقلين قاعدين في أوض
بشبابيك بدون زجاج على الخرسانة .. الحر بيحفف أجسامهم الضعيفة والتراب بيهلك اللي بيعاني من
مشاكل في التنفس .. هتجنن وأنا متخيلة باقر مفرهض وجيوبه الأنفية تعباه ومصدع .. ومفيش عنده
طاقة لأي حاجة .. كل ده لمجرد أنه محامي حقوق إنسان .. دي جريمته اللي بيتعاقب عليها من وقته
وصحته البدنية والنفسية .. كل يوم..

#الحرية_لباقر

<https://bit.ly/38NXxWq>

عن محمد عادل

أنا نفسي أحس إحساس الراحة النفسية اللي هو إن حياتي عادية، نفسي أخذ نفس من غير قبضة ف قلبي ولا كتمة ف صدري، نفسي أعيش عادي 😊 أنا مرهقة لأقصى حد، مرهقة لدرجة إني مش قادرة أعمل حاجات أساسية ف حياتي، بقيت بنسى بشكل سخيف أو بمعنى أصح بتوه، للأسف حاجات كتير محمد بيقول لي عليها ف الزيارة بتضيع من دماغي تماما، الزيارة اللي فاتت مثلا كان كل ردودي عليه ما بين مش عارفة ومش فاكرة ومش متابعة ونسيت 😊

مشاويري أنا الشخصية متأخرة بقي لها شهرين مش قادرة أعملها، تقل فظيع، شعور بعدم قيمة الأشياء والمشاورير والكلام والأفعال والتفاصيل كلها، اللي هو مهما هروح وهاجي وهتعب وهعمل يبقي الوضع ع ما هو عليه ! ما حدش متخيل ولا حد حاسس ولا حد هيحس باللي أنا بكتبه غير اللي مجرب! إحساس بالقهر والمرار لاقتراب استكمال 4 سنين ف نفس الوضع ومفيش أي ضامنة لعدم استمراريته، طيب وع المتضرر يعمل ايه؟ ينتحر؟ ولا يستنى يموت من القهر؟!


<https://bit.ly/3KXDxPq>

18 ابريل

عن موسى مضر

سنتين محبوس فيهم يا موسى من غير ذنب ولا تهمة ولا محاكمة
سنتين من عمرك اتسرقوا بين اربع حيطان بتاكل في صحتك وحياتك
سنتين من غير ما نشوفك ولا نسمع صوتك
سنتين وأولادك بيستلوا هترجع امتي ومش موجود ليه
سنتين من محاولات يائسة للصبر بس حتى الصبر زهق

<https://bit.ly/3OnOI6i>



عن محمد الباقر

باقر والسجن..
بكره السجن وبخاف منه .. بخاف من الوحدة، وبكره قلة النظافة، وبتخفق من الأماكن المقفولة، مش بستحمل الحر، بمل وبزهق بسرعة، مش بستحمل ما اشوفش شمس وسماء وألوان، وأني ما امشيش في الهوا .. مش بقدر حتى اتخيل أني افقد السيطرة على زمام حياتي .. مش بستحمل ما اشوفش أهلي، وبتجنن لما بتخيل أن حد منهم ممكن يتعب أو يموت وأنا جوا السجن ..

أنا مش عارفة باقر ازاى مستحمل الكابوس ده يومياً .. فوق السنتين ونص .. كل تفصيلة مُخيفة ومرعبة .. بحاول ما أفكرش .. وبسيبها تعدي .. وبحاول اتخيل أنه كويس وأنه مُتعامل .. وأنه هيجر قريب وهينسى كل اللي فات .. وأنا هنكمل حياتنا بنظرة مختلفة تماماً .. وهنقدر كل لحظة ونتعامل معاها بقدسية رهيبة .. لعل وعسى نعوض ملايين اللحظات اللي راحت في السجن .. احياناً الهروب ملجأ للعقل قبل القلب .. لكن احياناً بردوا كل الأفكار السوداوية بتطاردنا في أحلامنا وبتحاول تتنفس .. عشان تحميننا من لحظات الانهيار أو الانفجار .. أيهما اقرب!
#الحرية_لباقر

<https://bit.ly/389YgRH>

19 ابريل

عن عبد الرحمن طارق موكا

النهارده حاولنا نودي زيارة لموكا وللأسف قالولنا بردو انه مش راضي يخرج الزيارة ودا معناه انه لسه مضرب كمان موكا النهارده بقاله ٦٦ يوم مضرب عبدالرحمن في خطر اتكلمو عنه احنا مش عارفين نعمل ايه او نكلم مين انا مش قدامي غير اكتب هنا معرفش اخويا ممكن يكون فيه ايه جوا معرفش اصلا اذا كان فعلا مش عايز يطلع الزيارة ولا ممنوع انه يخرج احنا في الوقت اللي كلنا قاعدين مع بعض في البيوت بنتلم ونفطر سوا هو جوا معرفش بيجراله ايه ومش بياكل ومعرفش اي حاجه عن صحته
#موكا_في_خطر

<https://bit.ly/3xEryT2>

عن آل ثابت

محبوس في زنزانه انفرادي..
مش بيخرج منها الا للجلسات والزيارات فقط !
مافيش تريض! حتى دقائق في اليوم!
مش بيشوف غير سجانة مره في اليوم يدخله أكله!
ممنوع عنه كرسي!
ممنوع عنه الكتب!
نايم على الأرض!
يوميات رجل من أعمدة إقتصاد #مصر هو وابنه الوحيد!
صفوان وسيف !
كل واحد وحده في زنزانه.

<https://bit.ly/37xAUp1>

عن عزت غنيم

زوجي معروف للجميع بحسن الخلق، وكان مديراً للتنسيقية المصرية للحقوق والحريات فكان سنداً للمظلومين والمعتقلين، ويحب بلاده وكان يعمل جاهداً لرفعها والارتقاء بها في المجال الحقوقي ولكن للأسف فوجيء بالقبض عليه من أمام منزله في أول مارس 2018 وتم اقتياده إلى مكان غير معلوم حتى ظهر في النيابة على ذمة القضية 441 لسنة 2018، وفي 4 سبتمبر 2018 صدر قرار إخلاء سبيله وبدلاً من خروجه



تعرض للاختفاء القسري لمدة أربعة شهور داخل مقر الأمن الوطني بالشيخ زايد، حتى ظهر في النيابة وتم تدويره في قضية جديدة رقم 1553 لسنة 2018 بنفس الاتهامات انضمام لجماعة وتمويل، ولا يزال حتى الآن داخل السجن تم منعنا سنة كاملة من الزيارة فضلا عن الانتهاكات التي نتعرض لها خلال الزيارة أنا واولاده الثلاثة ووالدته المريضة التي تحتاج رعايته.

ابني مالك الأكبر أصبح عمره الآن 16 سنة ومفتقد باباه جنبه. مالك بيكبر كل يوم هو واخواته وهم محرومين من حقهم في أن أبوهم يكون جنبهم وهو كمان محروم من أن يشاركهم لحظات حياتهم محروم أن يطبب عليهم وقت ضعفهم أو أنه يكافأهم لما ينجحوا أو حتى يعاقبهم وقت ما يستهتروا كان نفسي ما اكتبش أن اليوم تجاوز 4 سنين في غيابات السجن كان نفسي يخرج قبل ما يتمهم جوه عزت بيدفع سنين عمره بتهمة أنه محامي مش هقول غير حسبنا الله وكفى

ربنا يردده لنا يا رب بقدرته هو الله الذي لا يعجزه شئ في الارض ولا في السماء وهو السميع العليم.

<https://bit.ly/3KYPxQE>

عن حمدي الزعيم

والذي أصيب سابقا بجلطة أثرت على قدمه.. ومريض بالسكر والضغط ونظره ضعيف جدا وهو العائل الوحيد لنا. لا يوجد دليل واحد أو أحرار في القضية المحبوس على ذمتها

<https://bit.ly/3Meqk52>



عن أحمد حسن مصطفى

في الحقيقية الكلام مش مترتب جدا وعشوائي لاقصي درجة بس في الحقيقية دة الي بفكر فيه ومبقتش عارفة اسيطر علي مشاعري وافكارى انا بقت عايشة فحالة رعب وفزع طول الوقت وافكار كثير مرعبه بخصوص احمد اخويا من وقت الي حصل مع ايمن هدهود ومرعوبة ومش عارفة افكر واتصرف ازاى والكام يوم الي قفلت فيهم الفيس محاوله مني لاي هروب في الحقيقية مبطلتش تخلي دماغي توقف تفكير في كل خطوة خطيتها وكل طريق مشيته عشان اوصل لمكان احمد وسؤال مايمكن احمد محطوط في مكان زى الي كان فيه ايمن وانا معرفش وتانيب ضمير اني مدورتش هناك, في الحقيقية انا مبقتش قادرة اتعامل مع كل الفقد ومشاعر الخذلان والتوهه الي حساها ومبقتش عارفة اعيش حياة طبيعية وسوية زي ما المفروض تكون, وبقي الامل والعشم والوقت المفروض بينقذوا الناس وببدوهم امل وطاقة يكملوا بقوا بيدبحوني ومش عارفة اي الي المفروض يحصل او اي الي لازم اعمله, وببساطة انا عايزة اخويا يرجعوا بس بعيد عن كل الحسابات الي احنا اصلا براها وملناش فيها ومش عايزين يبقي لبنا اصلا

رجعولي احمد وكفاية كدا كفاية قهر فينا وموت بالبطيئ وتعذيب فينا عشان اي مش عارفة بجد

<https://bit.ly/3vvFV9J>

عن ياسر الجارحي



#أرجوكم تدعوا له هو وكل مظلوم #ياسر_الجارحي

<https://bit.ly/3L17HBr>

عن هدى عبد المنعم

أخفي الهوا ومدامعي تبديه يا أمي
لسة فاكرة النظرة وسببها ووقتها ومكانها
كل نظراتك ليا دعم وحب وفخر
ارجعيلي يا هدهد الأيام مبتعديش والله ..

<https://bit.ly/3xH2VFc>

عن مصعب رجب

وحشنى بيتنا الى مكنش بيخلى من لمة الأصحاب فى رمضان
ووحشنى رمضان مع بابا ومصعب..
-زوجة المعتقل مصعب رجب
<https://bit.ly/37AkCLZ>



عن آل ثابت

لماذا تكون هذه المعاملة مع رمز من رموز الاقتصاد المصري ؟
لماذا يحبس ٥٠٠ يوم قيد التحقيقات باتهامات مرسله دون أدلة ؟
لماذا يسلب أبسط حقوقه فى محبسه ؟
لماذا يتم التضيق عليه بحبس انفرادي ؟
والأهم ..الى متى ؟ !
أسئلة كثيرة بلا أجوبة!
#خرجوهم_كفاية
<https://bit.ly/3v16ft2>

21 أبريل

عن خالد عز الدين

#خالد_عز_الدين_فين؟
قبل الايام دى من ٩ سنوات خالد كان معايا
٩ سنوات ما أعرفش حاله ايه ولا أشوفه ولا حتى أسمع صوته ...اللهم صبرا جميلاً ولقاء فى الفضل
والعافية عاجلا غير آجل.
<https://bit.ly/3L5etWQ>

عن وليد شوقي

اشتريت لنور هدوم العيد وجبت زرع علشان الطاقة الإيجابية.. بس العيد مش هيبكون عيد من غير
وليد 😞 فممكن تطلعوا لي جوزي ونعيد! <https://bit.ly/3OsCBEU>

عن مروءة عرفه



كأنه عازف
ماسك في عوده
م الغنوة خايف
خايف يغني
يلقى التمني
بنوتة حلوة
واقفه قصاده
بتغني زيه
غنوة زوروني
لون المراكب
راكب في لوني
خايف اعاتب
تكثر سجوني
كان لي صاحب
صاحب عيوني
اخدوه المغارب
والفجر قارب
لا سمع أدانه
يومها بودانه
ولا شاف نهاره
من سور حيطانه
من الرمل ماشي
للميرغني
ومن الشقافة
للعطارين
في الفقر قلبك
كان غني
في السجن عينك

رمضان كريم لمروءة عرفة
الرمضنة التاسعة
ريحة نسيم البحر
سينما أمير والليل
زحام كأنه نهر
يشبه نزول السيل
يمكن عيوننا اتقابلوا
بالصدفة في المنشية
ويمكن كمان اتعابوا
أو ضحكوا بالنية
بس الأكيد اتصاحبوا
في سكة الأمنية
دلوقتي باكتبلك
من ابعد مكان في الأرض
من قلب حرب بتاكل
ضحك البشر والورد
مش قصدي ازيد وجعك
ولا ازيد في حيطانك
القصدم الأول
ان القصيدة
عشانك
الأولة مروءة
طبطبتي ع المخاليق ياما بكتير فعلك
والثانية مروءة
مهما الحيطان بتضيق لازم هتوسعلك
والثالثة مروءة
ملعون أبو السجن اللي يزيد زعلك
في المكس واقف

قادر يفك
الغيمة عنك
قادر يوسع
عليك سجنك
من قدك انت
ع الخلق أرحم
رمضان كريم
بس انت أكرم

<https://bit.ly/3EC8INW>

مش مسجونين
يا مروة صورتك
في ضحك بنتك
جايين في سيرتك
كل يومين
من سيدي بشر
لسيدي جابر
خدني الكلام
ماقتش قادر

عن رؤوف خطاب

يارب جمعنا تاني وشيل الحمل من على قلوبنا وريح قلبه
بشوفة احفاده وحبائبه.. فرحنا يارب
#الحريه_لرؤوف_خطاب
#قضيه_مجلس_الوزراء

<https://bit.ly/39cRF9B>



عن خالد غنيم

ما أصعب الانتظار على أهالي السجناء والمحبوسين، الذين يعيشون على أمل خروج ذويهم بعد أشهر وسنوات من المعاناة في غيابهم، بينما يأتي شهر رمضان وتتوق إليهم مقاعدهم الفارغة على موائد أسرهم، لتعود معها البهجة الغائبة، في الوقت الذي تنشغل الأيدي بالابتهاال لعودتهم، وإعداد وجبات الإفطار لتسليمها لهم بوجوه تكسوها الحسرة، في أقرب زيارة لها خلف القضبان .



“ما أزال أنظر للباب في انتظار رنة الجرس، في انتظار طلوع شمس حياتنا، ما أزال أنتظر خروجك وعودتك لنا، فات رمضان ورمضان، وعيد وعيد وعيد، وأتمنى خروج عيدنا”، بهذه الكلمات عبرت الزميلة ماجدة عبداللطيف عن معاناتها وأسرتها في ظل غياب زوجها الصحفي والإعلامي خالد غنيم، الذي تخطى عامين في الحبس الاحتياطي حتى الآن .

737 يوماً، تعادل 17688 ساعة، قضاها غنيم محبوساً احتياطياً على ذمة القضية رقم 558 لسنة 2020 أمن دولة، حيث يتجدد قرار حبسه منذ تاريخ القبض عليه في 12 أبريل 2020 .

بداية تفاصيل حبس غنيم، كانت بعد تلقيه شكوى من 8 أطباء يريدون عمل مسحات خوفاً من إصابتهم بفيروس كورونا المستجد، حينها نشره غنيم ثم مسحها بعد أن تم إجراء المسحات لهم . تحكي زوجته أنه في أثناء مساعدة غنيم أهالي المنطقة في تعقيم الشوارع، تلقى مكالمة من ضابط شرطة يطالبه بالتوجه إلى قسم الشرطة، وبالفعل امتثل للطلب وتوجه إلى هناك من الشارع، ثم ظهر بعدها بحوالي أسبوعين في نيابة أمن الدولة

ويواجه غنيم في القضية اتهامات ببت ونشر وإذاعة أخبار وبيانات كاذبة، واستخدام وسيلة من وسائل التواصل الاجتماعي "فيسبوك"، ومشاركة جماعة إرهابية مع العلم والترويج لأغراضها .

في بداية أغسطس الماضي أتم عامه الـ 49 داخل السجن، بينما استقبلت زوجته ذكرى عيد ميلاده بتجديد المطالب بإخلاء سبيله وإنهاء معاناته ومعاناة أسرته المستمرة، خاصة مع تأكدها على أنه لم يرتكب أي جرم .

"سنتين حبس احتياطي بسبب كورونا، موجة وراء موجة، تجديد وراء تجديد، سنة بعد سنة وإحنا زي ما إحنا"، تصف ماجدة مأساة أسرتها في غياب زوجها، وتضيف متأثرة: "عمره يتآكل خلف الجدران من دون أسباب سوى أنه حبها قوي وخاف عليها، عمر منه ومننا ."

تستطرد: "بقيت وأولادي بنخاف نسأل بعض عنه، لأن الدموع دايماً تسبق الكلام، بقينا بنخاف نقول لبعض إنه اتجدد له، بقينا عايشين على أمل الخروج في أي وقت، فكرة الـ ٤ يوماً أننا تعودنا عليها إحساس مميت وأسئلة كثيرة وبعدين وياه الهدف وعمل إيه ."

"مع كل زيارة لوالده المريض أهرب من سؤاله، أصبح الكلام محفوظاً، وجملته خايف أموت وابني الوحيد مياخدش عزائي كلمات وحروف عاجزة عن التعبير عن وجع وقهر وألم مستمرين منذ عامين"، متسائلة: "فين الأخبار الكاذبة في الخبر، تعبنا من الكلام والانتظار وفقدان الأمل مع كل تجديد"، تستكمل زوجة غنيم .

وعمل خالد غنيم في العمل الصحفي منذ عام 1997 في صحف عدة جرائد مثل صوت الأمة واللواء العربي، ثم اتجه للعمل الإعلامي منذ ٢٠٠٢، وكان مديراً لحملة الرئيس عبد الفتاح السيسي في منطقة العجمي بمحافظة الإسكندرية .

تواصلت الزوجة مناشداتها لجميع الجهات المعنية، وتطالب بتدخل نقابة الصحفيين في محاولة لإطلاق سراح غنيم، وعدم الوقوف أمام كونه ليس عضواً بنقابة الصحفيين، على الرغم من عمله في الصحافة والإعلام منذ عام 99 وحتى حبسه، بين مواقع وجرائد وقنوات . وتختتم: "أمنيات أسرة طال غياب عائلها أن يكون معنا هذا العام، أملنا في الله وفي انتظار فرجه، وكلي ثقة في عدله ورحمته ."

في نوفمبر الماضي، أرسلت طفلة الإعلامي المحبوس خالد غنيم، رسالة بالفيديو بشأن والدها المحبوس، وطالبت بعودة والدها إلى أحضانها بعد غياب أكثر من عام ونصف منذ القبض عليه وحبسه احتياطياً .

وقالت الطفلة جنة خالد غنيم، في رسالة إلى والدها عبر "درب": "يا بابا أنت وحشتني أوي، كل ما أبص لأصحابي أشوف معهم أباهتهم، بيعط أوي، أنا نفسي أشوفك، ومش بقدر أعيش من غيرك ."

<https://bit.ly/3L8mBpF>

عن هدى عبد المنعم وعائشة الشاطر

يارب ثبتهم وفرج كربهم وردهم سالمين غانمين موفوري العفو
والعافية

اجعلوا لماما وعائشة نصيب من دعاءكم .

٣سنين و٥ شهور من غيرهم

٣سنين و٥ شهور منع من الزيارة

طمن قلوبنا يارب

FreeHoda#

<https://bit.ly/38gfPPX>



عن عبد الرحمن طارق موكا

فضلا وليس أمرا خرجوا قبل ما يحصله حاجة. ماتنسوش إن حياته ضاعت ولف أكثر من 7 سجون من
أول 440 وادي النطرون وابو زعل والمزرعه وطرة تحقيق وطرة استقبال والاستئناف وغير
الحبسخرانات وغير مدة التأديب اللي هو سجن جوه سجن. وتدويرة في عدة قواضي مع انه كان ملتزم
ويروح مراقبته كل يوم ومحصلش منه اي مشكله .

طاب عمل ايه؟ وليه؟ دا كله حتي رأيه بعد لما خرج من قضيه الشوري سنين سجن ماكنش بيكتبه.

مش كفايه حياته ضاعت حرفيا ومستقبله الجامعي. يا جماعه موكا بيضيع مننا ومش عارفين نقول

لمين مش محتاجين حاجة غير انه يخرج ويبقي في وسط امه واخواته في سلام 🙏

#ادعموا_موكا

<https://bit.ly/3vIk5jd>

عن معتز عبد الوهاب

مساء الخير

النهارده كانت الزيارة الاستثنائية لمعتز ، اول لَمَّا نزلت من الطفطف لقيت الناس بتسلم على بعض

بحميمية شديده ، عرفت ان اهل شخص جايين يزوروه قالهلم روحوا وهو هيحصلكم 😊

طبعا كان نفسى يتقالى زيهم

مبروك لكل الى خرجوا وعقبالنا وكل الناس يارب .

<https://bit.ly/3vCH1jU>

عن أحمد دومه

احمد دومة كان عنده زيارة النهارده، فهمت من اخوه ان في مشكلة عاجلة ادارة السجن متعنتة فيها. احمد محتاج يعمل اشعة على ايده بشكل عاجل لانه حسب كلام دكتور السجن قد يكون عنده جلطة نتيجة تركيب كانولا بطريقة غلط خلال فترة الاضراب الاخيرة. ادارة السجن بتماطل في عمل الاشعة من اسبوع !

انا بقيت حاسة انه فيه هدف بعدد امراض معين مش هيتم الافراج عن احمد الا بتحقيقه اعتقوه يا جماعة، اعتقوه مفيش كده .. مكنوش كلمتين

<https://bit.ly/36KFoID>

عن محمد الباقر

شفنوا قرار واحد فرح كام بيت!! .. طلغوا الناس لحبايبهم .. وفرحوا قلوبهم .. بدل المرمطة في المعتقلات بالسنين .. تعبنا والله

<https://bit.ly/3MsR9CK>

عن زياد العليمي

الحمد لله وبفضل دعواتكم خرجت من زيارة زياد واطمنت عليه وببسلم عليكم جميعا. كان يوم مليون بالبشارة الطيبة. اول ما نزلت من الطفطف عند سجن المزرعة لقيت مامة هيثم البنا واقفة فرحانة وقالت لي انهم ما رضيش يدخلوها الزيارة وقالوا لها تروح البيت تستنى هيثم حيحصلها. عرفت كمان ان وليد شوقي وابراهيم عز الدين ومحمد صلاح خدوا افراح وسمعت الضابط بيقول فيه ١٦ واحد خارجين من السجن النهارده. الف مبروك للجدعان اللي حيفضلوا العيد مع اهلهم وربنا يعوضهم جميعا افراح كتير عن كل لحظة ظلم. يارب بشرى خير وعقبال باقي ولادنا

<https://bit.ly/36Jlwp8>

عن محمد عادل

4 سنين إلا شهرين حبس احتياطي
جربوا تخرجوه ولو اتكلم ممكن تحبسوه تاني

Mohammed Adel

#الحرية_لمحمد_عادل

<https://bit.ly/3vK8CzE>

عن مصطفى جمال (أخلي سبيله)

حد فاطر مصطفى جمال!!
مصطفى جمال مصمم الجرافيك اللى اتسجن من 4 سنين على ذمة
قضية اغنية بلحة، و الوحيد حرفيا اللى مالوش اى علاقة لا
بالأغنية ولا بالثورة ولا بأى شئ غير أنه مصمم جرافيك و كان وثق
صفحة رامى عصام فى ٢٠١٤ ضمن فنانيين و باندات كتير مصطفى
كان هو اللى وثق لهم صفحاتهم بحكم شغله ليس الا،
مصطفى جمال فضل طول فترة سجنه من اول يوم أمن دولة مع
شادى حبش رفقاء القبضة من اول يوم لحد ما شادى صاحبه
مات قصاده على أيده فى زنانه 2/2 جوا سجن طره تحقيق،
مصطفى جمال اتدور ٣ مرات بعد موت شادى، يعنى بدل ما
الدولة تخرجه عشان يلحق يتعالج والا يتعافى والا حتى يتناسى، لا
امن الدولة بيدوره فى كل مره بيحصل فيها مصطفى على إخلاء
سبيل،



مصطفى كمان باباه توفى من حسرته عليه و معندوش اخوات ولاد، مالوش غير هند أخته و مامته اللى
فى اشد الاحتياج ليه،
اتمنى منكوش نسينا مصطفى جمال و اتمنى منبطلش نكتب عنه عشان لسه كلامنا بيفرق ولو على
المستوى النفسى،

اكتبوا لمصطفى جمال و عن مصطفى جمال قبل فوات الأوان،

#الحرية_لمصطفى_جمال

<https://bit.ly/37BQakV>

عن محمد وليد



الحرية لمحمد وليد كفايه كده بقى له ثلاث سنين يا رب يا محمد يا ابني ترجع لحضني

<https://bit.ly/3vdDFF7>

25 ابريل

عن أحمد حسن مصطفى

يارب احمد يارب يخرج ونفرح بيه يارب انت قادر تفرح قلوبنا وبيتنا ونلاقيه داخل علينا وبيتنا يفرح بعد كل السنين دى ادعوله ومنتسهوش

<https://bit.ly/3LjGdaq>

عن أحمد دومة

زرت أحمد انهاردة الحمد لله بدأ التعافي من الإضراب. أحمد عنده مشكلة في الوريد ف دراعه من الكانيولا والوريد بقالة أسبوع بيورم ويعمل كتل غريبة على طول ايده، بلغ الدكاترة وكشف عليه اكثر من دكتور ف خلال الاسبوع اللي فات اخرهم انفعل وقال لأحمد ازاى تسكت كل الفترة دي "احمد خرج المستشفى قبل المرة دي ٦ مرات" وقاله انها ممكن تكون جلطة ولازم اشعة.

أحمد من وقتها بياخد اسبرين، من 7 ايام تقريبا. وفي حد من الدكاترة قاله دي لسعه حشرة. معظمهم شايفين انه عادي ومفيش حاجة مهمه عدا آخر دكتور اللي مفروض انه دكتور متخصص أوعية دموية، هو اللي شايف ان الموضوع ممكن يكون خطير وما ينفعش يتسكت عليه.. انهاردة ف الزيارة الأمن الوطني بلغ دكتور السجن باتخاذ الإجراءات اللازمة لتشخيص وعلاج المشكلة ودكتور السجن قال انه هيثم عمل اشعة على دراعة بكرة إن شاء الله.. يارب يعملوها حقيقي كمان تم منع جوابات من الخروج وهي جوابات شخصية أحمد بينتكم فيها عن حالة النفسية السيئة .


كمان اتمنع دخول لبس صيفي، سمحوا بجزء من الهدوم يدخل والباقي لا.. مع العلم ان اللي اتمنع نفس شكل التيشيرت اللي هو لابسه بالظبط الفرق الوحيد ان اللي اتمنع نص كم واللي هو لابسه بكم.

#حرية_دومة_حقه

#الحرية_لأحمد_دومة

<https://bit.ly/3Lee844>

عن آل ثابت

أنا عايزه بابا وسيف يعيدوا معانا  كفايه بجد..

#خرجوهم_كفايه_كده

<https://bit.ly/3EM0Fhp>

عن عمرو إمام (أخلي سبيله)

عمرو امام الاسم الوحيد اللى مخرجش من القرارات إخلاء السبيل بتاعت امبارح .
رغم تأكيدات الكل أنه اسمه فى القرار وانى اللى حاصل خطأ بسيط فى الإجراءات متأملين خير أنه يخلص بسرعة . احنا لسه مستنين عمرو يبقى معناا علشان فرحة ابنه سيف اللى لابس من امبارح ومستنى عمرو يرجع ومش راضى يغير هدومه بعد ما عرف انى اخيرا هيشوف عمرو بعد سنة ونص تقريبا مشافوش من بعد كورونا..
وكذلك امى مستنية اللحظة اللى هتحضن فيها ابنها بعد سنة ونصف مشافتوش. يارب فك كربه وكمل فرحتنا يارب املنا فيك كبير ان عمرو يكون وسطنا النهاردة.. دعواتكم له



<https://bit.ly/3Mv6L8y>

عن عبد الرحمن طارق موكا

يارب موكا يخرج وصلني اخبار إن موكا فى مستشفى السجن وصحته فى وضع اسوء يارب وسط الافراجات والعفو تفتكرو الولد اللى قضى فى السجن فوق السبع سنين انا مش قادرة اعد ايام اضرايه تانى ونفسي الاقيه خارج وكل يوم اصحى اقلب شوية يمكن الاقي خبر حلو يمكن الاقي حد بيقولى إنه خرج

<https://bit.ly/3kc4lzK>

عن خالد عز الدين

اللهم انى استودعتك خالد زوجى يا من لا تضيع عنده الودائع رده لى ردا جميلا .

<https://bit.ly/37FIHkV>

عن زياد العليمي

الحمد لله وبفضل دعواتكم خرجت من زيارة زياد ، هو الحمد لله بخير اتنقل من مع هشام وحسام وبقي فى زنزانة كبيرة فيها ٨ أشخاص منهم حسن مصطفى وموكا. وببسلام على الجميع وبيقول لكم كل سنة وكلكم طيبين بمناسبة عيد القيامة المجيد وعيد الفطر المبارك، وقابلت زوجة المهندس يحيى حسين واحنا داخلين. لما خرجنا انا ومديحة حسين شفنا بنت شكلها مايزيدش عن تسع سنين مفحومة من العياط. عرفنا ان عمرها ١٢ سنة ومارضيوش يدخلوها زيارة والدها عشان مش معاها شهادة ميلاد. ووالدتها اضطرت تدخل لوحدها! حسبنا الله ونعم الوكيل وربنا يحرق قلب كل اللى يحرم حد من ضناه او يبعد حد عن أهله <https://bit.ly/3MAjqgQ>

عن محمد الباقر

رجاء حار والله ﷻ

البلد كلها فتحت .. مفيش شبر في مصر مقفول عشان كورونا غير السجون .. مطاعم ومحلات ومولات وسينمات ومسارح ومعارض وفنادق ومدارس وجوامع وكنائس ونوادي الخ .. ما عدا السجون!!! لو خايفين على باقر مننا طعموه! .. احنا طلبنا نطعم باقر ولحد دلوقتي ما اطعمش .. ورفعنا قضية نطلب نطعمه واتفضت! مش معقولة اشوف جوزي ٢٠ دقيقة مرة كل شهرين أو ثلاثة .. أنا بروح شهر .. ووالدته شهر .. وأخته شهر .. يعني بشوفه فعلياً مش أكثر من ٦ مرات في السنة شامل الزيارات الاستثنائية .. حسب لايحة السجون مفروض اشوفه لمدة ساعة كل أسبوعين .. أنا تعبت من الكلام عن إخلاء سبيله .. لكن اضعف الإيمان أني اشوفه .. أنا جبت آخري بجد .. النهاردة حتى العشرين دقيقة زيارة مش عارفة اتهنى بيهم .. بعد ١٠ دقائق بدأ يتطلب مني امشي عشان فيه زيارة رسمية للسجن! بجد ما حدش حاسس بينا .. أنا عايزا اشوف جوزي !

#الحرية_لباقر

<https://bit.ly/39enAX3>

عن عبد الرحمن طارق موكا

النهارده اليوم ال ٧٢ لاضراب عبدالرحمن انتو متخيلين الرقم انا التفكير فإنة لسه مضرب لحد اليوم دا بيحسني اني هتجنن وكنت عماله اقول لنفسي يارب يكون فك الاضراب يارب ميكونش لسه مضرب للنهاردة وبما انه مش ليخرج في الزيارات ولا إدارة السجن بتطمنا عليه انا فعلا مكنتش اعرف هو لسه مستمر ولا لا لحد ما عرفت النهارده انه لسه مستمر وانه الزيارة اللي فاتت ما امتنعش بس إدارة السجن هي اللي تعنتت معاه موكا مقدرش يخرج على رجله لان كان تعبان بسبب الاضراب والظابط مرضيش يخرجة على كرسي بعجل وطلب منه يخرج على رجله ولما مقدرش منع عنه الزيارة علشان طبعا منعرفش انه واصل للمرحله دي مش عارفة المفروض اقدم شكاوي تاني فين ولا اعمل ايه خرجو اخويا هو مش ناوي يتكلم ولا احنا عايزين اكثر من وجوده وسطنا انتو مستنيين يموت جوا مين المسؤول عن التعنت دا في وجود موكا جوا من غير تهم وفي الوضع الصحي دا وهينتهي امتي تصميمه على تدمير حياته ؟

#موكا_في_خطر

#الحرية_لموكا

<https://bit.ly/38vYdQI>

27 ابريل

عن هدى عبد المنعم

ماذا لو ماما طلعت ؟ !

ست عندها ٦٣ سنة

حرفيا مبقتش تقدر تتحرك
عندها جلطة في رجلها
كليتها اليمين واقفة والشمال شغالة بالعافية
حرفيا صحتها في الارض
في ظل الظروف الصحية الي مصر والعالم كله فيها
هي لما تطلع هنحاول نعالجها قدر المستطاع وهي هتقعد وسطنا نخدمها ونخلي بالننا منها وبس مش
عاوزين اكر من كدة
<https://bit.ly/3vOhbJO>

عن محمد عادل

صباح الخير
أنا عندي زيارة النهارده، أتمنى تكون آخر زيارة، ومحمد يعيد معنا، عارفة إنه صعب بس مش بعيد ع ربنا.
عاوزه أقول شكراً لأي شخص يببذل مجهود -بأي طريقة- لخروج سجناء الرأي، إنقاذ إنسان من السجن بمثابة إخراج من قبر حرفيا بدون مبالغة، فأني مجهود لأي شخص بأي طريقة يستحق الشكر.
ولحد ما ربنا يفرجها ع الجميع، أرجو رفع السلك من الزيارة وعودتها أسبوعية بدل شهرية، وعودتها ساعة حسب اللائحة بدل من 20 دقيقة، كفاية إجراءات احترازية!
<https://bit.ly/3KypBdT>

عن عمر محمد علي

لكل من يحمل لعمر ولو ذره واحده من حب او تعاطف أو شاف البوست وهو معدى يدعى له دعوه من القلب لعلها تكون الليله وتستجاب الدعوه ويبقى معنا قريب كفايه 7 سنين ضاعو من عمره وهو لسه يببداً.
<https://bit.ly/3kmX8wQ>

عن عمرو إمام

كنت في زيارة استثنائية لعمر والنهاردة. هو بيسلم على الكل وبيقولكم كل سنة وانتم طيبين وبيتمنى يقولها لكم بنفسه بره..
بيبارك لكل واحد خرج وبيقول عقبال الكل وهو مكنش عنده جديد وانفاجيء بعدم خروجه.
مبسوط جدا من الخطوات اللي بتتاخذ حاليا علشان خروج الناس ونفسه يفرح بخروج الناس كلها ودى اهم حاجة عنده .
عمر والحمد لله كويس صحيا ونفسيا ومازال متمسك بالأمل ونفسه يعيد في وسطنا ومع سيف ابنه وأمي .
واكيد احنا كمان بنتمنى وكلنا أمل أنه يعيد في وسطنا وتكمل فرحتنا.

عمرو ببشكر كل الناس على مشاعرها الجميلة اللى وصلتهاله كلها وبببارك لكل الناس على حريتها..وبيطلب منكم دعواتكم له..


<https://bit.ly/38AupC9>

عن معتز عبد الوهاب

“النهارده كنت بزور معتز المرة الثانية في أسبوع وده مش العادي، بس الزيارات الاستثنائية الفتره دي علشان الأعياد، هو كويس إلى حد ما ونفسه يطلع .”
“قالي وحشاني الحرية ووحشوني الولاد ونفسي أكون معاهم على العيد وكلام كتير عن الأبوة، معتز أب عظيم مش علشان أخويا وأكثر من أبويا، بس هو فعلا أب عظيم، ممكن معتز يقضى العيد مع ولاده .”
“أي حد يقدر يساعد إننا نكون مع بعض في أقرب وقت ياريت ميتاخرش عن ده، أنا عارف ومتفهم جدا إن لو حد في إيده حاجة أكيد هيعملها، يارب تكون آخر زيارة .”
“أنتقدم بالشكر لكل من دعمني وساندني خلال الفترة الماضية من الزملاء السينمائيين، وأتمنى أن أتمكن قريبا من نيل حريتي وأن ينال السينمائيين ما يتمنونه من نقابتهم .”

عن إبراهيم عزب

#من_ذكريات_العشر_الواخر
🕌 وكانت هذه الليلة هي ليلة ٢٧ رمضان 🕌
❤️❤�
كتب الاستاذ أحمد سيف الإسلام عن اخي ابراهيم عزب...
منذ ما يقرب من عشر سنوات
و في العشر الاواخر من رمضان ،
رأيت ابراهيم عزب في مسجد السلاب بالمنصورة
كان صغير السن يتمني ان يدخل كلية من كليات القمة ،
منير الوجه ، مؤدبا ،



عليه امارات التوبة ،
عينه دامعة براقه ،
كانت الكلمة يومها في التراويح عن قيام الليل ، و اثره في حياة الناس و الاتصال بالله عزوجل ، و همة الصالحين في هذه الطاعة ،
اثناء السحور ، جاءني ابراهيم ، و قال لي
اريد ان أكون مثل عثمان بن عفان الذي ختم المصحف في ركعة ،
تعجبت من همته علي صغر سنه ، فقد كان وقتها في الثانوي و قلت له حاول ، وابدأ،
وانا تخيل انه تاثر لحظي سرعان ما ينقضي ،
في اليوم الثاني لم اجده في التراويح ، و بينما امشي في احداركان المسجد ، وجدته يصلي في ركن وحده ،

قلت لعله آثر الخلوة ،
انتهت التراويح ، ومرت ساعتين ، وبدأ التهجيد ، وهو مازال كالوتد يصلي ،
وانتهي التهجيد في المسجد ، وكان المسجد وقتها ممتلئ عن اخره ،
وهو مازال يصلي ،
فلما قارب الفجر ، بعثت من يقول له ان الفجر بعد دقائق ، وانه من السنة السحور ، وان في السحور
بركة و ان الله عز وجل يصلي علي المتسحرين ،
فسلم ثم قال لي : وصلت للجزء الثالث والعشرين ، في ركعة واحدة ،
كان حزينا لانه لم يختم رغم انه وقف من اول الليل ،
قلت له حاول مرة اخري ،
فحاول مرة ثانية و ثالثة ،
و لكن هذه المرة وجدت كثير من الشباب فعلوا مثل ما فعل ،
وجدت أركان المسجد قد وقف فيها الشباب في خلوة ،
الكل يبحث عن أماكن لا يراه فيها احد ، ليصلي لربه وحده ،
في ليلة من الليالي الوترية الاخيرة ،
وقبل الفجر بدقائق وجدته متهللا ، فرحا و قال
لقد ختمت و الحمد لله في ركعة ، ومن بعدها وجدت كثير من الشباب في هذا المسجد يفعلها ،
ابراهيم عزب دخل كلية الصيدلة ،
أخذ إعدام ضمن مجموعة الشباب الذين حُكم عليهم في الايام الماضية
ووالله
ما علمت عليه الا عابدا مؤدبا ، محبا للخير ، متحمسا للدين
اللهم فرج كربه ،
وازل همه ،
واجعل كل بلاء قضيته له خيرا
#6_مظالم
#إعدام_برئ
وحشتني يا ضني قلبي وحشتني ، يارب رجعهولي سالم يارب رجعلي حضن اخويا يارب
<https://bit.ly/39oJSFM>

عن أحمد حسن مصطفى
في الحقيقة الكام يوم الي فاتت كدا قدروا يردوا فيا روجي شوية فرحتنا بخروج الناس وانهم في احضان
اهاليهم وحبابهم عظيم لدرجة انها هونت الوجدع الي جوايا كل الاحضان والمحبة والفرحة دي عملت
فيا كدا فمش متخيله اي ممكن احساسي لما اشوف احمد واخده في حضني عماله بفكر فاحساسني
وقتها هيبقي عامل ازاى اتمني تدعوا لاحمد ومنتسوهوش ادعوله انه يبقي معايا وفي حضني فاقرب
وقت ، واتمني اي حد عنده مقدره انه يساعدني انه يرجع هكون ممنونه جدا
طالت الغيبة اوى ياصغرن
<https://bit.ly/3OU9MI4>

28 أبريل

عن محمد الباقر



Sarah El- Baker

2 hrs · 🌐

...

رحت اشوف باقر اخي الحبيب النهارده بعد كام شهر و بغض النظر عن التفاصيل ما دخلتش ، فا رحنا و اخذ بعضي و رحنا زرت بابا حقيقي من كتر الاحاسيس المخبطة جوايا مش عرفه اتكلم "يارب دنيتك حلوه اوي بس انا الي مش عرفه اعيش فيها" .

سارة أخت باقر النهاردة ..

#الحرية_لباقر

<https://bit.ly/3KtxCAC>

عن آل ثابت

يوم ١٦ ابريل رحنا للنائب العام، سلكت مسلك قانوني شرعي بطلب لكل من بابا وسيف انهم يخرجوا حتى ينتهي التحقيق. عايزه أراعي ابويا اللي عنده ٧٦ سنه في بيتي.

بجد خايفه عليه وعلى صحته!

و طلبت سيف يطلع لبيته من محبسه (احد اشد و اسوء سجون العالم) مازلت منتظره الرد.

#خرجوهم_كفايه_كده

<https://bit.ly/3vQpfK9>

عن محمد الباقر

جواب لباقر قبل العيد..

حبيبي .. مش متخيل قلبي بيرفرف ازاى مع كل قرار إخلاء سبيل .. ومعنوياتي كانت في السما مع قرار العفو عن حسام مؤنس .. وحسيت أن يا رب تبقى معايا قريب .. ونفسي حد قلبه يحن علينا ويخرجك ليا .. وفرحتي وقتها مش هتساع الأرض .. وقلبي بيطير من الفرحة من مجرد تخيل أنك ممكن تطلع جنبي زي اللي طلعتوا ..

أنا تعبت أوي، أنا بحاول كل مرة اضحك واهزر معاك في الزيارة، وبحتفظ بتأثير الزيارة كام ساعة بعدها .. لحد ما ادخل البيت من ثاني لوحدي .. يلا اطلع بقي .. ونخلف عيال ويطلعوا عينا في تربيتهم ونشتكي منهم زي كل الناس ما بتشتكي من عيالهم .. أنا نفسي جداً في حياة روتينية مملة زي كل الناس

.. اللي همه بيصحوا يفطروا مع بعض ويروحوا الشغل من ٩ إلى ٥ ويرجعوا يتغدوا مع بعض ويتفرجوا على التلفزيون مع الفشار واللب .. وفي الويك اند يزوروا أهلهم ويخرجوا مع أصحابهم ويروحوا السينما ويعملوا شوبنج ويجيبوا الطلبات من السوبر ماركت .. ويسافروا السخنة والساحل مع أهلهم وأصحابهم .. وكل يوم يبقى شبه اليوم اللي قبله .. أعصابي تعبت من الاكشن حقيقي .. نفسي اقضي اجازتي الأسبوعية في مكان مختلف عن ادم السجن عشان اسيبلك شنطة اكل .. نفسي تبقى قعداتي مع والدتك فيها حوار مختلف عن أنها بتعيط على والدك اللي توفي بعد اقل من ٣ أسابيع من حبسك .. وسبتوها أنت ووالدك لوحدها مع أختك .. يلا اطلع بقي ونجيبها تقعد معنا هيه وأختك ونشبع منك كلنا .. سارة أختك ووالدتك كل ما يتخنفوا وحبستك تضغط عليهم .. يروحوا يزوروا والدك في المقابر ويدعوله ويفضضوا معاه .. ما أنت وعمو الله يرحمه كنتم سندهم الوحيد في الدنيا .. ربنا يرجعك لينا وما يفرقناش تاني ابدأ .. هدلعك وااكلك لحد ما ترجع تربرب من تاني .. وهقعدك في البلكونة وادم البحر لحد ما لونك الأسمر الحلو ده يرجع تاني .. أنت بس اطلع وأنا مش هخرجك تاني من البيت لحد ما اعوض كل الايام والسنين اللي اتحرمت فيهم منك .. كفاية اننا داخلين على ٣ سنين محرومة منك وقاعدة بكلم نفسي لوحدي في البيت لما هتجنن .. وبعد شعرات شعري الأبيض اللي بتزيد كل يوم من غيرك .. ونفسي الزمن يقف لحد ما تخرج .. عارفة أنها جملة متكررة .. بس لأول مرة أحس بيها كانت لحظة حبسك .. بحبك اد وسع الكون .. ومفتقدك فوق ما عقلك يتخيل .. أحضان كثير جداً جداً لحد ما نتقابل من تاني ..

مراتك

#الحرية_لباقر

<https://bit.ly/37OWk1c>

29 ابريل

عن أنس البلتاجي


أنس منسي...أو هناك تعمد لعدم ذكر اسمه ..رغم أنه معلوم أن أنس ملحقش يشارك في المشهد السياسي..أنس مغيب من صفحات الناس .. تخرجاً من لقبه..يتم تجاوزه دائماً لا يحضر في حديث أحدهم..

اسمه مش موجود وسط دعوات الناس و الكلام عن (كفاية كده) عدد سنين حبس...

السنة التاسعة لأنس في الانفرادي..

#الحرية_لأنس_البلتاجي

<https://bit.ly/3KvTkDZ>





قبل ما رمضان يخلص ..
محمد أخويا بدأ تاسع سنة ليه في السجن من شهرين .. تاسع
رمضان يعدي عليه في السجن .. عيل عنده 16 سنة لا لحق
يبقي عنده فكر أصلاً ولا عرف يعني إيه إخوان ولا سياسة و
نزل يتنطط في المظاهرات زي كل الناس وقتها .. غلط ؟ 8
سنين من عمره عدو في السجن مش كفاية عليه تعرفه
غلطته!

داق فيهم ال مفيش جبل يتحملة .. تعذيب وبهدلة وممرطة
في سجون مصر كلها من برج العرب للمنيا للمنصورة للزقازيق
للعاشر لظرة ..

نفذوا حكم الإعدام في أحمد أخويا وعرف وهو في السجن من الطباط والعساكر وبعدها خدوه ورموه
سنة و3 شهور في أمن الدولة بعد ما كان خلاص خارج بعد أيام بعد ما قضي حكم ظالم بخمس سنين
ظهر علي قضية جديدة وقضي شهور وبعدين إخلاء سبيل وخلاص هيخرج اتعمله قضية جديدة و
لسه بينزل فيها لحد دلوقتي..

محمد مشافش الشارع بقاله 8 سنين وشهرين .. دخل السجن عيل في تانية ثانوي دلوقتي زمائله
خلصو جامعة واتجوزو وخلفو واشتغلو وسافرو وشافو حياتهم وهو محلك سر..
أنا معرفش المفروض نقول لمين ومين يسمع و يغير أي حاجة في وضعه .. غلطنا ودفعنا التمن غالي
أوي والله وخلاص مش عاوزين حاجة من البلد دي غير إننا نعيش في حالنا ..
ربنا يكتبلك فرج ومخرج يا محمد يا حبيبي ويعوضك عن سنين عمرك ال فاتت خير يارب وما يتعاد
علينا رمضان غير وانت معانا في نصر وكرم من ربنا يارب..
تذكروه في دعواتكم يا كرام عسي ربنا يتقبل يارب ..

<https://bit.ly/3Lzepid>

عن عبد الرحمن طارق موكا

من اقبح الايام التي يمر بها المعتقل في السجن..، هي ايام العيد يُقفل التريض بالكامل وتشد الحرسات
والتفتيشات .

وكل هذا شيء عادي بنسبة للسجين، فالالم الحقيقي هو الفراق فراق العائلة والاصحاب واللمه ومراسم
الاحتفالات، السجين يموت بداخل نفسه في هذة الايام ويقضيها نوم وبكاء، ويظل الجرح باكمل الالم
داخل الجسد حتي تمضي ايام العيد والمناسبات، ومع اخر زيارة لاهله ان كان يزور، لان هناك
ممنوعين من الزيارة، (يسال الاهل عملتوا ايه في العيد)
العقل كله خارج اسوار السجن الجسد بيتالم جوه

وعشان كدة موكا وغيره من سجناء الراي الاضراب عن الطعام والجوع اهون الف مره من ضياع حضن
واحد من الاهل والاصحاب اهون انه عمره يضيع بحياة مع ايقاف التنفيذ وعمر بيكبر ومفيش حياة
يعني موكا نفسه يرجع حضن امه ويشغل ويكمل دراسته. وعلاء نفسه في حضن خالد. وباقر نفسه

اكيد لكل ما سبق ومحمد اكسجين ودومه وشريف نفسه يربي العال ويلبس الجلابيه ويتصور في العيد،
ايوه كل واحد نفسه في حزن وذلك ابسط الحقوق .
اطلقوا ساح المكلومين ارجوكم والله لا نريد شئ الا الحريه..
<https://bit.ly/3MJpBsD>

30 أبريل

عن محمود المخزنجي

ممکن محدش يبعث معايدات، لان مفيش عيد عندنا
#الحرية_لمحمود_المخزنجي
<https://bit.ly/3F9GRot>

عن أيمن عبد المعطي

في آخر ليلة في رمضان متنسوش أيمن من دعاءكم
ادعوا له يعيد وسطنا بعد اكثر من ٣ سنين ونص غياب
<https://bit.ly/3Kz9LQ6>

عن أسامة ياسين

أتعلمون كيف يكون الحب خلف الأسوار؟
يحب أن يرانا أبي في حال جيد، فيدقق فيما نرتدى يوم الجلسة، إذا أعجبه ما رأى، علم أننا بخير،
فيطمئن أن في غمرة الآلام، لازال لأنفسنا رصيذا من الاعتناء.
فأقوم بكى حجابي جيدا وأختار ألطف ثيابي، وأرتدى حلية تلمع قليلا، علّ بريقها يعبر الزجاج العازل
بيننا، فإذا رآها علم أنني "تأنتكت" له.. ولا أكحل عيني فلا يلطخ وجهي دمع الشوق فيظن أن حزن
الفراق قد أكهلني، حتى وإن صح ذلك. يصل الأمر إلى أننا قد نذهب خصيصا لشراء ثوبا جديدا قبل
رؤيته، كأن رؤية أبي عيد.. وهي كذلك .
الحب شعلة لا تمكث حيث أوقدت، فلا السجنان يخمدها ولا الأسوار، أما الوقت والمسافات
فيلهبانها، فيكن الوصال أينما وكيفما.. يصل عبر لغة اختلقناها دون قصد كآلية للبقاء، أو زهرة صنعت
بمناديل ورقية .
لا أسمع من أبي كلمة أحبك.. لكني أراها في عينيه، في لهفته فور وصولنا جلسة المحكمة، في ابتسامته
وهو يحدق في ملامحنا، وحين يشير ابهامه علىّ، ثم يشير إلى قلبه، ثم عقله.. فسريعا ما تهرب الدموع
من عيني لتقول له نفس الشيء.. أنه بقلبي، وأنه بعقلي.. وأنه بعد فضل واسع من الرحمن.. قوتي
وأملی..
لا أراي الله فيه سوءا، لا حرمني حبه ورضاه.. لا حرمني الله منه ..

<https://bit.ly/3vUBNAi>

عن عمر محمد علي

عيدنا يوم رجوعك يا حبيبي..

خارجة أنا وسما بنشترى طلبات وسمعنا واحده بتقول رايحه تشتري لبس العيد.. سما قالتلى أياه ده هو لسه فى حد بيشتري لبس العيد يا ماما قولتلها أياه ده هو فى عيد أصلا.. اكتشفت أن احنا عايشين فى عالم تانى خالص منعزل بقالنا 7 سنين كل أحداثه بتدور حوالين السجن والزيارة.. عمر اعتقل من 7 سنين اخواته كانوا اولى وثالثه إعدادى ودلوقتى هما فى الجامعه مرت بيهم السنين دى معايا بين زيارات السجن وانعزلنا عن العالم بعالم آخر مختلف تماما بس تعبنا.. راضين بقضاء ربنا الحمد لله بس فعلا تعبنا.. ياريت لو أى حد يقدر يوصل صوتى لأى حد من المسؤولين صوت أم قلبها موجود على ابنها الى مالوش ذنب فى اى حاجه وماليش غيره أنا وأخواته البنات.. يارب فرح قلبى وقلب أخواته برجوعه ليينا يارب.

<https://bit.ly/3s384Us>

عن معتز عبد الوهاب

انت العيد بالنسبالنا ❤️

انا استنيتك اول يوم رمضان ومستنيك اول يوم العيد ، نفسى متبقاش الزيارة الاستثنائية بتاعت العيد ، نفسى تكون انت الى جاى مش انا ، نفسى مروحش هناك تانى ، نفسى البس القميص الابيض بتاعى الى بحبه ونخرج سوا ونهزر ونضحك ونسمع مزيكا ونتخايق وتقفش عليا واجى اصالحك وابوسك ، نفسى!
مممكن !

<https://bit.ly/38CaMCL>

عن محمد الدويك

محمد الدويك
اخفاء قسري ٩ شهور وخمس أيام
عمر الصورة ٩ شهور و ١٠ أيام - فى العيد
محمد زوج وأب لطفل ٦ سنين بيسأل كل يوم: بابا فين؟ وليه
بطل يجي؟ وجاي تانى امتى؟ طب مينفعش أروح له أنا؟

<https://bit.ly/3KxceKI>



عن زياد العليمي

الحمد لله وبفضل دعواتكم خرجت من زيارة زياد وهو يبسلم على الجميع ويقول لكم كل سنة وانتم طيبين. واهم حاجة انه طمني على صحة موكا وانه بيتعافى بعد وقف الاضراب لكن طبعا صحته لسة تعبانة، ربنا يتمم شفاه على خير. بس اتوترت شوية لاني شفت الجميلة عن علاء عبد الفتاحجاية هي ومنى، ومنى كانت مخضوضبة وقالت ان مامتها تعرضت لاغماء في الشارع. وكانت ليلى استردت وعيها وبقت كويسة بس قلقانة على خضة منى اللي كانت عمالة تكلم ناس عشان حد يقعد مع مامتها لغاية ما هي ادخل الزيارة وتظمن على علاء. ودخلت الزيارة ويلتهم، وخرجت مالقيتها. لكن اطمنت على ليلى وماعرفتش زيارة منى عدت ازاي

<https://bit.ly/3LETavI>

عن جعفر الزعفراني

ابني جعفر ابراهيم خليل عمر بريء بشهادة مذكرة نيابة محكمة النقض اسفل البوست الذي اعدت نشره

- ثمانى سنوات وست وعشرون يوما محبوس ظلما وعدوانا
- اللهم فرجك العاجل في هذه الايام المباركة لابني جعفر وكثيرين أمثاله داخل سجون الظلم والقهر والتشفي والانتقام.
- تم القبض عليه يوم ٤ من مارس عام ٢٠١٤ وتم إخفائه قسريا حيث تعرض للتعذيب.
- ثم حوكم أمام ناجي شحاتة في محاكمة شهودها جميعا من أفراد الشرطة الذين كانت إجابتهم جميعا على اسئلة المحكمة أو المحامون ،لا أتذكر وأحيلكم إلى ما قلته في أوراق النيابة.
- ولم يسمح لشهود النفي بالحضور ، وانتهى بصدور المؤبد على جعفر يوم ٢٢ من شهر اكتوبر عام ٢٠١٧.
- تقدم أ.د محمد سليم العوا بالطعن إلى دائرة النقض بتاريخ ٢٠١٧/١٢/١١ وقدمت نيابة النقض الرد على مذكرة النقض بمذكرة رفعتها لمحكمة النقض تؤيد فيها ما ورد بمذكرة نقض الحكم الذي قدمه د. العوا لذات المحكمة ، مطالبة المحكمة بالحكم بالبراءة لجعفر أو إعادة محاكمته بسبب ما شاب حكم محكمة الجنايات من بطلان.

لأن محكمة الجنايات بنت حكمها ليس على ما استقر في عقيدتها التي كونتها من تلقاء نفسها بناء على ما أمامها من أدلة.

لكنها بنته فقط على تحريات جهاز الشرطة الذي لا يقوم بذاته دليلا على ثبوت التهم.
• ولكن محكمة النقض لم تلتفت لشيء من هذا ورفضت الطعن وقضت بتأييد المؤبد على جعفر وكل من معه في القضية.

• اللهم عجل بفرج المظلومين واربط على قلوبهم وقلوب أهليهم
• اللهم عجل بعقاب الظالمين عقابا يشفي صدورنا ويطفى نار غضبنا ويخفف من آلام معاناتنا ، اللهم كف أبصارهم وشل أيديهم وابتليهم بأشد الأمراض وأكثرها ألما ، وأرنا فيهم عجائب انتقامك في الدنيا ثم في الآخرة، اللهم أحصهم عددا وأقتلهم بددا ولا تغادر منهم احدا ، وأحنهم اليوم أو غدا .
#الحرية_لجعفر

<https://bit.ly/3yczefw>

عن هدى عبد المنعم



كل سنة وانت طيبة يا ماما
والله مكسوفة اقول وانت طيبة وانت في الزنزانة يا ماما
يا ماما وحشني العيد معاكي ؟ !
انا نسيت اصلا العيد كان عامل ازاي وانت موجودة
يا ماما العيد استحالة يكون سعيد الا وانت موجودة فيه
يا ماما يارب ترجعلنا بالسلامة يا ماما
يا ماما وحشتني كلمة يا ماما
يا ماما انا عوزاكي ترجعي يا ماما
يارب رجعلنا
بقدرتك يارب خليها تعيد معانا
ليس عليك بعزيز يارب
فرحنا يارب

FreeHoda#

<https://bit.ly/3ycpsdl>

عن أمين الصيرفي



كل سنة وانت طيب يا حبيبي، تقبل الله صيامك وقيامك وجهادك وصالح أعمالك ❤️
وحشتنا ووحشنا العيد وطقوس العيد معاك
بكره هيكون العيد ال 19 اللي بنقضيه من غيرك، وانت بتقضيه لوحده في زنزانة انفرادية مساحتها 10
شهر * 14 شهر في #سجن_العقرب سئ السمعة.
ولكن يقيني بالله بأنه سيجعل لك وإخوانك مخرجًا من حيث لا نحتسب، ويقر أعيينا بك وأنت في
أتم صحة وأسعد حال، ويجمع شملنا بك عاجلاً غير آجل.
<https://bit.ly/3vAu1fN>

عن أحمد دومة



من ٦ سنين، القاضي يقول لأحمد دومة أصل انت مستفز، علشان أحمد طلب من الضباط اللي
اعتدوا عليهم انهم يفكوا الكلابشات شوية عشان زانقة علي ايديهم، فالقاضي قاله إن ده حقك بس
حق تافه ف أحمد قاله انا محكوم عليا ب ٣١ سنة والحق اللي انت شايفه تافه عشان انت حر لكن أنا
مسلوب الحرية لو العربية اتقلبت علي الأقل أحاول أنجو بحياتي
<https://bit.ly/3vYM8Lp>

عن آل ثابت

ليه؟!؟!!

يوافقوا علي دخولنا زيارة #العيد

يسيبونا ننتظر ٤ ساعات!

يرجعوا في كلامهم ..

'مش هاينفع تدخلوا النهاردة!'
إحنا قلقانين علي بابا و سيف!!
#خرجوهم_كفايه_كده
<https://bit.ly/3s6hcYJ>

عن معتر صبيح



#حلم
إني اروح الزيارة النهاردة الاقيهم بيقولولي ابنك خرج .. خد أمك وروح يامعتر ..
<https://bit.ly/38IsTh6>

2 مايو


عن ياسر الجارحي

لسه خارج من زيارة ياسر.. ودي أول زيارة بعد ما السلك والحواجز اتشالت امبارح.. مهما قلت مش
هاقدر أوصفلكم فرحة وسعادة الناس بإن السلك إتشال.
عارفين يعني تاخذ حبيبك اللي رايح تزوره في حضنك وتقعده معاه وشك في وشه وشايفه وإيدك على
كتفه؟؟ تفاصيل كثيرة فرقت مع الناس.. انت وهو مع بعض لحم ودم وروح بدون حواجز.
شكرا جدا جدا للي أخذ قرار شيل الحواجز.. وياسر يبيلغكم كلكم السلام وببشكركم جدا على دعواتكم
ليه.. يا رب الفرج.. يا رب
<https://bit.ly/37cL5PO>

عن مصطفى النجار

سهيل النهاردة صلي العيد لوحده
وكان نفسه يصلي مع بابا
عيدنا مؤجل حتى يعود بابا
رجعوا مصطفى لسهيل
ده حقه وحق اى طفل ان باباه يكون معاه
ليه ابني يتحرم من ابوه
#مصطفى النجار فين ؟

<https://bit.ly/3kyb0nW>



عن أحمد دومة

كُل سنة وانت طيب يا صاحبي، كل سنة وانت لسه بتضحك
ويارب تكون وسطنا قريب.. احنا حاسين انها ممكن تحصل ..
عيدك ال 16 بعيد عنا.. لكننا بنقول يارب ♥

<https://bit.ly/3vRlFze>



عن أيمن أيوب


أخي أيمن عساك بخير في القبو الذي أخفوك فيه ليحجبوك وأخبارك
عنا، فالعيد هذا العام يأتي مواكباً ليوم مدهامة قوة من الجيش منزلك
منذ ٧ سنين في ٢ مايو ٢٠١٥
عيدنا سيكون عيد حقاً وقتما تكون بيننا
#أيمن_أيوب_فين

<https://bit.ly/3OYLICM>



عن آل ثابت

الواقع: 514 يوم لصفوان ثابت و 453 يوم لسيف ثابت و ثالث عيد
لهما و هما في محبسهما الانفرادي ..
التاريخ سيسجل هذا الواقع لأبنائنا ..
ندعوا الله ان يرفع الظلم عنهم
<https://bit.ly/3vDcQua>



عن أحمد صبري علي ناصف

“أستغيث بسيادتكم للتدخل العاجل وتنفيذ قرار الإفراج الصادر لابني، الذي تم إلقاء القبض عليه
عندما كان عمره ١٨ عامًا، وما يزال محتجزًا منذ ٥ سنوات رغم صدور حكم محكمة يثبت عدم تورطه
في القيام بأي جريمة يعاقب عليها القانون.”
“تم القبض على ابني بتاريخ ١٨ يناير ٢٠١٧، ولم أستطع التواصل معه أو معرفة مكانه إلا في ١٩
فبراير ٢٠١٧ عند ظهوره في نيابة أمن الدولة العليا، والتي حققت معه على ذمة القضية ١٤٨ لسنة
٢٠١٧، واتهمته بالانضمام إلى جماعة إرهابية، وأمرت بحبسه احتياطيًا.”
“في ١٣ مارس ٢٠١٩ صدر قرار بإخلاء سبيل أحمد، لكن مع الأسف لم يتم تنفيذ القرار، وظل
محبوسًا، ومرة أخرى أصبحنا لا نعرف عنه أي معلومة، حتى ظهر من جديد في نيابة أمن الدولة
بتاريخ ٧ يوليو ٢٠١٩، ووجهت له النيابة الاتهام نفسه، لكن على ذمة قضية جديدة برقم ٧٥٠ لسنة
٢٠١٩، وظل أحمد محبوسًا احتياطيًا على ذمة القضية الجديدة، حتى أمرت نيابة أمن الدولة بإخلاء
سبيله في ٢٦ سبتمبر ٢٠٢١، وللمرة الثانية لم يتم تنفيذ قرار النيابة، ليظل محتجزًا في قسم الشرطة.”
“في ٣٠ أكتوبر ٢٠٢١ فوجئت بعرض ابني على نيابة المرج التي حققت معه في قضية جديدة بتهمة
الانضمام إلى جماعة إرهابية وحيازة وإحراز طلقتين – علمًا بأن أحمد لم يخرج ولم يتم تنفيذ قرار
إخلاء سبيله – ثم أحيلت القضية الجديدة إلى محكمة الجنايات.”
“في ١٧ أبريل ٢٠٢٢ حكمت المحكمة ببراءة ابني من كل التهم المنسوبة إليه، وعليه تم ترحيله إلى
قسم الوايلي بالقاهرة تمهيدًا لتنفيذ قرار الإفراج عنه، ورغم انتهاء جميع إجراءات خروجه، لكن قرار
الإفراج لم يتم وما يزال أحمد محتجزًا دون أي سبب معلن، وأصبحت للمرة الثالثة، محرومة من
التواصل مع ابني لأنني لا أعرف مكانه.”
“أستغيث بسيادتكم وأرجو منكم التدخل الفوري لإطلاق سراح ابني الذي قضى 5 سنوات داخل
السجون على ذمة أكثر من قضية، رغم صدور قرارات بإخلاء سبيله إلى جانب حصوله على حكم
براءته.”

“أتمنى منكم التدخل في أقرب وقت لخروجه من محبسه، وإنهاء معاناته ومعاناتي، التي بدأت بالقبض
عليه وعمره ١٨ عامًا، وما تزال مستمرة إلى الآن وهو شاب يمنعه احتجازه من الالتفات إلى مستقبله.”

<https://bit.ly/3ydGNmm>

عن مصطفى النجار

أهالي الراحلين عن الحياة متعايشون مع فكرة فقد على وجه من الوجوه، ففي العيد يتذكرون الأحباب، ويحملون دعواتهم لهم في قلوبهم، أو يذهبون بها لزيارتهم في القبور، أو ينثرون وروداً عليها، أو يسقون ريحاناً زرع هناك. كذلك ذوو المسجونين والمعتقلين، ووطنوا أنفسهم على أمل زيارتهم زيارة استثنائية لمناسبة العيد، أو تفاعلوا مع أحلام قرارات العفو، أو يشغلون أنفسهم بحساب ما تبقى للأعزاء وراء السجون، بغير حرية.

لكن الأمر مختلف والمعاناة أشد عند ذوي 12 ألف مواطن مصري في عداد المختفين قسرياً، بحسب تقارير صادرة عن منظمات حقوقية في العام الماضي 2021، إذ تفترس هؤلاء مشاعر هي أقسى من مشاعر فقد والغياب، كونهم واقعين بين فكي الرجاء واليأس، تسحقهم هواجس المصير المجهول، المخيف، حتى يكاد بعضهم أن يعلن الاستسلام لها، ثم يستيقظون على حلم أو رؤية، أول قشعريرة أمل تمنحهم بعض اليقين بأن الأحبة بخير في مكان ما، لا يعرفونه، لكنهم عائدون.

#مصطفى_النجار_فين

<https://bit.ly/3vI9K8n>

3 مايو

عن زياد العلمي


الشباب اتقفلت عليهم الزنازين من امبارح الظهر -بعد مواعيد الزيارة - ومش حتفتح الا بانتهاء اجازة العيد 😞 يعني لو لا قدر الله حد تعب او جاله ازمة تنفس او هبوط او اغماء؛ لازم زمائله يقعدوا يصرخوا، ويخبطوا على ابواب الزنازين، لغاية ما الحارس اللي على الباب يسمعهم، ويروح يشوف ايه الحكاية، وبعدين يتصل بمأمور السجن اللي حييجي بنفسه او يبعث ضابط يتأكد، وبعدين يتصل بالطبيب اللي بييجي يكشف عالحالة ولو لقاها محتاجة اسعاف يتصل بالاسعاف ، ويتعمل محضر بدخول سيارة الاسعاف ومحضر تاني لخروج المسجون!! يبقى عيد سعيد ازاى بس؟ طبعا ما حدش من المطبلاية اللي بيبرروا سجن ولادنا يتخيل ان ابنه ممكن يحصل معاه حاجة زي كده!!.. ربنا يحفظ كل ولاد الناس الطيبين. وحتى ولاد المطبلاية عشان مالهمش ذنب

<https://bit.ly/3MMq9hB>

عن أنس البلتاجي

العيد ال ١٨ لأنس في الانفرادي بسبب اللقب الخامس في البطاقة شاب اتحرم يكمل دراسته و اتحرم من الزيارة لأن والده د.محمد البلتاجي #الحرية_لأنس_البلتاجي

<https://bit.ly/3FfwVK9>



عن محمد الباقر

من كام يوم كتب مصطفى الأعصر مقال عن حياة المساجين المتعشقة مع الأمل كل يوم في السجون .. لخص كل مشاعري .. حقيقي كل يوم بقدر فكرة القدر المجهول .. مش متخيلة لو أني من ٣ سنين عرفت أن والد باقر هيدخل العناية المركزة وباقر يتقبض عليه وقتها من داخل النيابة وهوه بيقوم بشغله كمحامي .. ووباء يدخل علينا وتتمنع الزيارات وبعدها بسنة يتدور على قضية تانية ويتحط على قائمة إرهابية .. وبعدها بسنة ونص يتحاكم وياخد ٤ سنين يبدأوا من لحظة التصديق على الحكم .. فيلم رعب .. باقر الطيب الحنين أبو ضحكة رايقة يحصل فيه كل ده!! غالباً لو عرفت المستقبل من ٣ سنين كنت اتجمدت مكاني .. وقفلت على نفسي في البيت .. ولا اكلم حد .. ولا اروح الشغل .. لكن الأمل في كل لحظة هوه اللي خلاني اقدر اكمل .. في الأول قلت اكيد هيصعب باقر على حد عشان والده توفي بعد حبسه بأقل من ٣ أسابيع وساب والدته وأخته وأنا لوحدنا .. بعدها مع أول اخلاء سبيل من غرفة المشورة قلبي رفر في السما لحد ما النيابة استأنفت .. ومع قرب انتهاء السنيتين حبس احتياطي قلت اكيد هنصعب على حد ويخرجولنا باقر .. ومع نزوله للمحكمة كان عندي أمل يخرج براءة أو حكم على اد المدة اللي قضاها .. ووقعت ارضاً تماماً بعد الحكم..

وبدأت احاول ارجع اتمسك بالأمل مع رجوع لجنة العفو .. وبدأت اقنع نفسي أن المرة دي إن شاء الله هيخرجلي ونكمل حياتنا اللي وقفت يوم ٢٩ سبتمبر ٢٠١٩ .. وعايشة ليل ونهار على الأمل زي اللي عنده امتحان وهيموت من القلق والتوتر .. ومفيش حاجة في ايده غير أنه يدعي ربنا يفرح قلبه اللي تعب من المرمطة لأكثر من سنين ونص .. ونفسه في حياة كالحياة .. مش أكثر والله ..

<https://bit.ly/3kE9ele>

عن خالد غنيم



حرام ٣ أعياد بعيد عننا ومعاناة له وأسرتة، وعندما سمعنا عن لجنة العفو تجدد فينا الأمل أن ممكن يخرج قبل العيد ولم يحدث .”
كنت أتمنى أن يصدر قرار بخروج كل اللي يتجاوز السنيتين دون الانتظار لقوائم عفو لأنه حقهم القانوني والدستوري، خاصة أن خالد سجين رأي وليس له انتماءات سياسية أو حزبية .
“سنين حبس احتياطي بسبب كورونا، موجة وراء موجة، تجديد وراء تجديد، سنة بعد سنة وإحنا زي ما إحنا”، تصف ماجدة مأساة أسرتها في غياب زوجها، وتضيف متأثرة: “عمره يتآكل خلف الجدران من دون أسباب سوى أنه حبيها قوي وخاف عليها، عمر منه ومننا .”

“بقيت وأولادي بنخاف نسأل بعض عنه، لأن الدموع دائما تسبق الكلام، بقينا بنخاف نقول لبعض إنه اتجدد له، بقينا عايشين على أمل الخروج في أي وقت، فكرة الـ ٤ يوما أننا تعودنا عليها إحساس مميت وأسئلة كثيرة وبعدين وإيه الهدف وعمل إيه .”

“ مع كل زيارة لوالده المريض أهرب من سؤاله، أصبح الكلام محفوظا، وجملة خايف أموت وابني الوحيد مياخدش عزائي كلمات وحروف عاجزة عن التعبير عن وجع وقهر وألم مستمرين منذ عامين”،

“فين الأخبار الكاذبة في الخبر، تعبنا من الكلام والانتظار وفقدان الأمل مع كل تجديد”، تستكمل زوجة غنيم .

“أمنيات أسرة طال غياب عائلها أن يكون معنا هذا العام، أملنا في الله وفي انتظار فرجه، وكلي ثقة في عدله ورحمته .”

“يا بابا أنت وحشتني أوي، كل ما أبص لأصحابي أشوف معهم أباهتهم، بيعط أوي، أنا نفسي أشوفك، ومش بقدر أعيش من غيرك .”

<https://bit.ly/3FmlUH2>

عن معتز صبيح



#حلم اني اشوف قايمة عفو رئاسي كلها سياسين ويكون #معتز واحد منهم اكيد كلكوا بتحلموا نفس الحلم خلينا نعرفهم اننا كتيير والي عنده معتقل سياسي ينزل اسمه او صورته ويحلم معناا حطوا صور واسماء المعتقلين اللي تعرفوهم

<https://bit.ly/3FkjXLI>

عن محمد الباقر

من كام يوم كتب مصطفى الأعصر مقال عن حياة المساجين المتعشقة مع الأمل كل يوم في السجون .. لخص كل مشاعري .. حقيقي كل يوم بقدر فكرة القدر المجهول .. مش متخيلة لو أني من ٣ سنين عرفت أن والد باقر هيدخل العناية المركزة وباقر يتقبض عليه وقتها من داخل النيابة وهوه بيقوم بشغله كمحامي .. ووباء يدخل علينا وتتمنع الزيارات وبعدها بسنة يتدور على قضية تانية ويتحط على قائمة إرهابية .. وبعدها بسنة ونص يتحاكم وياخد ٤ سنين يبدأوا من لحظة التصديق على الحكم .. فيلم رعب .. باقر الطيب الحنين أبو ضحكة رايقة يحصل فيه كل ده!!

غالباً لو عرفت المستقبل من ٣ سنين كنت اتجمدت مكاني .. وقفلت على نفسي في البيت .. ولا اكلم حد .. ولا اروح الشغل .. لكن الأمل في كل لحظة هوه اللي خلاني اقدر اكمل ..
في الأول قلت اكيد هيصعب باقر على حد عشان والده توفي بعد حبسه بأقل من ٣ أسابيع وساب والدته وأخته وأنا لوحدا .. بعدها مع أول اخلاء سبيل من غرفة المشورة قلبي رفر في السما لحد ما النيابة استأنفت .. ومع قرب انتهاء السنين حبس احتياطي قلت اكيد هنصعب على حد ويخرجولنا باقر .. ومع نزوله للمحكمة كان عندي أمل يخرج براءة أو حكم على اد المدة اللي قضاها .. ووقعت ارضاً تماماً بعد الحكم..
وبدأت احاول ارجع اتمسك بالأمل مع رجوع لجنة العفو .. وبدأت اقنع نفسي أن المرة دي إن شاء الله هيخرجلي ونكمل حياتنا اللي وقفت يوم ٢٩ سبتمبر ٢٠١٩ .. وعاشة ليل ونهار على الأمل زي اللي عنده امتحان وهيموت من القلق والتوتر .. ومفيش حاجة في ايده غير أنه يدعي ربنا يفرح قلبه اللي تعب من المرمطة لأكثر من سنين ونص .. ونفسه في حياة كالحياة .. مش أكثر والله ..

<https://bit.ly/3kWk3z6>

5 مايو

عن بدر محمد بدر

في اليوم العالمي لحرية الصحافة ..وجهت عزة الجرف زوجة الصحفي بدر محمد بدر المعتقل منذ أكثر من 6 سنوات رسالة لزوجها في يوم ميلاده عبر صفحتها على الفيس بوك فقالت فيها : اليوم أتم زوجي الصحفي بدر محمد بدر 64 عاماً وهو معتقل للسنة السادسة في سجون العسكر ممنوع من الزيارة ومحروم من العلاج. وأضافت: لن يستطيع أحد طمس الحقيقة مهما فعل ،فعشاق الحرية يستطيعون الصمود لنيلها. وتابع: لن يملك إلا قلمه وكلمته الصارخة بالحرية ويوما ما سيحصل عليها .



<https://bit.ly/3yjgLOv>

عن أحمد ماهر (ريجو)



النهاردة أحمد ابني أبو أجمل واطيب قلب في الدنيا تم سنتين وهو بعيد عني.. أصعب واقسى وأمر سنتين في عمري كله.. سنتين مروا عليا بعشرين سنة ويمكن أكثر.. ياارب فك اسرك يا قلبي ويردك ليا ردا جميلا عاجلا غير آجل .. أحمد حبيبي كتب الرسالة دي ..

السؤال المتأخر

اليوم أتم عامي الثاني وعيدي الخامس في السجن تجربة طويلة ودامية، اكتسبت فيها الكثير وفقدت الأكثر، هناك ما أعلم حقيقة حتمية فقدانه وأعلم أن مازال هناك ما لم اكتشفه بعد.... تعلمت الكثير و من أهم ما تعلمت هو قدرتي على إيجاد الإجابة الأمثل على الأسئلة مستغل أنا وزملائي وفرة ما نملكه من الوقت الذي ينزف من أعمارنا حتى لا يزيدنا هم وقسوة الحقيقة نزيهاً... في إحدى السجون كان يسألني صديقي وأخي الأكبر د/وليد شوقي وهو ينظر إلى شرفة مطلة على ساحة السجن "لماذا لا يقف أحدهم في الشرفة؟! " سأله موكا عن جدوى وقوف أحدهم في الشرفة؟ فأخبره أن وقوفه يعطي الأمل والإحساس بأن هناك ما ينتظرنا بالخارج ... أحبته أن عدم وقوف أحدهم بالشرفة أفضل لأنه يسمح لي بمزيد من الخيال... فيوم أتخيل أمي وأبي يقفان بها يتحدثان عن قبولهم لي مهما كانت اختياراتي هوجاء وعشوائية ومهما زدت غرابة ... ويوم أتخيل حبيبي بشعر عجري مجنون يسافر في كل الدنيا تضحك فيضحك لها قلبي وهي تسخر مني وأنا داخل هذا القفص مثل دب حبيس... غياب وقوف أحدهم في الشرفة يحيي الخيال بداخلنا ولا يوجد أقوى من الخيال ليدعمنا... يا صاحبي السجن ...

ثم نقلنا إلى سجن آخر بلا ساحة وبلا شرفة فسلأنا وليد "لماذا لم تعد هنا شرفة؟! " حتى أملنا في الأمل انتزع منا ؟ !

لا أذكر إجابتى أو إجابة موكا ولا كيف تحايلنا وقتها لنجيب ولكني أذكر الآن بكل الأسي كيف تعالت ضحكاتنا ونحن نتحايل متفاخرين بمهارتنا في الإقناع ومتبارين سوياً على من منا أفصح واقوى اقناعاً .. ثم نقلت أنا قسراً إلى سجن أبعد وأبعد لأنزف وقتي وأنا أتساءل وحيداً اين صاحبي السجن؟! لماذا أغترب داخل غربتي؟

وعندما عصفت بي الأسئلة بقسوتها قررت أن أسأل أسئلة أخرى تأخرت كثيراً.. لماذا أنا هنا؟!

ماهي نتيجة احتجازي عامين على ذمة تحقيقات؟

إلى ما أسفرت هذه التحقيقات؟

على ماذا أدفع الثمن؟

هل هو ثمن نجاحي في تأسيس شركة إنتاج فني شبابية وناجحة؟!
أم أدفع ثمن لشيء آخر لا أعلمه؟!
هل هناك ما يستحق كل هذا النزيف من عمري؟
هل هناك من سيجيب على أسئلتني؟!
ام سأظل في غياهب بئري أنزف عمري بلا مجيب؟!
Ahmed Maher Rigo
2022-5-4
<https://bit.ly/3wbSzL5>

6 مايو

عن زياد العلمي

يارب معجزة تخرجهم كلهم مع بعض 🙏.. الي بيخرجوا لوحدهم -فرادى- مش بيعرفوا يفرحوا،
وبيعيشوا "عقدة الناجي" الي توجع القلب 😞 ومش قادرين يعيشوا حياة طبيعية! عشان مصر تفرح
بجد، فرج كرب كل من لم يثبت بحقه -في محاكمة عادلة- تخريب او عنف او حمل سلاح!!
#كفاية

ويارب كل واحد ياخذ على قد نيته

<https://bit.ly/3wfdLeO>

عن معتز عبد الوهاب

يوسف بيقولي بابا وحشني وانا شفت امبارح shooting star
(شهاب) و عملت wish انه يرجع بسرعة..
يوسف كبر و قرب يبقى ٨ سنين و مش عارف معتز غايب ليه و فين!
و كل يوم قبل ما ينام بيدعي انه يرجع ..
النهاردة معتز كامل سنتين حبس احتياطي بسبب ايه ما نعرفش..
مش كفاية بقي

<https://bit.ly/3MY51oO>



عن محمود المخزنجي

من التهم الموجهة ضد محمود الانضمام لجماعة محظورة، هم ما حددوش اسم الجماعة ولا نشاطها لكن المفروض انها جماعة أسست بشكل مخالف للقانون، محمود غير منضم لأي حركات سياسية ولا أحزاب ولا حتى بيكون فاضي انه يخرج مع أصحابه ويحضر تجمعاتهم محمود طول الوقت قاعد في ورشته بيجري على أكل عيشه عشان مسؤوليته تجاه أسرته، أصحاب محمود لما بيحبوا يشفوه يروحوا له الورشة أو البيت لان خروجاته معهم نادرة جدًا



#الحرية_لمحمود_المخزنجي
<https://bit.ly/3kPIfUW>

7 مايو

عن خالد عز الدين

٦ مايو... يوم زواجي من خالد... في اليوم دا سنة ٢٠١٧ كنت رايحة رحلة من رحلات البحث عنه... الجو كان لطيف جدا... كنت مستأنسة ومتفائلة وجوايا مشاعر كثير حلوة وكلى أمل انى أسمع أخبار جديدة عن خالد... كنت فرحانة كأني بقدّم لنفسي ولخالد هدية في اليوم دا بالرحلة إلى كنت أتمنى تنتهى على خير وارجع منها بأمل جديد ... حبة دقائق وكل حاجة اتبدلت وانتهى اليوم بكلابش وزنزانة ... كله عدى بفضل الله وكرمه ولطفه بس خالد لسة ما رجعتش ودلوقتي بقضى السنة التاسعة من زواجنا من غيره عاجزة انى أعمل حاجة تطمئني عليه ... الحمد لله راضية بقضاء ربنا كله ... بس حزينه على خالد وعلى حياتنا حزينة على ٩ سنين اتخطفوا من حياتنا واحنا أحياء متفرقين. مدركة جدا... للطف ربنا في السنين دى اللى لولاه والله ما كننا نطبق الحياة. كل سنة وانت طيب يا خالد ... طيب الروح والبدن ... ربنا يرد لى روحى اللى غابت بغيابك ... وينعم عليك وعليها ببصيرة تنور لنا الطريق لحد ما نتقابل فى الفضل والعافية.

#خالد_عز_الدين_فين
<https://bit.ly/3KOSAdm>



وداع كل زيارة لباقر في السجن..
كل زيارتي لباقر بتبقى عاملة زي لحظة الفرملة قبل ما تخبط حد
.. كل حاجة بتحصل بسرعة وكأنك منفصل عن جسدك وفي حلم
يقظة .. لمدة ٢٠ دقيقة .. كل شهرين ثلاثة ..
بودع فيهم كل ذرة خصوصية في حياتي .. وبحاول اركز واقوله كل
أخباري اللي كررتها ولخصتها في دماغي كذا مرة أثناء ساعات

الانتظار ادم السجن .. وبلغه سلامات ودعوات الأهل والصحاب .. وبطن عليه وبنقله حبي
ومشاعري اللي بتزيد كل يوم .. وبطمنه أنها مش بتقل رغم البعاد والقضايا والسنين .. واسمعه شوية
ويسمعي شوية .. بسرعة رهيبية .. عشان ما نفوتش دقيقة .. بدون ما نقدر نهدي ونستمع حتى
بالكلمات الحلوة..

وتنتهي الزيارة بالجملة قاتلة الدقائق الآدمية الوحيدة في حياتي "يلا يا باقر .. الزيارة انتهت" .. واودعه
زي الأطفال بقبلات وأحضان في الهوا .. وبجمل ورا بعض بسرعة وأنا برجع للباب بظهري "بحبك جداً
وهتوحشني أوي .. خد بالك من نفسك" .. وجملة "يلا يا مدام" المتكررة بتطاردني لحد الباب .. وأنا
عارفة أني مش هشوفه ثاني لمدة شهرين تلاته..

وبخرج استنى الطفطف .. وبكرر في دماغي كل كلامه الحلو عشان ما انساهوش .. وبحاول استمتع بيه
وانسى السجن وابص ناحية غيط الزرع وبرج الحمام الأبيض الجميل اللي ادم السجن واسمع صوت
العصافير .. الحاجة الوحيدة الجميلة في المكان المقبض الرهيب ده .. عالمين مختلفين تماماً ..
واحاول اهدى وافتكر أني من مخلوقات الله زي العصافير اللي بانيتها اعشاشها في اعمدة مظلة الانتظار
ادم السجن .. وأن ربنا اكيد مش هينساني..

وعندي أمل أن يوماً ما هنتجمع من ثاني أنا وباقر ونعيش بسلام وهدوء وراحة بال زي العصافير الراقية
دي .. وبفوق على صوت الطفطف واجري انط جوا واسمع حكاوي الستات عن زياراتهم واشوف دموع
العيال واحاول اضحك معاهم .. واتمنى أن كل ده ينتهي يوماً ما .. ونعيش في سلام زي النبي آدمين ..
ده سقف طموحي حقيقي .. جوزي جنبي على كنبه بيتنا .. مش أكثر ..

#الحرية_لِباقر

<https://bit.ly/3Fp66TU>

8 مايو

عن آل ثابت

لثاني مره روحنا لمكتب النائب العام..
بابا ٧٦ سنه راجل كبير في مرحله عمره محتاج رعايه
مننا مكانه مش في انفرادي !
بابا حالته الصحيه لا تسمح بالحسبه ديه ..
سيف في سجن من أسوأ مايكون ، سيف مكانه مش
في انفرادي!
سيف في ظروف لاآدميه !

<https://bit.ly/3P6A03B>



عن أيمن عبد المعطي

كانت جلسة أيمن النهاردة وللأسف القرار تجديد حبس
لله الأمر
#الحرية_لأيمن_عبدالمعطي
<https://bit.ly/3KWsoh5>



عن عبد المنعم أبو الفتوح

في زيارة أبويا اليوم، بعد معرفته بعض الأخبار وما حدث
أمس، عبّر عن إدانته واستنكاره الشديد للجريمة
الارهابية اللي ارتكبت أمس في سيناء الغالية، والتي
وصفها في حديثه بجريمة الغدر الجبانة للارهاب
الأسود، والتي سقط فيها خيرة من أبناء مصر من شهداء
الوطن والواجب. ينقل خالص تعازيه ومواساته لأسر



الشهداء جميعا، ودعاه لجميع المصابين بالشفاء العاجل وأن يحفظ الله بلادنا من شر الإرهاب
الأسود، ومن غدر وخسة وجبن مرتكبيه من أعداء مصر في الخارج والداخل، من يؤرّقهم دائما استقرار
الوطن .

رحم الله الشهداء جميعا وألهم أهلهم ورفاقهم الصبر والسلوان
<https://bit.ly/3sofQsm>

عن هدى عبد المنعم

هيحصل ايه لو سابولنا ماما ؟ !
ماما تقريبا مبقتش بتتحرك ..
يا بالعكاز يا بتتسند
صعبان عليا اوي اني ممنوع اسنדהا في السن ده
ممنوع اقرب
ممنوع احضنها
صعبان عليا في سنها ده تتسند على حد غيرنا
يا وجع القلب عليكي يا امي 😞 ..



بهذه الكلمات عبرت فدوى خالد ابنة الحقوقية هدى عبد المنعم
المعتقلة في سجون السيسي منذ أكثر من ثلاث سنوات في رسالة مؤثرة عبر صفحتها على الفيس بوك
عَن الوجد والحزن عَن استمرار حبس والدتها المسنة والمريضة ظلماً وعدواناً والتي ساءت حالتها
الصحية داخل محبسها الانفرادي والممنوعة من الزيارة منذ اعتقالها في أول نوفمبر 2018 وحتى الآن
،ورغم ذلك مازالت السلطات تتعنت في الإفراج الصحي عنها أو نقلها للمستشفى لعلاجها .

<https://bit.ly/3yx5aeC>

عن محمد عادل

الأربعاء 11 مايو النظر ف تجديد حبس Mohammed Adel ع ذمة
القضية رقم 4118 لسنة 2018 إداري شرين الدقهلية.
الشهر الجاي عادل هيتم 4 سنين حبس احتياطي، ده غير ال 3 سنين اللي
اتحبسهم قبل كده، غير السنة ونصف مراقبة يومية!
كفاية لحد كده، احنا فعلا تعبنا وزهقنا 😞
بالمنطق كده -ومش عشان عاوزه جوزي يخرج- خروج أي سجين رأي لا
يُشكل 1 ف المليون ضرر ع الدولة، بالعكس تماماً، يبقى ليه لا؟ !
بلاش كده، ليه الناس اللي بقي لها فترات ف السجون ما تأخدش فرص
تانية، وتخرج تشوف حياتها وأهاليها!



#الحرية_لمحمد_عادل

<https://bit.ly/3P78Rxl>

عن محمد الباقر

باقر كان يحب جداً جداً يقعد في الشمس .. وكان في البيت في الشتاء يسحب الكراسي ويقعد جنب الشباك القبلي ويشغل القطط حوالبه .. ولو خرجنا في أي مكان يسحب كرسيه وفنجال القهوة للشمس ويغمض عينه ويستمتع ويضحك ويقول " احنا النوبيين بنقدر الشمس " .. دلوقتي بقاله أكثر من سنتين ونص محروم من الشمس ولونه بقي بين البني الفاتح والأصفر .. وكل ما يلاقيني متأثرة وحزينة من حبسته من غير شمس .. يقعد يهزر معايا ويتغزل في جمال وحلاوة الشمس اللي مش هيسيبها لما يخرج ويقول " هانت .. هانت .. كله هيعدي .. وهنعيش حياتنا مع بعض أحلى من الأول ..



وهنبداً بداية جديدة ونسى كل اللي فات .. أنا كويس ادامك اهوه .. ما تخافيش .. "

#الحرية_لباقر

<https://bit.ly/3FsxlW>

عن معتز عبد الوهاب

زرت معتز يوم السبت اللي فات و هو كويس و متفائل بالإنفراجة و بيتمنى تشمله قريب .. وحشه الولاد و أهله و أصحابه و شغله و ووقفه في اللوكيشن بإختصار مفتقد الحياة.. بس للأسف في نفس اليوم عمته اللي بيحبها جدا و يبسال على صحتها دائما توفت الله يرحمها و مش عارفة هنقله و لا.. يا رب الفرج قريب



<https://bit.ly/3wjbnYS>

عن أحمد سمير سنطاوي

تأجيل القضية ليوم ٦ يونيو للمرافعة، مع إن جلسة النهدة كانت جلسة المرافعة اللي استئيناها شهرين. أحمد كان منشرح ومبسوط جدا في بداية الجلسة ومتوقع مع القرارات الحكيمة بإخلاء سبيل الباحثين والنشطاء السياسيين إنه كمان يخلى سبيله، دلوقتي راجع الزنزانة ..

#الحرية_لأحمد_سمير

<https://bit.ly/3ypPLgo>



عن مصطفى صبره

انتوا ليه مستكترين علينا الفرحة و انتوا عارفين حجم المرار و القهر و
الحزن اللي احنا عايشينه وساكتين و مش عايزين اكر من ان اخويا
يبقى وسطنا

مصطفى النهاردة اتجدد له ثاني ٤٥ يوم و كده كثير اوي الحقيقة.. ،
حسبنا الله و نعم الوكيل في كل ظالم

يا رب زيح الغمة و فك الكرب 🙏

#الحرية_لمصطفى_صبرة

<https://bit.ly/3I3lc6Y>



عن هدى عبد المنعم

بعد شهرين من آخر جلسة متشوقة جداً ليوم الأحد وبعده الأيام
عشان نطمئن على ماما
واما بفتكر آخر جلسة بحس بقهرة في قلبي من الطريقة اللي خلونا
نشوفها بيها !

إحساس العجز والقهر وحش اوي اوي
احنا المرة اللي فاتت خلونا نسلم على ماما بالظبط لمدة دقيقة او أقل
من غير حتى ما ناخذ راحتنا في السلام حطوا ما بيننا كراسي عشان
منحضنهنش براحتنا فضلوا يزعقوا فوق دماغنا ويشوشوا علينا بس
عشان منسمعش بعض لو جيت قتلها كلمة وانا مقربة يزعقوا فينا



ويقولونا بتقولوا ايه ؟ !

فضلنا نقولهم ثواني بس نسمع صوتها مش عارفين من كتر التشويش !
اليوم ده خرجت انا وفدوى منهارين في العياط من كتر القهرة اللي في قلوبنا !
بتمنى بعد شهرين نقدر نحضن ماما ونسمعها ونطمئن عليها ونعرف آخر أخبارها ..
افتكروا ماما وعائشة وكل المعتقلين في دعاءكم

<https://bit.ly/3w2u6ZU>

عن محمود المخزنجي

محمود اتجددله ١٥ يوم للأسف، ما اتعرضش لوحده زي ما كان متوقع، لكن تم عرضه مع متهمين آخرين على ذمة قضية ٤٤٠ حصر أمن الدولة العليا ٢٠٢٢

ما حدث من اللي اتعرضوا أخذ إخلاء سبيل مش عارفة دي المرة الكام اللي هنقول فيها إن محمود ما لوش في حاجة ولا في مبرر لحبسه، محمود مستحيل يهرب لأنه المسؤول الأول عن أسرته، فعلي الأقل خرجوه على ذمة القضية لحد ما تتأكدوا من براءته

#الحرية_لمحمود_المخزنجي

<https://bit.ly/39UYKvR>



10 مايو

عن محمد عادل

يعنى السلك اتشال من سجون كتير زي القناطر وجمصة والمنيا والابعدية وبرج العرب، وغيرهم وسجن المنصورة ده العاق الوحيد ولا ايه؟! يا جماعة حد يشوف لنا حل لحد ما ربنا يفرجها بدل زيارة الحيوانات اللي بنزورها ف الأقفاس دي!

<https://bit.ly/3Pc99Dn>

11 مايو

عن أوسام راشد

"أسعد أيامنا وجميع اهالي معتقلين برج العرب عارفين ليه عارفين ليه..
إن خلاص هنقدر نحضن بابا ونحضن محمد ونسلم عليهم ونقعد عليهم ونقعد معاهم بدون سلك ونشوف وجوههم وعيونهم ونقدر نسمع صوتهم ونقعد بصوتنا يهلى ونجملنا شرققة من الصوت العالي ونقعد نكح وامواتنا تروح بابا حبيبي هيسمع صوتنا خلاص أنه ي حبيبي ف الستين اللي شاتوا سمعه ضف جدا جدا ومكناش بيسمعا كويس مهما صوتنا كان عالي
فردائين لنا ينادي اقل حقوقنا ونسلم عليهم حيايبي ونسمع أصواتهم بعد ثلث سنين من العذاب الشديد والقهر والعناء الشديد اللي كنا بنعانيه ف الزيارة
أنس من الصبح من لما عرف اننا هنزور بكرة يقولى هروح لخالو وججو واكسر السلك وابوس خالو وججو واجلبهم حاجة حلوة و شيبسي والحمد لله ربنا هيحقق أمنيتهم واميتنا الحمد لله
يارب اجعل لهم مخرجا من ظلمات السجون واجمنا بهم في حبة تامة وعافية في الدين والهدن يارب

<https://bit.ly/390aQGS>



12 مايو

عن جمال عبد الحكيم

النهادة جمال كمل ٥ سنين حبس ٥ سنين كاملة السنة ١٢ شهر
نتمنى نخرج النهادة بقي
#الحرية_لجمال_عبد_الحكيم
<https://bit.ly/3yBxJle>



عن آل ثابت

في خلال ال١٧ شهر اللي فاتو
كذا مرة نتمنع عنا الزياره، يطلع ان بابا كان "عيان!"
تاني! منعوا زيارتنا الشهرية لبابا و سيف امبارح!
أعمل ايه؟
لحد امتي القلق على حبايينا!
بابا ٧٦ سنه!
بترن في ودني كلمة ماما عن سيف :
'محبوس في سجن شديد الحراسه ١ في مكان غير آدمي'
#خرجوهم_كفايه_كده
<https://bit.ly/3NadEN5>

عن هدى عبد المنعم

جلسة ماما يوم الأحد مع كل قُرب جلسة احنا بنصاب بحالة نفسية صعبة جدا خوفا من اللي ممكن
نشوفه يومها ان ماما تكون تعبانة مثلا او اصلا منعرفش نشوفها احنا اخر مرة عرفنا حاجة عنها وكانت
جلسة مُهينة جدا كانت ١٤ مارس شهرين منعرفش عنها ولا حرف ادعولنا ربنا يعديها علينا وعليها
على خير

FreeHoda#

<https://bit.ly/3wqRsaP>

عن خالد عز الدين

النهاردة شوفت خالد في منام جميل ❤️... رجع
ولا كأنه غاب واخذني من ايدي وماشي بيا في وسط
الناس ... وانا في نفس الحالة والمشاعر اللي بتكون
معايا في كل منام بشوفه رجع ... مشاعر فرح على
اشتياق على خوف على عدم استيعاب على مشاعر
مش مفهومة كأني في لحظة بدوس على زرار رجعتني
تسع سنين ورا كأن آلة الزمان اللي كenna بنتفرج عليها
في الافلام بتنقلني من زمن لزمن إحساس اني بعيش
معجزة ... رغم يقيني باذن الله بحدوثها إلا اني



هفضل شايفها معجزة قبل ما تحصل وبعد باذنه تعالى لما تحصل ... ووقع المعجزات عاوز تأهيل من
ربنا وتربية لعل لسة ما وصلتش ... المهم الحمد لله رؤيا جميلة مخلياني في مود جميل من وقت ما
صحيت يا رب حقق في فضل منه وعافية تامة يا رب.

#خالد_عز_الدين_فين

<https://bit.ly/3Pfg6p>

عن محمد محيي الدين (اخلي سبيله)

يوم 12 مايو ولادي هيتخرجوا من كي جي نفسي محمد يكون معايا
هي حاجة تبان بسيطة او تافهه بس عندي و عند زياد جاسمن
حاجة مهمة خصوصا اني قدمت لهم لوحدي و دخلوا المدرسة قضاوا
فيها بلاي سكول و كي جي 1 و كي جي 2 ... كل ده و محمد مش معايا
هما نفسهم يرجع من شغله البعيبيد و يروح معاهم المدرسة مرة 3
سنين بيتمنوا بس يوصلهم يوم
محمد مشافش كل مرحلة باختلافها ولا فرح بيهم بيكبروا قدامه ولا
ينفع هما يشوفوه محبوس كأنه مجرمميعرفوش غير خير و شر و
المسجون في عقلهم الصغير شريريمكن لو كانوا اكبر وقت



اعتقاله كنت قدرت اشرح لهم بس وقتها كان عندهم 3 سنين بس
و كالعادة بتمنى معجزة تخليه يشوفهم في اخر يوم ليهم في مرحلة الحضانة قبل ما يتنقلوا لمرحلة
مختلفة

يا ربي حتى احلامنا بقت في ابسط امور حياتنا الطبيعي نكون فيها سوا
كفاية 3 سنين و شهرين احتياطي
#الحرية_لمحمد_محيي_الدين

<https://bit.ly/3stDKMG>

سبحانك يا رب لما انام مهمومة و زعلانة و ربنا يبعثلي مكالمة كل
فترة تخلي قلبي بيرقص و هما بيحكولي على عشرتهم لمحمد في
طرة
كل مكالمة بيتحكالي فيها عن حبيبي بحس اني شوفته بتخيل كل
كلمة كأنه فيلم .. بحس اني كنت معاها
بلاش عقدة الناجي ... افرحوا بخروجكم لأني فرحانة من كل قلبي
بيكم
و فرحانة ان ربنا بعثنا من وسط المحنة دي اصحاب قلوبهم
بالنضافة دي



بطبيعتي بقدر اصحاب جدا و شيفاهم من اهم نعم ربنا علينا
و واضح ان "طرة و أخواتها" فيهم انضف قلوب و احسن اصحاب محمد طلع بيهم... ربنا يديمكم
نعمة و يفرحنا برجوع محمد قريب

لا حاجة للبريسمافين اليوم 😊 مكالماتكم مضادات اكتئاب ممتازة ♥♥
#الحرية_لحبيبي

#الحرية_لمحمد_محي_الدين

<https://bit.ly/3w2IPoY>

14 مايو

عن إبراهيم متولي

يوم الثلاثاء القادم ميعاد تجديد والدي واللي بيه يكون تم داخل
السجن والحبس الانفرادي والتدوير علي ثلاث قضايا مختلفة
اثنين منهم نفس الاتهام والثالثة إتهام خارج العقل والمنطق ٤
سنوات و ٩ أشهر.

يذكر ان والدي تم القبض عليه من مطار القاهرة بعد معانة
ووجع قلب وانهيار عصبي ونفسي بعد رحلة البحث عن أخويا
دامت ما يقرب من خمس سنوات دون الوصول لنتيجة بالرغم
إن كان فيه شهود علي واقعة الاختفاء وتواجدهم في مكان
الاحتجاز مع أخويا وتم إطلاق سراحهم وفيما بعد ادلاء شهادتهم
تم التنكيل بيهم.



والدي دخل السجن سليم وليس به أي أمراض.

والدي الآن مصاب بتضخم حاد بالبروستاتا بلغ درجة ١٠٤ % والسجن بيذلنا علشان يوافقوا يعملوا
العملية وبيضللوا النيابة عن حالته الصحية الحقيقية ؛ وضعف الرؤية ؛ وآلام المفاصل.
تعرضنا لمنع من الزيارة مايقرب من عامين وثلاثة أشهر.

وبعد كل إخلاء سبيل وقبل العرض علي قضية جديدة يدور دورته داخل مقر الإحتجاز بالأمن الوطني وبعد ان تم إخلاء سبيله عام ٢٠١٩ تم تقيده من يده وقدمه داخل مقر الأمن الوطني بكفرالشيخ. والدي محام بالنقض والإدارية والدستورية العليا. يشهد له كل من تعامل معه عن مهنيته وبذله كل مجهود دون كلل أو ملل. كل مشكلة والدي انه حاول يبحث عن الحقيقة زي كل واحد اتحبس أو اتنكل بيه. أتمني أن القبضة الأمنية اللي نازلة علي المحامين بالقبض والتنكيل بيهم علشان واحد كتب عن متهم عنده او فكر يتعامل بإنسانية ومهنية يتقبض علي ويتحبس علي ذمة قضايا نشر بالرغم اللي بيقوله هو الحقيقة.

#سيبوا_أبويا

#رجعوا_أخويا

#كفاية_كدا

#الحرية_لإبراهيم_متولي

<https://bit.ly/3yl6nQu>

عن أنس البلتاجي

بكرة جلسة أنس... بعد ٨ سنوات و خمسة أشهر احتجاز..ممكن يتخلي سبيله؟؟

<https://bit.ly/37Lv2bQ>

15 مايو

عن آل ثابت

للمره الثالثه! خارجين من مكتب النائب العام
في خطوره على صحة سيف وبابا!
الانفرادي ده غير آدمي! جريمة!
مافيش شمس ولا هوا
مافيش مشي ولا حركه
مافيش سرير ولا كرسي
سيف ما عندوش حتي شباك!
بابا فقد ٢٥ كيلو من وزنه..
بابا في جنازة امي كان واضح للكل انه مش عارف يمشي من ركبته!



<https://bit.ly/3le9SX6>

عن هدى عبد المنعم

يارب هون علينا اليوم ده ونظمن على ماما ونعرف نحضنها
ادعولنا الجلسة كمان شوية

<https://bit.ly/37PKdkh>

ماما وصلت في عربية الإسعاف
تأجيل ١٣ يونيو لسة مسحولناش ندخل

<https://bit.ly/38uXgrM>

كان نفسي اوي اشوفها واحضنها والمس ايديها ..
بعد شهرين

الجلسة اتأجلت ل ١٣/٦

دعواتكم بالفرج

<https://bit.ly/3woICdw>

إنهارة كنت كل اللي بفكر فيه ان بعد شهرين وعيد وبعد ما ماما نفسها قالت للقاضي انا عايزة اشوف
ولادي

انهم هيدخلونا

مش عارفة ممكن صوتنا يوصل لمين عشان بس حقنا في اننا نشوف ماما ونظمن عليها ..

لا قانوناً عارفين نشوفها ونظمن عليها

ولا اي حاجة ..

يارب احنا ملناش غيرك لطفك ورحمتك بينا ..

FreeHoda#

<https://bit.ly/3yNfJdE>

16 مايو

عن هدى عبد المنعم

احنا ممنوعين من الزيارة من اول ما ماما اتاخذت

فرصتنا الوحيدة لشوفتها يوم المحكمة

وكمان مش بيتسمحلنا ندخل نشوفها كل مرة !

انا نفسي اعرف شوفتنا لماما او حضنها خطر على الامن في ايه عشان نتحرم منها ؟ !

٣ سنين ونص محرومين منها مش كفاية كده اوي !

FreeHoda#

<https://bit.ly/3yE1ism>

امبارح كانت جلسة ماما

عندي كلام كتير اوي عاوزه اكتبه

امبارح واحنا بنجري ورا عربية الاسعاف

لما منعونا ندخل نشوفها في الجلسة استنينا لحظة خروجها
للحظة تنحت ولما لقطت ماما من شباك العربية
الزمن وقف بيا..

مين دي ؟ !

هي بتعمل ايه هنا ؟

هي شكلها بقي ايه ؟

طب شكل حضنها بقي ازاي

هو احنا حياتنا وهي معانا كانت عاملة ازاي

هي هترجع وسطنا تاني ؟!

طيب لما ترجع هناعامل مع بعض تاني ازاي ؟

طيب هي نفسيتها ونفسيتنا هيبقو عاملين ازاي ؟

طب هو احنا قلوبنا هينفع تترمم بعد اللي حصلها ؟

طب هو الوضع هيرجع طبيعي وسوي لينا وليها ؟ !

قطع حبل افكاري هند

يا ماما يا ماما يا ماما

كملت جري بجري اسرع واسرع

بحاول الحق العربية بكل الطرق

ارجوك يا نَفْسِي اصمد شوية

محتاجة ادقق في ملامحها اكثر

حري متواصل لحد مالعربية بقت اسرع مني بمراحل

يا ماما يا ماما يا ماما

صوتي راح

وماما راحت معاهم!

هي ماما هترجع امتي ؟

#FreeHoda

<https://bit.ly/3Njyiu4>

نداء لأي حد ممكن يسمعني ايا كان هو مين

انا محتاجة اشوف أمي اللي محرومة منها بقالي ٤ سنين

يا اي حد هيشوف البوست بتاعي انا محتاجة اشوف ماما واحضنها وابوسها واقعد معاهم من غير

فواصل

ياربي هو ده مش حقي يا خلق

<https://bit.ly/3LpHQCz>

وكأن الكون في غيابك ضيق كعنق زجاجة

وكأن اتساع السموات والأرض لم يكن..

وكأن كل براح حرام..

وكأن كل سعادة موجهة..
وكل فرحة منقوصة..
وكل قريب بعيد..
وكل بداية منتهية..
الكون بدونك عدم..
والحضور بدونك غياب..
أُمِّي ..

لا حياة بدونك ولا اكتمال لنا بسواك

FreeHoda#

<https://bit.ly/3LqCNSp>

عن أحمد دومه

هككي شوية عن احمد دومة ردا على تصريح واحد من اعضاء لجنة العفو برفض الاجهزة الامنية لخروجه هو وعلاء لكونهم مثيري شغب داخل السجون (لو صح التصريح).
مش هككي عن الصديق الحبيب علاء عبد الفتاح نيابة عن الاسرة .
أحمد محبوبس ٨ سنين و٦ شهور بالتمام والكمال. خلال الفترة دي اتنقل بين ٣ سجون، الليمان والتحقيق والمزرعة .. ومستشفى القصر العيني اللي قضى فيها ٨ شهور .
طبعا عهد احمد بالسجون اكبر من كده بكثير .. انا هتكلم عن الحبسة دي بس .

حكيت كتير قبل كده عن علاقتنا بمحيطنا كله .. من اول المعتقلين واسرهم على اختلاف توجهاتهم والمسجونين الجنائيين، لحد الضباط والافراد والعمال واللوات وكل مسئول عدى علينا خلال الفترة الطويلة دي، وعن اد ايه احمد انسان متفرد.. متفرد في حديثه وشدة معارضته والتعبير عن ما يؤمن به.. ومتفرد في لطفه ووده وانسانيته ورعايته لكل المحيطين بيه حتى خصومه احمد معروف بحب الكل له، حب حقيقي مش مصطنع ومفيش اي سبب لاصطناعه. وفيما يخص ادارات السجون تحديدا .. خالطنا عدد من الادارات المختلفة، ضباط وافراد وقيادات ميتعدوش، اللي اترقى واللي اتنقل واللي طلع معاش، من الوزارة ومن مصلحة السجون وفي الليمان والمزرعة والتحقيق.. ومن مديرية امن القاهرة وادارة الترحيلات. طول السنين دي احنا بنخلق علاقات انسانية طيبة مع كل محيطنا لاننا مبنعرفش نعمل الا كده. أحمد معروف بعلاقته الودودة والمحترمة والمنضبطة بكل اللي مروا عليه .. ٨ سنين ونص، فيهم مواقف ومناسبات ومناقشات واشياء كانت غريبة على مجتمع السجون زي انك تقف تتناقش بالساعات عشان تدخل كنافه بالمانجا ولا فانوس معمول هاند ميد ولا جواب رومانسي مش عاوزينه يتقري ولا اي حاجة خارج اطر الاكل والشرب والاشياء اللازمة للحياة، مع الوقت وكتر المواقف اتخلقت روابط انسانية اعمق ومناقشات اطول واعم وفهم وتقدير ممكن يتعدي في لحظات كتير معنى السجين والسجان.

انا فاهمة ان اللي بقوله ده يبدو غريب لكنه حقيقي ومن الحاجات المعروفة عن احمد .. وهو أحمد دومة اصلا حالة مركبة وغريبة .. يتخايق على حقوقه وحقوق زملاءه كما لو كان هيموت علسانها حالا ويمنع حدوث اي وقائع تعذيب او ضرب او اهانة في محيطه، ويهدد بالنشر والفضح والشهادة ضد اي معتدي .. وبعد شوية يقعد مع المخبر في التريض يشرب شاي وممكن يبستفه ويقول انت عملت كذا، ده ممكن يتردلك في عيالك، والتاني يقبلها منه، ويحكوا عن الحياة والاسرة والظروف واخبار العيال. ويتناقش مع الضابط فلان الفلاني عن معرفش ايه اللي سمع انه حصل في السجن الفلاني، والضابط اللي عنده حالة وفاة والضابط اللي لسه راجع من اجازة او او او في المستشفى أحمد مكنش بيخرج من العنبر اللي محجوز فيه وطبعا كان محجوز في عنبر كامل لوحده (عنبر المرضى المعتقلين في مستشفى الباطنة في القصر العيني) .. كنت بزوره ربع ساعة يوم بعد يوم، كل مرة كنت بلاقي حد من الضباط قاعد بيدخن وبيتكلم معاه عشان يهون عليه الوقت .. يتكلموا عن اسرهم وهو اياتهم واصحابهم.. عن افكار للهدية اللي عاوز يجيبهاالي واخر هدية ده ولا ده جابها لمراته في مرة قررت اروح لقصر الاتحادية، بعيدا عن الموقف وملابساته، بقول للضابط على البوابة انا فلانه الفلانية صحفية وزوجة المعتقل أحمد دومة: * أحمد دومة.. اه.. طمني عنده عامل ايه صحته كويسه؟ - والله يا فندم، الحمد لله . * فاهم، طبعا السجن ولو كان جنة برضه سجن، تحياتي وان شاء الله ربنا يفرجها .

كان ضابط شاب.. وقتها كلامه اداني دفعة معنوية عظيمة فيعني في كل عهدنا بالسجون وعالمها ومحيطها وتوابعها .. لم يحدث انه احمد تجاوز القانون .. لم يحدث انه اتعمله محضر بأي اساءة في السجن.. لم يحدث ان في اي ضابط او فرد (باستثناء احمد فكري، واحد من ضباط الامن الوطني اللي مروا علينا) كان على خصومة معاه بالعكس طول الوقت ورغم كل المواقف اللي بناخدها عشان نسترد حقوقنا، ورغم تعبيرات احمد الحادة في بعض المناقشات في التعبير عن مبادئه، وتركيزنا معظم الوقت على الحقوق البسيطة اللي كانت بالنسبالهم مرهقة ومش مفهومة.. معظم المسئولين المحتكين بيه بشكل مباشر كانوا مقدرينه وساعين لمساعدته وتمنين الحرية له فيا جماعة قولوا ان في اجهزة مش عاوزاه يخرج او اشخاص بعينها بتكرهه ومش عاوزاه يخرج او ان هناك من يعتبره رمز/ كائن اعتباري.. هيخرج بس كرسالة. لكن مثير للشغب ومش ملتزم بلوائح السجن !

مش راكبة على احمد

#FreeDouma

#الحرية_لاحمد_دومة

<https://bit.ly/3PwKtWw>

17 مايو

عن عبد الرحمن طارق موكا

جلسة موكا

غدا

لا تنسوه من دعاءكم
<https://bit.ly/3yloMNd>

عن مصعب رجب

"للمرة الأولى بعد سنتين أشوف مصعب من غير سلك ونحضنه أنا والبنات..
أول مرة سارة تشوف أبوها بعد سنتين وأول مرة يشوف ريحانة ويلمسها ويحضنها من يوم ميلادها"..
-زوجة المعتقل مصعب رجب

<https://bit.ly/3PGEP4j>

عن أنس البلتاجي

القرار ٤٥ يوم
وسط نداءات بطول ال timeline من أهالي محجّزين سياسيين بخروج أهاليهم! ... وأخبار إضراب
عن الطعام...
المحامي بلغنا أن أنس نزل الجلسة..وبنبرة بأئسة المحامي قال : مفيش جديد غير أن أنس كان عنده
أمل المرة دي..معرفش كان جايبه منين ...

<https://bit.ly/3lkdoz5>

18 مايو

عن محمد عادل

فاضل شهر بالظبط من دلوقتي Mohammed Adel ويتم 4 سنين حبس احتياطي!
رقم بشع، واحساسنا أبشع وأتعس واحنا للأسف مش عارفين امتي هيخرج؟ امتي هيعيش حياته؟ امتي
هيبقى معي؟

#الحرية_لمحمد_عادل

<https://bit.ly/3G5nWfa>

عن محمد الباقر

بعيد اكتشاف نفسي كل يوم .. الحياة بتجري حواليا .. وترندات خطابات تعيسة من الامارات
والبوركييني في مجلس الشيوخ وأبو الهول غمض عينه .. وأنا واقفة في مكاني بصحبة قولوني العصبي
رفيق الطريق .. مستنيين كل يوم أي خبر عن قوائم العفو .. كأني اداام امتحان بس ما عنديش كتاب
اذاكره .. ولا امكانية أني اجتهد في الامتحان اصلاً .. مجرد اني انتظر .. وده اصعب حاجة عليا في الدنيا
.. أني ابقي مسلوبة الحيلة تماماً ومش بأيدي أي حاجة اعملها عشان انقذ باقر ..

بانتظر بس .. وادعي .. وانتظر .. وادعي .. وانتظر ..
#الحرية_لباقر


#FreeBaker

<https://bit.ly/3Pp4q1v>

عن صفوان ثابت

دخلت زياره ل بابا انهارده
بابا خاسس اكثر
شكله مجهد جداً
بيحاول يقنعني انه كويس عشان ما اقلقش ! بس باين اوي انه مش
كويس!!
بابا بعد اسبوعين حيبقى ٧٦ سنه!
المسئولين عن حبسه.. هم المسئولين عن التدهور دة
بجد كفاية كدة !

<https://bit.ly/3LoXU7p>



19 مايو

عن هشام فؤاد



الحرية لهشام فؤاد

<https://bit.ly/3wZkxuj>

عن مصطفى النجار
لا أحد يعوض مكان الاب
اللهم رد مصطفى إلينا ولا تحرم اولادى من ابوهم
<https://bit.ly/3lvt96h>

عن معتز عبد الوهاب
صباح الخير
انا اتقالى انت محتاج اخوك معاك بس!
دى حقيقة انا عايش مستنيك بس واى حاجة تانية فا هي بعديك ، انا بحاول اقتل الوقت وانا منتظرك
واحلام اليقظة اننا مع بعض وبنحكي ونخرج ونسمع مزيكا ونعمل افلام وازعلك واجى اصالحك ، كل
حاجه واقفة عليك الحياة وقفت من يوم غيابك، سنتين و١٤ يوم كل يوم عندى امل انك تكون معنا
في لحظة ، عيد ميلادك ال ٤٥ كمان ٢٢ يوم يارب نحتفل بية مع بعض من غير حزن ولا وجع ، يارب
ياميزو
<https://bit.ly/3yPZ5KO>

20 مايو

عن محمد عادل

ممكن كفاية علينا سجن لحد كده، معلش ع الكلمتين
الى قالهم، وحقيقي هو مش عاوز يتكلم تاني، ممكن
تسيبونا نعيش بعيد عن السجون !
#الحرية_لمحمد_عادل
Mohammed Adel
<https://bit.ly/3G6udqT>



عن معتز صبيح
اللهم سخر لابني معتز جنود الارض وملائكة السماء وكل من وليته امره وارزقه حظ الدنيا ونعيم
الآخرة ويسر له كل امر عسير
<https://bit.ly/3ls5TGm>

عن معتز حسب النبي

معتز اتحبس بسبب صورة نزلها عالفيسبوك و هو ماسك ورقة مكتوب عليها الحرية لموكا !!
معتز مش متورط في تحريض و لا اخترق القانون بأي شكل .. !
كل تُهمته انه شارك بالتدوين عن صاحبه اللي حياته في خطر..
عندي أمل كبير ان معتز يخرج قريب و يكون وسط أهله و حبايبه و يشوف حياته اللي اتحرم منها بدون وجه حق.. ادعوله يخرج بالسلامة عن قريب.
هنفضل نطالب ب حُرية صحابنا و زمائلنا المحبوسين ظُلم لحد ما يبقوا وسطنا بخير..
#الحرية_لمعتز_حسب_النبي



<https://bit.ly/3sN9tyQ>

عن انس البلتاجي

أنس هيخرج امتي ؟
امتي يتم السماح لأنس محمد البلتاجي بأنه يكون خارج أي حسابات سياسية اتوجدت قبل ما يتم ١٨ سنة!
أحكام دوائر الإرهاب بالبراءة لم تشفع لأنس !
<https://bit.ly/3lwAnqL>



21 مايو

عن عبد الله محمد صادق

ياحبيبي أين أنت ♥
غاب عقلي حيننا غبتنا
أين أنت اليوم انت
في سجون الظلم انت
ياحبيبي لست أدري أين أنت ♥
غبت يوماً ثم شهراً ثم دهنراً ما أوتيتنا..
في سجون الظلم انت



يا حبيبي لست أدري أين أنت ♥

غاب عقلي حين غبتا

أين أنت اليوم أنت

فك الله أسر الحبيب الغالي ((عبد_الله)) ❤️ كم اشتقت إليك والي سماع صوتك في البيت وحشتني إلى حد السماء بدعيلك كل يوم وكل ساعه وكل دقيقه اني ربنا يحفظك ويوقفلك اولاد الحلال اكيد ❤️ بعد إختفاءك السنين دي كلها ملامحك اتغيرت قضيت احلى سنوات عمرك وانت خلف القضبان_ بعيد عنا ياترى عامل اي يا حبيبي سامحنا يااضي ❤️ العين على التقصير عجزنا عن كل شيء لا نملك لك الا الدعاء ربنا يفك اسرك ويفرج كربك ويطمنا عليك عاجلاً غير آجل يارب العالمين 🍀

<https://bit.ly/39H1b50>

عن عمرو وإمام (أخلي سبيله)

الصبر حرفياً بنشحته ونعطي أنفسنا أمل ولو كذباً لكي نتمكن من التعامل مع الألم .
يوم ٢٤ ابريل خرج لنا وللجميع خبر رسمي من بعض نواب مجلس الشعب ومسئولى لجنة حقوق الإنسان بقرار بالعفو عن ٤١ سجين وإخلاء سبيل محبوسين احتياطياً. ومن بينهم المحامي عمرو امام. كما نشر الخبر إعلامياً وبالفعل خرج الجميع ما عدا عمرو في موقف غريب وغامض والسبب ما هو إلا خطأ بسيط في الإجراءات وخلال أيام معدودة عمرو هيكون معاكم دا على لسان السادة أعضاء لجنة العفو وكذا أعضاء مجلس النواب.

ثم جاء وعد قبل نهاية رمضان. ثم جاء وعد قبل العيد أو في العيد. ثم مر الاسبوع الماضي بالوعد الأخير أنه خلال الأسبوع ..

ويمر الوقت ومخلصش أى حاجة ومش عارفين سبب واحد لتأخير خروج عمرو مع تأكيد الجميع لنا أن عمرو اسمه في القائمة. بخلاف أنه تجاوز بالفعل مدة الحبس الاحتياطي القانونية عامين وفوق منهم ٧ شهور !

عمرو المحامي المدني والأب والابن.. عمرو المحبوس احتياطي انفراديا منذ عامين ونصف. مازال يتسائل لماذا لم يخرج؟ ومازلنا نسأل ومفيش رد واضح وصريح.

ليه عمرو مخرجش وليه مطلعش له قرار باخلاء السبيل ومين المتسبب في عدم تنفيذ قرار العفو الى المفروض خارج من رئيس الجمهورية على لسان أعضاء مجلس الشعب اللي نشرت الخبر .

طيب بلاش سؤال ليه. لكن امتي؟ امتي هيخرج. بلاش تجاوبوا علينا احنا.. بنطلب رد على ابنه الطفل الصغير الذي عرف بقرب رجوع والده له وانتظره بلبس العيد وانتظر حضوره حفل تخرجه من الحضانه ولم يحدث !

شهر اصعب من سنتين ونص حبس.. الانتظار مميت.. فرحة سيف انه هيشوف عمرو وانكسار الفرحة لطفل مشفش باباه من اكثر من سنة ونص. فرحة أمى وسعادتها باخيرا هتشوف ابنها وأنها اخيرا هتاخده في حضنها .

احنا بنطالب ببسط حقوقنا الرد على تساولاتنا ليه عمرو الوحيد اللي مخرجش من القائمة وليه سبب التأخير. أو بس رد واضح ووعد حقيقي بامتى. امتى يخلص الكابوس ده؟

تعبنا وهو تعب.. كنا قولنا الكابوس خلص وراح لحاله وهنودع طرة بزيارتها بحكاويه المؤلمة بالضغط النفسى والعصبي في كل زيارة لهنالك ودا كلام إى اهل مروا بنفس الظروف هيحسوا به. قولنا هيخرج ويرجع لحياته الطبيعية ونرجع لحياتنا ونقفل الباب ده ورانا ونتعافى من التجربة..

بنتمنى أنه يترد على تساولنا ليه عمرو مخرجش. وطبعا لسه متمسكين بالأمل انى عمرو يبقى معنا فى وسطنا قريب وهنفضل متمسكين بالأمل برفع الظلم عنه ويرجع جزء بسيط من حقه أنه يبقى وسط أهله ومع ابنه ويرجع لشغله ولحياته الى وقفت من سنتين و٧ شهور...
#الحرية_لعمرو_امام

<https://bit.ly/3MDep1m>

عن خالد سحلوب

آلاف الأيام بتعدي وخالد فى مكان غير آدمي لا يليق ابدا
بالمكوث ثواني وليس إقامة أكثر من ٨ سنوات !!
آلاف الأيام بدون زيارة بدون شمس بدون حرية !
- شقيق المعتقل خالد سحلوب

<https://bit.ly/3LEoFEY>



عن رؤوف خطاب

صباح الخير
انا مش أم ولا زوجة وللأسف ولا ابنه.. معاناتي مضاعفه علشان بس اشوف عمرو رؤوف واطمن عليه
لانه زوج امي ... نفسي يخرج و مروحش نيابات وسجون تاني .

#مش_عاوزه_اروح_هناك_تاني

#الحرية_لرؤوف_خطاب

#قضيه_مجلس_الوزراء

<https://bit.ly/3ailEgT>

عن محمد ربيع علي محمد (حصل على إخلاء سبيل)

فعلو الهشتاج خلي صوتنا يوصل و اعملو شير للبوست كتير

#مش_عاوزه_اروح_هناك_تاني

جوزي بقالو سنة وسبع شهور فى السجن وخلص تعبت وعايزاه يرجع لبيته ولولاده كفاية كده

باسم 12 ام و زوجه مش عايزه تروح المكان ده تاني

580 يوم وجوزي بعيد عن بنته اللي سابها عمرها 7 أيام بقى عندها سنه وسبع شهور ومحتاجه

أبوها وهو هيموت ويحضرها وأنا بجد تعبت من الزيارات ومش عايزه أروح انا وبنتي تاني السجن

أزورو.... عايزه يخرج بقى ويكون جنبي وجنب اولاده Tarek Elawady

Mohammed Aziz- محمد عبد العزيز

وصلوا صوتي للجنة العفو وللمرئس والد كل المرصرين
جوزي اسمه (محمء ربيع علي محمء) ياريس ومتمهم في القضية 855 لسنة 2020 عشان وقف ربيع
ساعة جوه شركته في وقفه سلميه دعت ليها نقابته وءءع من عمره سنة وسبع شهور في السجن...
خليهم يطلعوا محمء وزمايلو #موظفي_مصر_للتأمين ياريس
#الافراج_عن_معتقلين_التأمين
خرجوهم لعيالهم وزوجاتهم وبيوتهم ارجوكم
#مش_عايزه_اروح_هناك_تاني
<https://bit.ly/3sQz9uJ>

22 مايو

عن آل ثابت



فين الوعود !!؟
رابع مره انهارده نروح لمكتب النائب العام!
مافيش جديد!
#انقذوهم
#خرجوهم_كفايه_كده
Alaa Youssef
<https://bit.ly/3POp9vV>

23 مايو

عن محمء محيي الدين
1188 يوم حبس احتياطي
3 سنين و 3 شهور و يومين
كل يوم هين عندكم هو غالي بالنسبة لينا

مش يوم بيضيع في حبس احتياطي و خلاص كفاية اللي ضاع مننا عاوزة ايامنا الجاية يكون شملنا
اتلم

اسرتي حقها تعيش سعيدة كفاية 1188 يوم
اخر صورة اتجمعنا فيها و من وقتها كل صورنا و فرحتنا ناقصين
#الحرية_لمحمد_محي_الدين #مش_عاوزه_اروح_هناك_تاني #الحرية_لحبيبي
#الحبس_الاحتياطي_مش_عقوبة
<https://bit.ly/3sYql62>

عن محمد الباقر

فكره الانتظار ديه مميته بجد ما بين أمتي و ليه و كفايه المفروض اروح الشغل و اركز و أنتج و
نص عقلي في قلق و عجز رهيب تجاه باقر و النص الثاني مع ماما الي كتر الانتظار تقريبا ثلاثه سنين
مخليها لا نوم كويس و لا اكل ولا اي حاجه طيب اعمل ايه اجيب من فين طاقه لكل ده اقدر أسعدها
تبقي في حاله افضل و اساعد نفسي بجد كفايه كفايه خرجوا باقر.....
#ياباقر
#الحرية_لباقر

<https://bit.ly/3wO4383>

عن محمد رمضان

النهاردة كان في زيارة لاخو محمد رمضان في سجن القناطر و الزيارة
كانت ٥ دقائق بس علشان دخلوه متأخر . و اكتشف ان حالة محمد
في سجن القناطر صعبة جدا و انه دخل التأديب لمدة ٤ ايام لانه
طلب بشوية من حقوقه في السجن .
و ان محمد شكله صعب جدا و صحته مش كويسه ..
احنا في آخر جلسة شوفنا رمضان مش قادر بمشي علي رجله و ده
بسبب ان حالته الصحية بقيت صعبة.
التنكيل اللي بيحصل لرمضان ده بس لكونه محامي معروف
بمساعده لأي شخص محتاج في إطار القانون ..
محمد محبوس من ١٠ ديسمبر ٢٠١٨ و مافيش قضية موضوعي هو
اتدور في ٣ قضايا لدلوقتي.



لو في قانون مكانش رمضان اتحبس طول الفترة دي
#الحرية_لمحمد_رمضان

<https://bit.ly/3sYrqe6>

عن معتز عبد الوهاب

لسة راجعة من زيارة معتز (اللي بتاخذ وقت خمس ساعات في أفضل الأحوال معظمها إنتظار) بدعي يا رب تكون الأخيرة..

الإنفراجة اللي بتحصل و ترفع سقف الآمال و تزود التفاؤل بنهاية المعاناة صعبة لما يبيجي بعدها إنتظار و ترقب و قلق من الرجوع للمجهول تاني..
ربنا يفرجها على الجميع

<https://bit.ly/3MYMadm>

عن محمد الباقر

رحت سألت في مصلحة السجون .. قالولي نزلت زيارتين تبع العيد وعيد العمال ويخلصوا آخر الشهر (٣٠ مايو) .. عشان انا كنت فاكراها زيارة واحدة واخذناها في العيد

<https://bit.ly/3sVzewY>

24 مايو

عن محمود المخزنجي

للمرة الثالثة بيكون قرار النيابة حبس ١٥ يوم، محمود بالفعل مر عليه أكثر من شهر وهو محبوس، في أسرة كاملة بيتهم عقابها بقالها شهر وأسبوع، في طفلين عمرهم أربع شهور عاشوا شهر منهم بدون أبوهم

مش عارفة ده بيحصل ليه؟ ولا فاهمة ده في مصلحة مين، لكن الأكيد انه بيضر أطفال وزوجة وأم كل أملهم في الحياة إن محمود يرجع تاني لهم

#الحرية_لمحمود_المخزنجي

<https://bit.ly/3LJsvgo>

25 مايو

عن أيمن عبد المعطي

لتاني مرة تيجي معايا شمس زيارة لايمن في أبو زعبل والحمد لله لأول من من مارس ٢٠٢٠ تتشال الحواجز والزيارة ترجع في قاعة مش من ورا شبكة حديد وسلك شائك.

دي تاني مرة شمس، الابنة الصغرى لأيمن، تشوف ابوها من أكتوبر ٢٠١٩ وأول مرة يحضنها وتحضنه..بالكاد تعرفه..اعتقل وهي عندها شهرين ولما بدأت تكبر حصل الوباء ثم الإغلاق ثم تدويره ثم ظروف زيارة لا تناسب الاطفال على الإطلاق..فضل ايمن حوالي سنتين رافض أنها تزوره بالطريقة دي لحد ما اضطر يقبل دا مع طول مدة حبس احتياطي مالهاش سقف.

أيمن عبد المعطي محبوس احتياطي من أكتوبر ٢٠١٨. مفيش كلام يوصف الفترة دي وما تكبدها
جميعا، هو وكل فرد في الأسرة، من خسائر على كل المستويات.

أتمنى تكون دي اخر زيارة.

#الحرية_لأيمن_عبدالمعطي

<https://bit.ly/3MWCEYI>

عن محمد عادل محمد منصور

اتهمت منى عبدالوهاب، المراسلة الصحفية بمحافظة مرسى مطروح، ضابط
وأفراد شرطة في قسم مطروح بتعذيب ابنها حتى وفاته بتوصية من نائبة
بمجلس النواب، وطالبت بحماية شاهد إثبات على وقائع الاعتداء والضرب على
ابنها .



ووفقا لما روته عبدالوهاب في سلسلة من الفيديوهات عبر صفحتها على
"فيسبوك" وكذلك بلاغ تقدم به محاميها للمحامي العام لنيابات مطروح،
بتحرر محضر ضد نجلها محمد عادل محمد منصور حمل رقم 6300 لسنة
2022 جنح مطروح مفاده اتهام ابنها من "م.م" نجل النائبة عن محافظة
مطروح "س.ع" بأن المتوفي سرق مبلغا ماليا ومصوغات ذهبية من شقة

خاصة بالسكان رغم أن نجلها كفيف (فاقد للبصر) منذ حوالي 3 سنوات .

وأكدت عبدالوهاب لـ"درب" وجود تقارير طبية من مستشفيات حكومية متخصصة، من بينها
مستشفى الرمد في الإسكندرية، تؤكد إصابة نجلها بضمور كامل بالعصب البصري بالعينين، متهمه
ضابط شرطة في قسم مطروح بالتسبب في فقدانه بصره بعد ضربه بمسدس في مؤخرة رأسه، الأمر
الذي أدى لإصابته بنزيف في المخ، نتجت عنه الإصابة المذكورة .

وأضافت - في فيديو بثته في 15 مايو الجاري - أن قوة أمنية بقيادة النقيب "م.ع" اقتحمت منزلها
فجر الثالث من شهر مايو الحالي، وألقت القبض على نجلها بدعوى طلب استدعائه من رئيس
مباحث مطروح، على أن يعود بعد نصف ساعة، إلا أنه لم يعد من حينها .

اكتشفت "منى" في اليوم التالي أن نجلها متهم بالسرقة بناء على بلاغ من نجل النائبة المذكورة، فوكلت
محاميا لتقديم ما يفيد بفقدان نجلها البصر، إلا أنه تم حجزه لمدة 4 أيام، وإجراء التحريات من
الضابط السالف الإشارة له، قائلا إنه ضبطه في أثناء تفقده الحالة الأمنية في منطقة محدودتي الدخل
بمطروح، على الرغم من القبض عليه من مسكنه، بحسب تأكيدها لـ"درب" .

وبحسب بلاغ تقدمت به والدته للمحامي العام لنيابات مطروح "لا يستطيع المتهم السير بمفرده دون
أن يكون معه مرافق، كما أن الضابط الذي ألقى القبض عليه هو نفسه من أجرى التحريات التي أكد
فيها صحة الواقعة، رغم أنها جريمة يستحيل تصورها نظرا للظروف الصحية للمتهم، فضلا عن عدم
ضبطه وبحوزته أي أحرار من المسروقات المذكورة، أو أي أدوات تدل من قريب أو بعيد على قيامه
المتهم بارتكاب الجريمة ."

ووفقا لعبدالوهاب، استمر حبس نجلها (33 عاما) في قسم الشرطة حتى وفاته "وهو في عهدة قسم
الشرطة"، لافتة إلى أنها حين زارته في ثلاجة الموتى وجدت على رقبته آثار كدمات، وأن مأمور القسم

والضباط أبلغوها بأنه شعر بإعياء وتم استدعاء الإسعاف له، كما تم وضعه على جهاز تنفس صناعي، وأجريت له صدمات كهربائية لإنعاشه، إلا أنه فارق الحياة .

وأفاد تقرير الوفاة الصادر من مستشفى مطروح العام، بدخوله ثلاجة الموتى في الثامن من مايو الحالي، فيما أفاد تقرير استقباله بوصوله يعاني من تباطؤ شديد وهبوط حاد في الدورة الدموية، وتم عمل إنعاش رئوي له، لمدة نصف ساعة، إلا أنه لم يستجب لمحاولات إنقاذه وتوفي على إثر هبوط حاد في الدورة الدموية وتوقف عضلة القلب .

بينما أفاد التقرير الطبي الظاهري من مكتب صحة أول مطروح، بأن جسده به آثار قديمة لتعاطي إبر مخدرة، وليست به إصابات ظاهرية أخرى، وأرجع سبب الوفاة لتوقف عضلة القلب، إثر اشتباهه بجلطة في الشريان الرئوي، إثر أعراض انسحاب للمخدرات، مؤكدا عدم وجود شبهة جنائية في الواقعة .

وقالت عبدالوهاب إن المأمور قال لها "ابنك توفي نتيجة تعاطيه مخدرات وبودرة، ومات بأعراض انسحاب، وتقرير الطب الشرعي هي قول كده وهيطلع كده ."

ونشرت عبدالوهاب مستند صادر من مستشفى الرمد العام بمحافظة الإسكندرية يفيد بإصابة نجلها بـ"ضمور كامل بالعصب البصري بالعينين ."

وفي فيديو نشرته 16 مايو، أشارت عبدالوهاب إلى أن قسم شرطة مطروح لم يسلم العرض الخاص بكاميرات القسم، رغم صدور قرار من النيابة العامة - قبل 3 أيام من تاريخ بث الفيديو حسبما تذكر - بتفريغ كاميرات المراقبة بقسم الشرطة وتسليمها للنيابة للاطلاع على ما بداخلها وحول ملابسات وفاة نجلها .

في السياق، نفى مصدر أمني - بحسب ما نقلت وسائل إعلامية - وفاة نجل المراسلة الصحفية نتيجة التعذيب، قائلا إن المذكور من العناصر "الجنائية" وسبق اتهامه في قضايا بيانها كالتالي :

(2012/6612 جنح مطروح "تحرش ومحاولة الاستيلاء على مبلغ مالي" - 2016/11720 جنح مطروح "سرقة" - 2019/1478 جنحة "سكر" - 2022/6300 "سرقة") .

وأضاف المصدر الأمني أن المذكور كان محبوساً على ذمة قضية "سرقة"، وحال شعوره بحالة إعياء تم نقله لأحد المستشفيات لتلقى العلاج اللازم، وتوفي في أثناء إسعافه، وورد تقرير الجهات المختصة بأن سبب الوفاة نتيجة هبوط حاد في الدورة الدموية، وتم اتخاذ الإجراءات القانونية .

وردت عبدالوهاب على ذلك بنشر مستند صادر عن مصلحة الطب الشرعي، المنطقة الطبية الشرعية بالإسكندرية، يفيد بأن سبب وفاة نجلها "قيد البحث" وليس كما أشار المصدر الأمني بأنه نتيجة هبوط في الدورة الدموية .

وفي 18 مايو الجاري، بثت عبدالوهاب مقطع فيديو جددت استغاثتها لرئيس الجمهورية والنائب العام ووزارة الداخلية للتحقيق في ملابسات نجلها، لافتة إلى أن "الداخلية" طلبت منها تقديم شكوى رسمية لمديرية الأمن .

وشددت على أنه لا يوجد خلافات بينها وبين الداخلية، وإنما خلافها مع "أشخاص بيستغلوا سلطاتهم ونفوذهم غلط ."

وقالت عبدالوهاب في مقطع بثته 20 مايو الجاري، إنها حصلت على وعد من مديريةية الأمن بتحقيق شفاف وعادل في واقعة وفاة نجلها وتقديم الجناة للعدالة، وأنها ستتوجه للنيابة لمتابعة إجراءات التحقيق .

وأشارت إلى أنها نما إلى علمها أن هناك شاهد بقسم شرطة مطروح في عنبر 3 غرفة 15 مكان احتجاز نجلها المتوفي طلب أن يدلي بشهادته حول الواقعة، وطالبت بحمايته .
وفي 22 مايو، أشارت إلى أن الشاهد الذي كان محبوبا مع نجلها ذكر أمام النيابة، وفي مقطع فيديو سجلته له بأن نجلها "كان يتعرض للتعذيب من ضباط وأمناء شرطة ذكرهم بالاسم ومن عدد من المسجونين، لإجباره على الاعتراف بواقعة السرقة، وأن الضباط وأمناء الشرطة كانوا غير مصدقين أنه فاقد البصر ."

وقال صلاح عبدالعزيز، محامي أسرة المتوفي، إن إجراءات القبض على محمد عادل من منزله، وتحرير محضر ضده بالسرقة، والانتهاك من تحريات المباحث وعرضه على النيابة، تمت في اليوم ذاته، حيث أمرت النيابة بحبسه 4 أيام على ذمة التحقيق، حيث حضر معه المحامي عوض حميدة .
وأضاف عبدالعزيز لـ"درب" أن المحامي المذكور حاول تقديم مستندات من مستشفى حكومي تفيد بأن المتهم فاقد البصر، فطلب قاضي التحقيق منه تقديمها للنيابة .

وتابع: "بعد تلقينا نبأ وفاته، تقدمت بطلب إلى المحامي العام لنيابات مطروح للتحقيق في الواقعة، الذي أكد بدوره حرصه على صدور تقرير الطب الشرعي لبيان الصفة التشريحية للجثة، فطلبنا أن يتم الأمر بإشرافه شخصيا، مع تفريغ كاميرات قسم الشرطة ومستشفى مطروح العام الذي تم إيداعه به، للوقوف على أسباب الوفاة ."

عدد من المسؤولين في مديرية أمن مطروح أكدوا لنا أيضا حرصهم على سلامة التحقيقات في الواقعة، حيث قال مدير مباحث مديرية امن مطروح اللواء أحمد فهمي، لوالدة عادل: "إحنا عمرنا ما هنشيل دم، وإذا كان نجلك توفي داخل القسم سنحاسب المخطيء ."

ووفقا لمحاميها، حررت عبد الوهاب محضرا برقم 2398 لسنة 2022 إداري مطروح، تتهم فيه الضابط المذكور والنايبة وابنها بالتسبب في وفاة ابنها، فيما أكدت لها النيابة وقوفها على مسافة واحدة من الجميع، وحرصها على سير التحقيقات بكل نزاهة .
واستكمل: "نحن لا نريد سوى العدالة لموكلي، ومحاسبة المخطيء في التسبب في وفاته، نحن دولة مؤسسات لا أحد فيها فوق القانون ."

<https://bit.ly/3avlrHn>

عن عمرو إمام

إمبارح كان محمود في زيارة لعمرو ونتمنى تكون آخر مرة.
عمرو كويس الحمد لله و بيسلم على كل راجل جدد و (بنت الأصول)
وفرحان جدا لخروج الناس وده اللى مخليه كويس وكل حد بيخرج بيتبسط بده جدا جدا. وسعيد بموضوع الحوار الوطنى وأي جهد يتعمل بهدف إن الناس تخرج من السجن وترجع لحياتها الطبيعية..

ويتمنى أنه يكون وسطنا قريب ومع سيف وماما ومعانا ويقدر يرجع لشغله تانى ولحياته الطبيعية.
دعواتكم جميعا أنه يفك كربك عمرو وأنه يبقى في وسطنا قريب.

#الحرية_لعمرو_امام

#مش_عاوز_اروح_هناك_تانى

<https://bit.ly/3to3qBp>

عن محمد علي بشر



الأربعاء ٢٥ مايو ٢٠٢٢
وردتنا أنباء من عدة مصادر عن إصابة الدكتور
محمد علي بشر بجلطة في المخ في محبسه بسجن
العقرب استدعت نقله للمستشفى وإجراء عملية
جراحية. وقد حاولنا جاهدين الحصول عن
معلومات عن حالته الصحية عبر مصادر قانونية
وشخصية ولم نتمكن للأسف من ذلك بسبب
الحرمان من الزيارة المستمر منذ عام ٢٠١٨ ولا

يوجد أي تواصل بينه وبين المحامين .

وقد ضاعفت هذه الأنباء من قلقنا عليه وعلى وضعه الصحي في ظروف سجن قاسية مثل سجن
العقرب. وإننا كأسرته نؤمن دائما بأنه يستحق الإنصاف باستخدام كافة الوسائل المتاحة التي يكفلها
القانون للحفاظ على حياته وصحته ونؤمن بطرق كل الأبواب. ولذلك تقدمنا بطلب للمجلس القومي
لحقوق الإنسان من أجل السعي للحصول على حقوقه القانونية من خلال الإفراج الصحي وأيضا إدراج
اسمه ضمن قوائم العفو الرئاسي التي تعدها الشخصيات العامة والحقوقية من أجل إنقاذ حياته.
ولا يخفى على أحد تاريخ الدكتور بشر النقابي والسياسي والخيري طوال حياته وأيضا الدور الذي قام به
من أجل مصر في مراحل مختلفة من تاريخها. وقد آن الأوان ليتلقى معاملة إنسانية كريمة تليق بتاريخه
وبوضعه وسنه وظروفه الصحية، تلك الأمنية التي نتمناها للجميع. وكلنا أمل في عودة قريبة له ولم
شمل أسرة مكلمة ككثير من الأسر تتدثر برداء الصبر الجميل خلال السنوات السبع الماضية على أمل
أن يعود لبيته ليكمل مساره العلاجي ويرى أحفاده الذين ولد عديد منهم بعد محبسه فلم يرههم ولم
يروه.

<https://bit.ly/3PJvOap>

عن عمرو إمام

إمبارح كان محمود في زيارة لعمرو ونتمنى تكون آخر مرة.
عمرو كويس الحمد لله و بيسلم على كل راجل جدع و (بنت الأصول)
وفرحان جدا لخروج الناس وده اللي مخليه كويس وكل حد بيخرج بيتبسط بده جدا جدا. وسعيد
بموضوع الحوار الوطني وأي جهد يتعمل بهدف إن الناس تخرج من السجن وترجع لحياتها
الطبيعية..

ويتمنى أنه يكون وسطنا قريب ومع سيف وماما ومعانا ويقدر يرجع لشغله تاني ولحياته الطبيعية.
دعواتكم جميعا أنه يفك كربك عمرو وأنه يبقى في وسطنا قريب.

#الحرية_لعمرو_امام

#مش_عاوز_اروح_هناك_تاني

<https://bit.ly/3to3qBp>

عن محمد الباقر

زُرت باقر النهاردة، الحمد لله كويس، قلقان جداً طبعاً على موضوع العفو، دعواتكم ..
#الحرية_لباقر

<https://bit.ly/3Gtigfe>

عن عبد الرحمن طارق موكا

مساء الخير انا عارفة اني بقالي كتير مكتبتش اي حاجة عن موكا من ساعة ما فك الاضراب تقريبا بس
اليومين اللي فاتو اتبعثلي رسايل كتير واتسألت عنه موكا بخير بيحاول يتحسن بعد الاضراب وتدهور
صحته فيه طالب ان محدش مننا يروح دلوقتي مش عايز ماما تشوفه غير وهو زي الاول وفي كل جلسه
او زياره لحد من اصحابه بيبعثلنا مع اسرتنا انه كويس وأننا منروحش غير لما يطلب دا وقدام تأكيد
على رأيه كل مره مش قادرين غير اننا نستنى وندعي انه يبقى بخير وانه يخرجنا قريب ويبقى في حضننا
ومنضطرش اننا نقلق ولا احنا ولا كل اللي بيحبوه انا مكنتش قادرة ابقى موجودة صحيا ونفسيا الفتره
الي فاتت وقاعدة استنى بس يبقى في زيارة علشان اقول انه كويس وقلبي مرتاح اكثر للفكره دي يارب
يكون كدا يارب يخرج في اقرب وقت ولجنة العفو تراعي حالته الصحية والنفسية وكل الوقت اللي
قضاه جوه السجن

<https://bit.ly/3wR3awz>

عن مصطفى صبره

الحمد لله بعد ٢١ شهر حبس احتياطي الزيارة في ابو زعل بقت رؤية..
من غير سلك شائك ولا شبك ولا مخبرين رايعين جايين
ربنا يفك الكرب و تكون اخر زيارة
#الحرية_لمصطفى_صبرة

<https://bit.ly/3wSzBLc>

من رابطة أسر معتقلي العقرب

بيان من رابطة أسر معتقلي العقرب

تلقت رابطة أسر أهالي معتقل العقرب الأنباء المنتشرة عن وجود حالات تعذيب في سجن العقرب بقلق وغضب شديدين! على الرغم من نداءاتنا ومطالبتنا المستمرة للسلطات المصرية بالسماح لنا (بحقنا القانوني) في زيارة أهلنا المحبوسين في السجن سي السمعة المعروف بسجن العقرب - والممنوعين من الزيارة منذ 6 سنوات - إلا أن نداءاتنا قوبلت بالتجاهل التام..

وعلى الرغم من تعيين مجلس قومي جديد لحقوق الإنسان والحديث عن نج والعفو عن مساجين، إلا أن الجميع يتجاهل تمامًا الحديث عن سجن العقرب والانتهاكات التي تحدث به رغم أنها وضعة عار في وجه كل نظام وكل إنسان!!

وعلى الرغم من الإعلان عن الإستراتيجية الوطنية لحقوق الإنسان، إلا أن ظروف مسجونى العقرب لم تتحسن، وما زالت الزيارة ودخول الأكل والخبث وباقي حقوقهم ممنوعة!

ألم يكف أن أهالينا محبوسين منذ 9 سنوات، وبدلاً من البحث عن حريتهم نبحث عن مجرد زيارة، فضلاً عن إنقاذ حياتهم!!

كيف ننام الليل ونحن نسمع عن حملات تعذيب جماعي في سجن العقرب، وكل بضعة أشهر نخرج جثة ونحمن سزا!!

إلى كل إنسان وصاحب ضمير حي ..

الزيارة حق! الرعاية الطبية حق! الحياة حق!

ندعوكم لمشاركتنا اليوم - الخميس - الساعة 9 مساءً! بتوقيات القاهرة، في حملة تدوين علي هاشتاغ #طمنوننا عليهم، مع توجيه الطلب بالتحديد للنائب العام المصري @EgyptianPPO ووزير الداخلية molegy@

رابطة أسر معتقلي العقرب

ADFAssociation1

تدعوكم رابطة أسر أهالي معتقلي سجن العقرب لمشاركتها اليوم الساعة 9 م بتوقيت القاهرة بحملة تدوين علي هاشتاغ #طمنوننا عليهم، وتوجيه طلب للنائب العام المصري ووزير الداخلية بفتح الزيارة بعد أبناء عن وجود عمليات تعذيب جماعية داخل السجن.

<https://bit.ly/3PPHc4z>



منعرفش أي حاجة عن ذوينا من ٦ سنين .. ٦ سنين الزيارة ممنوعة بشكل تام عن #سجن_العقرب! والانتهاكات مبتخلصش. تايم لاين لي حصل لاهالينا وعرفناه من ٢٠١٣ لحد دلوقتي افتحولنا الزيارة و #طمنوننا عليهم

<https://bit.ly/3lQixW9>

رابطة أسر معتقلي العقرب

وفيات سجن العقرب 2013-2022	
الوفيات داخل سجن العقرب ناتجة عن الإهمال الطبي المتعمد والحرمان من الحق في الرعاية الصحية وهو حق أساسي من حقوق الإنسان	
وفاة أحمد عبدالله	٢٠ يونيو ٢٠١٨
وفاة محمود عبد المجيد محمود	٤ يناير ٢٠٢٠
وفاة عمرو أبو خليل	٦ سبتمبر ٢٠٢٠
وفاة عصام العريان	١٣ أغسطس ٢٠٢٠
وفاة حمدي حسن	٢٥ نوفمبر ٢٠٢١
وفاة نصر الغزلاني	٩ ديسمبر ٢٠٢١
وفاة "هشام القاطي حنفي	٢٩ ديسمبر ٢٠٢١
وفاة علي كساب	٢٢ مايو ٢٠٢٢
وفاة فريد إسماعيل	١٣ مايو ٢٠١٥
وفاة نبيل المغربي	٤ يونيو ٢٠١٥
وفاة مرجان سالم	٥ أغسطس ٢٠١٥
وفاة عصام دربالة	٩ أغسطس ٢٠١٥
وفاة عماد حسن	٢٧ سبتمبر ٢٠١٥
وفاة محمد السعيد	٢٩ أكتوبر ٢٠١٥
وفاة رمضان جمعة	٣١ يوليو ٢٠١٦
وفاة مدحت أبو شيتة	سبتمبر ٢٠١٧
وفاة حسام أحمد محمد مروان	٥ يناير ٢٠١٨

تعالوا استلموا الجثة "

دا اللي سمعه العديد من أهالي المحبوسين في #سجن_العقرب [PDI] بعد منع من الزيارة لسنوات [RLI]!

حتى لحظة الوداع اتحرموا منها!

من حقنا نشوف أهالينا ونظمن عليهم!

كل الوفيات نتيجة للإهمال الطبي والحرمان من الرعاية الصحية!

<https://bit.ly/3PLZV12>

عن أمين الصيرفي

بقالنا فترة بيوصلنا أخبار إن في حملات تعذيب في #سجن_العقرب1، أقصد #مقبرة_العقرب،

أوووووووه أقصد #مقبرة_الأحياء.

ولأننا كأسر ممنوعين من الزيارة من أكثر من 6 سنوات، معندناش ولا وسيلة اطمئنان واحدة نظمن

بيها على أهالينا.

كل الأهالي في حالة تخبط وتخوف شديد، وللأسف مش قادرين نظمن بعض لأن مفيش حد عنده

معلومة.

افتحولنا الزيارة و #طمنوننا_عليهم

<https://bit.ly/3t0oduw>

اتكلموا عن اهالينا و ساعدونا نوصل صوتهم!

بقالنا سنين لا عارفين نتواصل معاهم و لا نتظمن عليهم

و فوق ده كله نعرف بحملات تعذيب!

اتكلموا عنهم و كونوا صوتهم و متخذلوهمش

#طمنوننا_عليهم

letusseethem#

<https://bit.ly/38oezKX>

27 مايو

عن خالد عز الدين

بصى كدة دققي في الصورة يمكن يكون زوجك.
شكرا إلى بيهتم ويبيعت ويحاول يساعد حتى لو ما وصلناش لحاجة ... شكرا إلى لسة فاكر خالد لحد
النهاردة ويبيدعيه وعنده أمل زي يرجع ... شكرا للقيلة القليلة جدا اللي بتوصل لينا انها حاسة بينا
وباللي زيننا ... الحمد لله ... ربنا يرد لي خالد سالما ويجمع بينا في فضل وعافية وكل من مثلنا عاجلا
غير آجل.

#خالد_عز_الدين_فين؟

<https://bit.ly/3LSYzyg>

عن محمد الباقر

زُرت باقر النهاردة، الحمد لله كويس، قلقان جداً طبعاً على موضوع العفو، دعواتكم ..
#الحرية_لباقر

<https://bit.ly/3Gtigfe>

عن عبد الرحمن طارق موكا

مساء الخير انا عارفة اني بقالي كتير مكتبتش اي حاجة عن موكا من ساعة ما فك الاضراب تقريبا بس
اليومين الي فاتو اتبعثلي رسايل كتير واتسألت عنه موكا بخير بيحاول يتحسن بعد الاضراب وتدهور
صحته فيه طالب ان محدش مننا يروح دلوقتي مش عايز ماما تشوفه غير وهو زي الاول وفي كل جلسه
او زياره لحد من اصحابه بيبيعتلنا مع اسرتنا انه كويس وأننا منروحش غير لما يطلب دا وقدام تأكيد
على رأيه كل مره مش قادرين غير اننا نستني وندعي انه يبقى بخير وانه يخرجنا قريب ويبقى في حضننا
ومنضطرش اننا نقلق ولا احنا ولا كل الي بيحبوه انا مكنتش قادرة ابقى موجودة صحيا ونفسيا الفتره
الي فاتت وقاعدة استني بس يبقى في زيارة علشان اقول انه كويس وقلبي مرتاح اكثر للفكره دي يارب
يكون كدا يارب يخرج في اقرب وقت ولجنة العفو تراعي حالته الصحية والنفسية وكل الوقت اللي
قضاه جوه السجن

<https://bit.ly/3wR3awz>

27 مايو

عن خالد الدين

بصى كدة دققي في الصورة يمكن يكون زوجك.)
شكرا إلى بيهتم ويبيعت وبيحاول يساعد حتى لو ما وصلناش لحاجة ... شكرا إلى لسة فاكرا خالد لحد
النهاردة وبيدعيه وعنده أمل زبي يرجع ... شكرا للقيلة القليلة جدا اللى بتوصل لينا انها حاسة بينا
وباللي زيننا ... الحمد لله ... ربنا يرد لي خالد سالما ويجمع بينا في فضل وعافية وكل من مثلنا عاجلا
غير آجل.

#خالد_عز_الدين_فين؟

<https://bit.ly/3LSYzyg>

28 مايو

عن هدى عبد المنعم

انا محتاجة ماما جدا ومبقاش في طاقة لتحمل البعد أكثر من كده والله !!
بأي حق تحرمونا منها بالمنظر ده ؟ !
ليه كل ده وعشان ايه ؟!!
كفاية ٣ سنين ونص ظلم كفاية اوي

FreeHoda#

<https://bit.ly/3MY8unF>

عن أحمد أسامة

زيارة بدون سلك
بعد أكثر من عامين ونصف

اليوم وبفضل الله تعالى علينا زرنا بدون سلك
أوحواجز بعد أكثر من سنتين ونصف
إختلطت المشاعر علينا لم نعد نستطيع أن نللم
شقات أمورنا، ما ألمنى حقا هم الأولد ما إن وصلنا
إلى المكان وبدأ الخناق على من يسلم ويقبل
والسدهم أولا ما إن دخلنا للزيارة فوجئنا جميعا
بشخص أكر أكل الشيب وجهه ورأسه الأمر الذى جعل
ابنتى الكبرى تدخل فى حاله بكاء جعلها لم
تستطيع أن تلتقط أنفاسها (بابا وحشنى أوى يا ماما
شكله اتغير أوى
والله ما هون علي وجبر بقلبي أن جرح من جروحنا
إلتئم اليوم

حفصة علي
زوجة المعتقل أحمد أسامة

Haqum

زيارة بدون سلك أو حواجز بعد أكثر من سنتين ونصف

<https://bit.ly/3wTmrO1>

عن عمرو إمام

رسالة شكر وامتنان.. للسيدة مشيرة خطاب رئيس المجلس القومي لحقوق الإنسان :
اهتمام وسرعة استجابة أعطت قلبي نبضاً كاد يفارقه. أشكر السيدة الدكتورة مشيرة خطاب رئيس
المجلس القومي لحقوق الإنسان على سرعة إستجابتها وتواصلها بشكل شخصي معي عبر مكالمة
هاتفية وقبل مرور ٢٤ ساعة على خطابي العلني الموجهة إليها. "لينك الخطاب في التعليقات."
حيث تواصلت معي ليس كمسؤولة فقط تحترم مسؤوليتها ومهام عملها إنما كأُم وامرأة مصرية تتفهم
وتشعر المعاناة التي تقع على كاهلي وكاهل الأسرة من جراء الغياب الطويل لابنها الكبير ووقوعنا في
ظلمات السجن منذ عامين و٨ أشهر.

طلبت مني السيدة مشيرة في مكالمة هاتفية عصر يوم الجمعة الماضي، التقدم بشكوى رسمية عبر
موقع المجلس القومي لحقوق الإنسان حول وضع ابني المحامي "عمرو امام" وقد فعلت فور انتهاء
المكالمة وتقدمت بالفعل بالشكوى رقم "٢٢٠٥-٣٠٨٢.."

كما حصلت منها على وعد باقتراب الفرج ونهاية الكرب. وأنها تسعى في كل المساعي لإنهاء أزمة
المحبوسين احتياطياً على خلفية قضايا رأي. وإن اسم نجلي "عمرو امام" الذي تردد كثيراً في أخبار
متخبطة عن خروجه ضمن الدفعة السابقة في أواخر شهر إبريل سوف يتحقق قريباً بإذن الله خروجه
حقيقية وعودته لحياته الطبيعية ولابنه ولحضني.

وأنا إذ أؤمن وأقدر تواصلها السريع واهتمامها وشعورها الطيب وأتوجه لها بالشكر علانية. فأني أيضاً
أعيد توصيل صوت ابني ورسالته من داخل محبسه الإنفرادي بسجن طره.

إذ لازال كما كان دائماً حريصاً على دعم أي مسار سلمي وكل محاولة للحوار والتوصل لحلول عقلانية
لأية مشكلات. فهو الآخر يقدر كافة الجهود التي تسعى لإنهاء تلك المحنة ويرجو أن تستمر حتى خروج
آخر سجين رأي. ويثمن مجهودات المجلس القومي لحقوق الإنسان وكذا لجنة العفو والعاملين في
المجتمع المدني والمهتمين بقضية حرية سجناء الرأي بشكل عام أيضاً. ويشكر كل وأي صوت عاقل
يحاول حل تلك الأزمة ويرفع ثقل الظلم عن كاهل الوطن .

لازلت انتظرك يا عمرو في كل ليلة وفي كل صباح. وعذرا يا بني على دموعي فهي من قسوة الألم لا من
إنقطاع الأمل. أمني في الله وفي القلوب والعقول الواعية لن ينقطع مادام بي نفس.

#الحرية_لعمرو_إمام

#مش_عاويزة_اروح_هناك_تاني

<https://bit.ly/3GxgPfr>

عن سيد عبد اللاه



خلصت الزيارة بعد معاناه عشان اعرف ادخل لاني نسيت شهادات الميلاد وسيبتهم لوحدهم ال ٣ عالباب السجن واول ما رجعت مروان قاللي كنت بدعي ربنا أنه يحمينا واحنا لوحدهنا . نيجي للجزء الأهم للاسف النهاردة شوفت شخص غير اللي كنت اعرفه تماما حطام انسان شخص عنيف حاد يحاول يكون لطيف معنا لكن مش عارف ده مش سيد ابدا اللي اعرفه ردود أفعاله صعبه وغير متوقعه ده غير فقدانه للوزن بشكل ملحوظ (جوزي بيضيع مني انقذوا سيد عبداللاه) وللأسف انا كمان وصلت لمرحلة صعبه جدا حتي مقدرتش اواسيه من سوء الحالة اللي وصلتها . واللي صعب الوضع اكثر أنهم رفضوا الولاد تسلم عالسيد وده لوحده كسر سيد جدا جدا جدا .ه غير الحالة النفسيه لأولادي طبعا , وكل اللي بيقوله انا عايز اخرج عشان أحدكم فحضني ، ولما سألته اسر كبر صح سكت ماردش كررت السؤال ثاني لانه كان سرحان بس اتضح أنه كان مركز معايا جدا لانه قاللي كبر بس مش فحضني .اسرتي انهارت خلاص لا أنا قدرة اقاوم ولا سيد قادر احنا الاتنين الكلمه اللي أصبحت علي لسانا (انا بموت)

انقذوا ما تبقي من حطام اسرتي

#الحريه_الصحفي_سيد_عبداللاه

#مش_عاوزه_اروح_هناك_ثاني

<https://bit.ly/3GrYrot>

29 مايو

عن محمد عادل

بكرة أخيراً زيارة رؤية، الزيارة دي مختلفة شوية عشان المرة دي مش ف سجن المنصورة، المرة دي ف سجن جمصة شديد الحراسة، عمري ما روحت هناك ف لسه هروح أتعرف ع المكان (السجن) وأدينا بنتفسح ف سجونك يا مصر 🇪🇬

Mohammed AdellAdel اتنقل سجن جمصة عشان الامتحانات، ومن المفترض إن سجن المنصورة كله هيتنقل سجن جمصة ف يوليو الجاي وسجن المنصورة هيتهدم! ادعوا لنا تكون زيارة حلوة، وتكون آخر زيارة ومحمد يخرج بقي.

والله رغم كل حاجة حاسة إن بكرة العيد ومش عارفة أنام وهتعذب الصبح أنا عارفة 😊

#الحرية_لمحمد_عادل

<https://bit.ly/3GvQj6v>

عن صبحي صالح

قلوبنا ما بقيتش بتتحمل أخبار الموت بلاهمال
الطبي و التعذيب
داخل #سجن_العقرب بنموت بالبطئ كل يوم من
القلق على بابا كفاية #افتحوا_الزيارة عاوزين نضمن
عليهم
-ابنة المعتقل المحامي صبحي صالح

<https://bit.ly/3m1gUPj>



30 مايو

عن عبد الرحمن طارق موكا

انا لسه صاحية وعارفة الخبر قلبي هيقف من الفرحة يارب تكمل على خير مش هرتاح غير لما اشوفة
قداي

<https://bit.ly/3N1wm9S>

رحمة اختي وصحاب موكا راحو طره وهناك قالولهم ان موكا هيخرج من القسم وبعدها طلعو على
القسم وهناك قالولهم ان لسه محدش راح القسم وغالبا لسه قرار اخلاء السبيل موصلش للسجن
وهنستني لبكره يارب موكا يبقى هنا في اقرب وقت ماما الفرحة مش سيعاها بجد ومش ناقص غير
نلاقية قدامنا ونصدق ان دا حصل

<https://bit.ly/3z4HkY8>

عن محمد الباقر

#ياباقر

رحت مع ماما النهارده عشان تزور باقر الاستثنائي بتاعت عيد العمال و للاسف تم رفض الزياره و بسال
نفسي من سعتها ليه. طبعا الطبيعي ال (لا) اجابه و بحاول استوعب أن في ناس عندها طاقه لا
متناهية من الظلم و التعايش معاه أنه عادي جداااا، انا بحاول اجيب طاقه لاستيعاب كل حاجه
بتحصل ملهاش منطق بقيت اه صح هو عبد المأمور..... ماما حقيقي رفضه كل الي بيحصل و مش
قدره تتقبل الجنان ده و كانت فرحانه أنها هتشوف ابنها الحمد لله على كل حال.

#الحريه_لباقر

<https://bit.ly/3IUglXz>

سنة عبد الجواد

لن نقطع الامل في الله ونحسن الظن به الى نهاية اعمارنا، وسنظل نطالب بحق انس في الحرية من بعد ما يقارب ٩ سنوات حبس انفرادي، اخذتم زهرة شبابه في السجن والحبس الانفرادي ما هي تهمة انس اذا كان ما اتهم به اخذ فيه عدة احكام بالبراءة من محاكمكم؟ ثم ومن بعد انتظار خروجه يتم تدويره على نفس القضية التي تم تبرئته منها، وهو الان في الحبس الاحتياطي منذ سنتين ونصف وبالمخالفة للقانون .. اذا كانت هناك قوانين؟!

انس المظلوم اللي ينتقم منه من غير تهمة حقيقية سوى انتقام من ابيه وتصفية حسابات

ليه انس محبوس انفرادي

ليه انس ممنوع من الزيارة

ليه انس لا يخرج تريض ولا يرى الشمس

ليه انس ما بيكملش دراسته

ليه انس ممنوع من الكتب كلها ولم يرى بياض الورقة ولربما نسي مسكة القلم او لمس كتاب بيده او

رؤية بشر

في اي شريعة واي قوانين في الدنيا بتقول ان في ابن بيدف فاتورة انتقام من ابيه

خرجوا انس ماشبعنوش انتقام

كفاية ظلم

حسبنا الله ونعم الوكيل

اللهم فرجا من عندك لأنس ووالده وكل المظلومين.

<https://bit.ly/3ahh56x>

عن عبد الرحمن طارق موكا

انا عارفة ان كل الناس قلقانة وعايضة تظمن على خروج موكا ووالله احنا مش قرين نصبر ولانستنى اكثر

ناس بس لسه مفيش جديد واللي عرفتة انه إن شاء الله على يوم الخميس يكون وسطنا مش فإيدنا

غير نستنى ربنا كريم يعدي الوقت بسرعة

<https://bit.ly/3z8YtQo>

1 يونيو

عن معتز عبد الوهاب

حوار غريب مع يوسف

بيقولي هو انتي لو موتي هنروح ال Orphanage؟!

قولتيه ليه يا يوسف بتقول كدة باي هيبجي قريب ان شاء الله

قالي طيب لو ماجاشهنروح..؟!

استغربت من افكاره دي بس اكيد هو مش حاسس بالأمان و بيقلق لما أتأخر عليهم في المدرسة و عنده اسئلة كتير بتدور في عقله ليه معتز غايب كل المدة دي و كل ده في شغل ؟ و ليه مش بيتكلم في التليفون..

معتز أب مش عادي أهم حاجة عنده ولاده و ازي يتربوا كويس، كان متواجد في حياتهم دايمًا ، مصاحبهم و بيكلمهم كأنهم كبار بيحبهم كتب طول الوقت ..زينة كانت بتروح معاه التصوير كتير و شجعها تتعلم بيانو وحاجات كتير و يوسف كان عايز يعلمه حاجات كتير بس مالحقش.. مفتقدينه كلنا يا رب الكابوس اللي احنا فيه ينتهي .. و يرجع معتز

<https://bit.ly/38Ku0gl>

عن عبد الرحمن محمد حسن

بكره ذكرى ميلاد زوجي حبيبي اللي فقدت جسده منذ ٨ سنوات ولكن تظل روحه ملتصقة بخطواتي. لا تفارقها ما دمت حية

زوجي اللي ضاع من عمره ٨ سنوات داخل سجون الظلام. تشهد جدرانها على رجولته وتدينه واخلاقه.. وتشهد على اجمل ايام عمره اللي قضاها جوه احضانها.. لكن عزائنا ان ما عند الله باق ادعوله ينول حريته ويجمعني بيه على خير...رسالة مروة أبوزيد زوجة المعتقل عبد الرحمن محمد حسن في سجون السيسى منذ 8سنوات والمحكوم عليه بالسجن المؤبد وذلك في ذكرى ميلاده والتي عبرت فيها عن حزنها لفراقه وضياح عمره خلف القضبان ،فهي يقبع في سجن العقرب شديد الحراسة ممنوع من الزيارة ومن جميع مقومات الحياة.

<https://bit.ly/3xhk8ER>

عن عبد المنعم أبو الفتوح

في كل مرة نتوجه فيها للرأي العام أو للمسؤولين بالحديث عن قضية الدكتور عبد المنعم ابو الفتوح نخاطب عقولهم وضمائرهم. ونحرص دائما أن نقدم صوت العقل والحكمة، ولا نبالغ في الكلمة، ونتحرى الصدق فيها، في قولها وفي نقلها .

نُعرب عن صدمتنا تجاه الأحكام القاسية الصادرة بحق الدكتور عبد المنعم أبو الفتوح ونجله أحمد. والتي أضافت لأوجاعنا المتراكمة ما لم نتوقعه مطلقا. كان وقع الأحكام علينا مؤلم ومربك حقا. وهَمَّنَا الأول منذ يوم الحكم هو الاطمئنان على صحته وصحة أحبائه .

خلف كل ذلك الشموخ والتاريخ السياسي المشرف آلام كثيرة، يُخفيها عنّا لطفا ورحمة. وما يعانیه في محبسه على مدار أربع سنوات وأربعة أشهر في حبس انفرادي وفي ظروف شديدة القسوة ليس بهيّن بأي حال. وخلف كل ذلك أيضا بحر من الحب والتسامح، وجبل من التضحيات هو رفيقة عُمر ضحّت وتحملت الكثير وتصبر. وآلامها لا تقل بأي حال عن آلامه، والآن أكثر .. الآن أكثر. بعد النطق بالحكم مباشرة كان يوصينا عليها قلقا ورعبا. يدرك وقع تلك الاحكام جيدا ولا ينشغل بوجعه عنها أو عن نجله .

تمهلوا رجاءاً، وتذكروا أننا بشر كالبشر، نحزن ونتألم كالبشر، ونموت كالبشر. نكره الظلم بشدة، وندينه ونستنكره، ونبرأ إلى رب عليم رحيم منه، ونكره القسوة، ولا نكره بشرا أبداً ولسنا أعداء لأحد. ونحب العدل ونتوق اليه، ونحبه للجميع، وبلا استثناء. ولا نعرف طريقاً للعدالة بغير حب للوطن والانتماء إليه أو في غير احترام للدستور والقانون .

منذ اليوم الاول لحبسه، التزمنا كافة المسارات القانونية أملا في العدالة الناجزة، واجتهد في سبيل ذلك فريق دفاع عظيم من أنبل شرفاء هذا الوطن نساء ورجالا، ممن آمنوا بالوطن وحقوق البشر، وتحملوا في سبيل ذلك الكثير من الألم، وتمسكوا بالحق رغم كافة التحديات والصعوبات التي واجهتهم، انتصارا له وانتصارا للعدالة من أجل الوطن. نحبكم جميعا ونحب نضالكم من أجل الانسانية والعدالة، ونقدّر كافة جهودكم الغالية، ونعتز بكم جميعا، وبكل لحظة كنتم فيها معنا على مدار السنوات الماضية. وسنظل نراهن عليكم دائما، وكل المخلصين المحبين لبلدنا الغالي مصر. فالشكر والتقدير والعرفان لكم جميعا .

قد صدرت تلك الأحكام عن محاكمة استثنائية ليست كالقضاء العادي، فلا يتاح فيها من الأصل أية درجات للتقاضي، بلا استئناف او نقض، وحكمها نهائي ينتظره فقط تصديق رئيس الجمهورية أو من ينوب عنه. وبعد صدور قرار الرئيس بانتهاء مد حالة الطوارئ في أكتوبر الماضي، توقعنا معه أن تُقدّم قضية دكتور أبو الفتوح إلى القضاء العادي، وخاصة في ظل الرغبة والتوجه المعلن نحو اصلاحات سياسية، وكنا نتوقع خلالها أن يتم التخفّف من المسارات القانونية الاستثنائية والانحياز لمسارات التقاضي العادية ولكل ما يُهيئ للوطن البيئة المحفزة للاستقرار السياسي .

لذلك، وحيث ان تلك الاحكام تنتظر الان التصديق عليها، نوجّه نداءً إلى كل المعنيين بالأمر نطلب منهم عدم التصديق عليها بعد أن صدرت عن محاكمة استثنائية افتقرت، لأسباب اجرائية وموضوعية الى ضمانات العدالة المستقرة لدى القضاء العادي. ونرى في عدم التصديق عليها انتصار للعدالة وإعلاء لشأن القضاء المصري .

نستقبل أنباء الافراجات بفرحة لكل من نال حريته ولأهلهم جميعا. نهنتهم جميعا على حريتهم الغالية، وندعو لهم ولأسرهم. كما نثمن ونقدّر كل الجهود المبذولة من كل الجهات المعنية من أجلها، ونتمنى لها التوفيق وأن تستمر وتمتد إلى جميع شرفاء الوطن .

أسرة الدكتور عبد المنعم أبو الفتوح
القاهرة

الأربعاء، ١ يونيو ٢٠٢٢

<https://bit.ly/3mdvHXi>

2 يونيو

عن زياد العليمي

الحمد لله البخاخة دخلت لزياد. ربنا يكرمها Mahienour El-Massry اتصرفت!! وربنا يكرم الشباب اللي راحوا جابوا البخاخة.. ما تتصوروش الاحساس بالرعب لما تكون عارف ان ضناك مش قادر يتنفس ومضطر تستنى يومين على ما تقدر تدخل له اللي يخليه يتنفس.

<https://bit.ly/38P0SVM>

انشغلنا من الصبح في اخبار خروج الجدعان والاطمئنان عليهم .. وبعدين جت الخضة بتاعة احتياج زياد البخاخة! قبل ما تنجدنا الجميلة ماهينور والجدعان اللي جابوا البخاخة ووصلوها السجن قبل اجازة الاسبوع! ومالحقتش اقول لكم ان ربنا اكرمني امبارح بزيارة رائعة من الجميل Walid

Ahmed Shawky

والجميلة عن وليد شوقي ومعاهم ست الحلوين نور. ربنا يسعد أيامهم ويعوضهم افراح كثير تنسيهم المحنة ويملا بيتهم بركة وأفراح.. قد ايه كانت زيارتهم بلسم يطبب على قلب الواحد. احيانا تحس انك قد كده ممتن وعاجز عن الشكر، فيبقى كل اعتمادك على ربنا وحده يكافئ الطيبين ويجازيهم خير

<https://bit.ly/3MgbRoE>

عن أحمد سبيع

بعد تجديد حبسه ..زوجة الصحفي أحمد سبيع المعتقل منذ أكثر من عامين في سجون السيسي متى تنتهي هذه المعاناة ألم يكفي أربع سنوات ما بين السجون والأقسام ومنع من الزيارة ،ارحموا أولادى الذين كبروا ووالدهم خلف القضبان وطفلى الصغيرة التى تبكى ليل نهار تسأل عنه ...

<https://bit.ly/3mdjRMK>



3 يونيو

عن سيد عبد اللاه

مروان صحي بيقول لي انا حلمت أن باي رجع وجاب لنا لعب كثير وكل المشاكل خلصت ، فالحلم قوتل انا بحلم ومش عايز اصحي بس صحيت وطلع فعلا حلم .. حبيبي وهو بيحكيلي كانت عالوشه ابتسامه دايبه فالدموع اللي نازله عالخده الرقيق
#الحريه_للصحي_سيد_عبدالله
#مش_عاوزه_اروح_هناك_تاني
<https://bit.ly/3PZ0AMQ>



عن أحمد حسن مصطفى

امبارح كان يوم حقيقي مش عادى علاء كمان بقي علي الاسفلت وخلود سعيد موكا ودكتور يحي ودكتور محمد محي وناس كثير علي مدار الاسبوع الي فات والي قبله وقبلهم ابراهيم بس لسه لينا ناس تانيا جوة لسه احمد اخويا ولسه هيثم وباقر وناس تانيا اتمني الفرحة تملأ كل البيوت وحقيقي بتمني من كل قلبي تيجي اللحظة الي اقول فيها احمد حر وانا كمان واخدة في حضني ونملا تايم لاين صور كثير وفرحة وزغاريطيارب يرد كل غايبلاحبابه واهلهيارب يا احمد
<https://bit.ly/3NUdCta>

عن حسام سلام

ورد إلينا اليوم استغاثة من زوجة المهندس حسام سلام قالت فيها ((زوجي حسام سلام محتجز حالياً في سجن العقرب شديد الحراسة 1 في زنازين العزل الانفرادية، في ظروف احتجاز غير آدمية، يعاني من قلة التهوية ما جعله يعاني من مشكلة في التنفس، مع منع دخول أي أمانات أو علاج له بخلاف منعه من الزيارة.. ومع عدم استجابة إدارة السجن لمطالبه اضطر أن يدخل في إضراب عن الطعام منذ خمسة أيام مطالباً بحقوقه.. وأنا أطلب بسرعة الاستجابة لمطالبه ونقله من المكان الذي هو فيه حفاظاً على صحته وحياته.. تحدثوا عن حسام ومن معه وانشروا قضيتهم.))



<https://bit.ly/3NUAXee>

عن أحمد علام

“تلقينا وعودا كثيرة بالإفراج عن شقيقي في وقت قريب، لكنها لم تترجم إلى واقع حتى الآن، تفاصيل صعبة ومؤلمة تمر عليه وعلينا يوميا في ظل غيابه، في كل زيارة نمي أنفسنا أن تكون الأخيرة له، لكن الأمل بتبدد شيئا فشيئا مع كل تجديد لحبسه

“هو نفسيا مش تمام خالص، موضوع أن مفيش حاجة رجعت من الأدوية والزيارة فرق مع شويا، لكنه كان عنده أمل بس بسيط في الخروج قريبا، لأنه سمع وعود أنه هيخرج مليون مرة.”
“أحمد شقيقي الوحيد، ووالدانا كبار في السن، وهم في حاجة ماسة لوجوده ورؤيته، فوالدته لم تره منذ أكثر من عامين، كما لم يعد والده يتحمل مشوار الزيارة بحكم سنه، وكذلك جدته المحروم من رؤيتها طوال هذه المدة، أملنا الوحيد الذي نعيش من أجل تحقيقه، هو عودته إلينا، الحياة باتت متوقفة وميتة في غيابه، مهما حاولنا.”

“وددت زيارته في هذه المناسبة خاصة، للاطمئنان على أوضاعه، وأملا في التخفيف من الوحدة الموحشة التي يعانيتها من محبسه، وإشعاره أنه ما يزال بجوارنا، لقد أكمل عامين في الحبس الاحتياطي حتى الآن، ومن المفترض خروجه أو عرضه على قاضيه، لكنه بات فاقدا الأمل في الخروج بعد كثرة الوعود التي تلقاها ولم ينفذ أي منها حتى الآن”، تقول شقيقة علام ل”درب”، في تصريح سابق.
“ما خفف علينا وطأة المعاناة أنه تم السماح بدخول جميع الطعام والأدوية له في هذا اليوم، وللمرة الأولى، لكن ذلك لا يمكن أن يغني عن وجوده بجانبنا في منزله وبين أهله وأحبابه، لم نعد نشعر بطعم الحياة في غيابه، بينما تزداد مرارة طعام الإفطار مع رؤية مقعده الفارغ بجوارنا، لم يعد لدينا ما نقوله أو نتمناه سوى عودته.”

“أحمد يسعى للتخفيف من آلامنا بسبب غيابه، لكنه هو من يحتاج إلى من يخفف عنه وينتشله من هذه المعاناة المستمرة.”

<https://bit.ly/38Sa4bZ>

عن محمد وأنس البتاجي

د محمد البتاجي

أنس البتاجي

كل المعتقلين كل باسمه وكل ذويهم النبلاء
اللهم هب لنا جميعا عزيمة لا تضعف ولا تنكسر
ونفسا لا تقهر، وصبرا لا ينفد، واجرا لا ينقطع
واملاً قلوبنا تسليما ورضا واحتسابا، وارزقنا عوضا عن الحرمان والوحشة والبعد عن احبابنا، انسا بك
وبمعيتك ولذة صحبتك، تهون بها علينا ما نجد ونلاقي
المعتقلين وذويهم حقهم في الدعاء في سجداتكم
فلا تنسوهم

<https://bit.ly/3meRoGq>

عن عمرو إمام

“اتقبل كل الأعذار وأتفهم كل التعقيدات والصعوبات، ولكن هل ينتظر العمر؟ كيف ينقضي الوقت؟ متى.. السؤال الذي أريد جواباً له. بعد سنتين و٨ أشهر من الحبس الاحتياطي بسبب عمله بالأساس. متى يعود لحياته الطبيعية؟”

“أملي دائماً في الله وأيضاً كلي أمل في اهتمامك كأُمٍ مصرية أولاً ومسؤولة في الدولة ثانياً وفيما أراه من مجهود يحترم من جانبكم. لذا أرجو أن تسمعي نداي ويستمر الإفراج عن الشباب المصري الوطني بجهود مصرية لحل الأزمة. وأن يعود لي ابني الأكبر قريباً ظهراً وساعداً لي في مرحلتي العمرية الحالية.”

<https://bit.ly/3NWWxyu>

4 يونيو

عن صفوان ثابت

كل سنة و انت طيب يا بابا ❤️ 76 سنه انهارده ..
يارب بصحة و طولة العمر..
كنت المفروض تبقى وسط ولادك واحفادك بنحتفل ونطفي تورتة عيد ميلادك.. و ماما بتقاوح معاك تخفف شغل و انت مصمم تروح جهينه كل يوم ..
ما هو الشغل حياتك..
مكانك مش جوه مكانك وسطنا..
كل سنة و حضرتك قوي وطيب و حر ..

<https://bit.ly/3zgPSeD>



عن مصطفى النجار

1295 يوم مصطفى غايب عننا يمى خلصت الابتدائيه والاعداديه واولى ثانويهنا خلصت الابتدائيه والنهاردة نجحت في الاعداديهالف مبروك يا نانا نفسى مصطفى يفرح معايا بنجاح ولادنا رجعلنا مصطفى كفايه كده

<https://bit.ly/3GVfK1b>

عن أحمد عبد الستار عماشه

3 يونيو 2022 = عيد الميلاد الستين (60) لدكتور أحمد عبد الستار
كان نفسنا بابا يكون وسطنا ونقوله "كل سنة وأنت طيب" .. كان
نفسنا يكون فعلاً طيب ومرتاح ومبسوط ووسط أهله وناسه.
ستين سنة ملايين نضال، وخدمة، وسعي، وحب. حب للحرية
والكرامة والعدل.

كل سنة وانت طيب يا بابا، يا صديق، يا رفيق.

كل سنة وكل المعتقلين أحرار.

#الحرية_لاحمد_عبدالستار

<https://bit.ly/3NWX83c>



عن عمر الشنيطي

أنا تعبت الصراحة، اللي يعرفوني بشكل شخصي عارفين علاقتي بالراجل المحترم الغالي عمر الشنيطي،
أكثر من عشرين سنة وأنا ملازمه، صداقة وأخوة ومحبة وفضل منه عليا بعد ربنا ملوش حدود..
عمر هيتم في الحبس الاحتياطي بعد كام يوم ثلاث سنين، ثلاث سنين مشفتوش ولا حتى سمعت
صوته، وفعلاً من غير سبب، من غير أي سبب، وده حتى مش كلامي علشان صاحبه وكده، ده كلام كل
الوسايط المحترمين اللي دخلناهم معنا في القصة من مختلف أجهزة الدولة، وكلهم لما
بيسألوا بيتأكدوا إنه فعلاً معليهوش حاجة، طب مسجون ليه طيب؟
ليه ثلاث سنين بعيد عن أهله وعن ولاده اللي كبروا ما شاء الله وبقوا هما كمان أصحابي وبتشرف بيهم
كمان؟

ليه ثلاث سنين بعيد عن مجهوده وشغله ليل نهار في المجال الأكاديمي ومئات الطلبة في جامعات
مختلفة اللي كان بيدرس ليهم أكثر من نص أيام الأسبوع محاضرات بتأخذ منه اليوم كله من غير أي
مقابل مادي، بس علشان ينقل علمه وخبرته لجيل جديد بيشفو عمر إنه عنده فرصة وحماسة
يخدم البلد دي بحرفية وعلم لو اتأهل صح وخذ فرصته..
ثلاث سنين وعمر -الي المفروض في السجن وأنا حر- هو اللي بيعتلي من خلال مصطفى أخوه الغالي
السلام والسؤال العجيب: مش محتاج أي حاجة؟ يعني حتى وهو مسجون بي فكر في صحابه وحبابه..
ليه كل قوايم العفو اللي طلعت على مدار الثلاث سنين بيكون اسمه مش فيها..
ليه واحد بخبرته وعلمه الاستثنائي في مجال الاقتصاد اللي هو أكثر مجال الدولة محتاجه دلوقتي مش
موجود بره السجن بي فكر ويحلل ويقدم حلول ومسارات زي ما كان بيعمل قبل ما يدخل السجن، وكان
وصل إنه بي قدم دراسات للمستشار الاقتصادي لرئيس الجمهورية نفسه..
أنا فعلاً تعبت وكل يوم وكل دقيقة وعمر على بالي ومعاناته جوه السجن هو وأهله بتعدي قدامي كل
دقيقة من يومي تفكرني بيه وتفكرني بالظلم اللي هو متعرض ليه ..
أتمنى الكابوس ده يخلص ويرجع تاني عمر لحياته وحبابه وأهله وصحابه وتلاميذه...
أنا مقدر جدا مجهود لجنة العفو الحالي وأتمنى عمر يكون في قوايمهم

#أفرجوا_عن_عمر_الشنيطي

<https://bit.ly/3NIOJGB>

عن محمد عادل

بكرة جنايات المنصورة هتنظر الاستئناف المقدم ع حبس Mohammed Adel ع ذمة القضية رقم 4118 لسنة 2018.

الاستئناف ده مقدم من يوم 12 مايو تقريبا، وبكرة 5 يونيو !
ع كل حال محمد عادل يوم 19 يونيو هيتم 4 سنين حبس احتياطي.
أتمنى ما تبدأ السنة الخامسة وهو ف السجن، أتمنى تسيبونا ف حالنا وكفاية علينا لحد كده عشان
احنا والله تعبنا جدا وزهقنا وروحنا طلعت ودفعنا التمن وزيادة !
#الحرية_لمحمد_عادل

<https://bit.ly/3zg6GSP>

عن جعفر الزعفراني

كلما ظننت اني نجوت يباغتني أمرًا يعيدني لنقطة البداية
من ٨ سنوات و٣ أشهر ❤️ جعفر اتحبس ظلم
اللهم امنن علي أرواحنا بحنانٍ من لدنك
#الحرية_لجعفر_الزعفراني

<https://bit.ly/3tgSYvj>

5 يونيو

عن احمد سبيع .

صباح الخير عليكم 🌸

النهاردة الصبح سيرين صحيت مسكت الموبايل وفتحت الصورة دي 📱
وقعدت تشاور علي كل لقطة فيها وتقول:

إنت بابا!!

إنت بابا!!

إنت بابا!!

فكرة إن بابا موجود برة الصورة سيرين مش قادرة تقتنع بيها وتفهمها هو بابا ممكن أشوفه وألمسه
ويحضني؟ !!

هو بابا ممكن يكون موجود يفسحني ويخرجني؟ !!

هو بابا ممكن ياخدني في حضنه وينيمي؟ !!

هو بابا فين ليه بابا مش معانا؟ !

سيرين امبارحبتسألني هو بابا عنده سرير ينام عليه وهدومبتاعته؟ !

من حق سيرين واخواتها يعيشوا بشكل طبيعي

حقهم باباهم يبقي معاهم

عن محمد الباقر

قلوب كل الأهالي متعلقة بالعمو .. الدنيا بتجري وأفراح وأحزان .. واحنا عيوننا مش شايقة غير أخبار العمو .. بيوت كلها مقفولة على بشر في منتهى التعاسة ومضطرين يكملوا حياتهم اليومية الروتينية وعقولهم وقلوبهم مع أولادهم وأزواجهم وأخواتهم في السجن..

وكل واحد بينام ويحلم ويصحى على حلم صورة حبيبه برا باب السجن ... ويقول يا ترى الفرحة هيدخل بيوتنا يوماً ما ولا هنتسي في الزحمة .. ويحاول يفرمل أحلامه عشان جرب السقوط في معصرة الحزن الأسود بعد الأمل .. وبقي يكره الأمل اللي بيأذيه أد الحزن .. ويحاول يتعلق المرة دي بالعود .. ويحاول يتخيل أن ممكن تكون فيه حياة بعد البعث من السجن .. وأن احتمال يكون لسه جواه نفس ورغبة في الحياة .. وأن ممكن يكون فيه لسه حته مدفونة جواه روحه معجونة بشوية طموح في شغل ولا دراسة ولا خلفه عيال زي باقي البشر..

لكن الحقيقة مش هنعرفها غير بخروج حبايبنا .. ووقتها ندعي تترد فينا الروح ونكتشف ان ارواحنا لسه عايشة وما ادفنتش على بوابات السجن .. في انتظار أحضان حبايبنا .. بالسنين ..

#الحرية_لباقر

<https://bit.ly/3H61EKQ>

عن بلال عبد الرازق



بمناسبة الصيف والحر

اللي في الصورة دا شاب جميل أوي وانسان، اسمه بلال عبد الرازق. انسان لدرجة لا توصف. في يوم من ايام الحر في عز الصيف والكهربا قطعت.. وكانوا كل اللي ف الزنزانة نايمين ماعدا أنا وبلال، بلال جري جاب الفوطة بتاعتيو بتاعته وقال قومي معاي نهوي ع الناس وهي نايمة عشان ماتصحاش من الخنقة، وكان معانا ناس كبار في السن ومرضى، والله العظيم بلال وقف أكثر من ثلاث ساعات بدون توقف ينسّم ويهوي على الناس الكبيرة والمريضة والشباب الصغير كمان عشان ما حدش فيهم يصحى بسبب نار جهنم اللي كنا فيها وكان عندنا مروحتين سقف شغالين وكل شوية يبوظوا، وقتها أنا نفسي تعبت من اني بهوي على الناس النائمة وايدي خدلت، قولتلها هارح شوية، وقف هو كمل وقعد يهوي عليا انا كمان،،

بلال شخص راقى و مثقف و جميل و دمه خفيف و اسكندراني و ملاك ، إنسان بمعنى الكلمة ، بافتكر كمان لما تعبت في مرة في الزنزانة و كنت فعلا بموت من ألم الضرس اللي قعدت سنة و نص مش عارف اتعالج جوا السجن و لا حتى اخذ مسكن عدل.. أذكر انه مكنش بينام الليل ، ولما نذفت و تعبت فضل ماسك في كفة إيدي و عينه كلها خوف عليا ،
يا بلال أنا مشتاقلك أوي
و مش ها طلب حريتك غير من ربنا
في ابرجعلي أخويا يارب 🥺💔
<https://bit.ly/3Qbs7KM>

عن معاذ حسن محمد عبد السلام ماضي

ابني معاذ حسن محمد عبد السلام ماضي
خريج كلية زراعة الاسكندرية
وكان مفروض يدخل الجيش في ٢٧ . ١٠ . ٢٠٢٠
ولكن يوم الجمعة ١٦ . ١٠ . ٢٠٢٠
و معاذ راجع من صلاة الجمعة مع والده و قفهم كمين امام فتح الله برج العرب الاسكندرية
و الضابط اخده من معاذ تليفونه الشخص و علشان معاذ أتأخر في فتح
تليفونه لسيادة الضابط
الضابط بضره و اخذه و والده الى مقر الامن الوطني ببرج العرب الاسكندرية



و منه الى مقر الامن الوطني بابيس
و خرج والده مساء نفس اليوم
و لا نعلم اى معلومة عنه حتى الآن
قدمنا الكثير من البلاغات و التعريفات و لم نتلقى اى معلومة تطمئننا عليه
يا ريتاى حد يتعرف عليه يقولى ٠١٠٠٩٠٤٢٣٣٧
<https://bit.ly/3NzusxE>

7 يونيو

عن محمد عادل

كثير علينا نعيش عادي، الحياة العادية بحلوها ومرها بقت أمنية بالنسبة لي، أنا نفسي أعيش أصلاً، أنا مش طائلة حاجة لا موت ولا حياة، ما حد هيفهم كلامي ولا هيفهم إحساسي غير اللي ف نفس التجربة أو اللي جربها! فاضل حوالي 10 أيام و نتم 4 سنين، 4 سنين من الهم والنكد والقلق والخوف والارهاق والذل والمرار الطافح، 4 سنين و مش عاوزين يرحموننا مع أن قولنا مرارا وتكرارا تعبنا وزهدنا ف كل حاجة و مش عاوزين حاجة بس كفاية سيبونا ف حالنا، 4 سنين احتياطي، فاضل ايه تاني؟!
<https://bit.ly/3H2D5y8>

عن هدى عبد المنعم

انا واخواتي وبابا محتاجين الدعاء اوي ..
ادعولناوادعولنا ماما تبقي في وسطنا قريب

رسالة مؤثرة من عن هدى عبد المنعم ابنة الحقوقية هدى عبد المنعم المعتقلة منذ أول نوفمبر 2018 في سجون السيسي تطالب فيها أحرار العالم بالدعاء للإفراج عن والدتها المريضة والممنوعة من الزيارة ومن رؤية بناتها وأحفادها ، منذ اعتقالها ورغم تدهور حالتها الصحية جراء الانتهاكات التي تعرضت لها داخل محبسها في سجن القناطر سيء السمعة فضلا عن أنها تعاني من جلطات في قدمها قبل دخولها السجن ،والآن لا تستطيع الوقوف على قدميها وتأتي الجلسات في سيارة أسعاف وتتعنت السلطات في الإفراج عنها أو علاجها في مستشفى خارج السجن.
هدى عبد المنعم يجدد حبسها تلقائيا وتهمتها أنها كانت تساعد المظلومين والمقهورين ضحايا السيسي والذين يقبعون في السجون والمعتقلات ظلماً وعدواناً .

<https://bit.ly/3Nx85cd>

8 يونيو

عن محمد الباقر



باقر مرة بحكيه عن كنبتنا اللي القطط فرتكوها .. قالي وهوه بيضحك "يعني ايه كنبه؟ أنا نسيت بيتقعد عليها أزي .. أنا نفسي اخرج بس .. حتى لو هنقعد على الأرض .. " انا طبعا كزوجة مصرية اصيلة عارفة أن الكنبه كانت جزء لا يتجزأ من حياة جوزها .. بعد ابحات مستفيضة عن انسب كنب مع القطط .. جبت كنبه وقاعدة حاطة ايدي على خدي جنب الكنبه ومستنيه خروجه .. ومستنيه قعدتنا على الكنبه بنفطر ونتغدى ونتفرج على فيلم حلو بالليل مع فشار من عمایل ايدين باقر .. وقططنا حوالينا .. ولمة أصحابنا وأهلنا .. وقعدتنا باللابتوب على الكنبه شغالين ادام التلفزيون .. وقصص وحكاوي وذكريات حلوة كثير .. بنام واصحي على أمل اننا نكمل حياتنا من لحظة ما سبنا بعض من أكثر من سنتين ونص #الحرية_لباقر#FreeBaker

<https://bit.ly/3aUCfrp>

9 يونيو

محمد عادل

عندي زيارة بكرة، دي آخر زيارة لي السنة الرابعة من الحبس الاحتياطي، الزيارة الجاية هتكون أول زيارة ف السنة الخامسة!

مش متخيلة أنا هنبداً ف خامس سنة حبس احتياطي، واقع ده علينا كأسرة صعب جدا، وواقع ده ع محمد نفسه زي الزفت.

المفروض ايه يحصل عشان يخرج مش عارفة، طيب الرحمة حتى بلاش الحق لو هيزعل، ف أب وأم بقي لهم ٩ سنين بيلفوا ع السجون ورا ابنهم الكبير، وحط ١٠٠ خط تحت الكبير دي، ابنهم لا قتل ولا سرق ولا تاجر ف المخدرات ولا ف الآثار . ابنهم بس قال رأيه، رأيه صح بقي ولا غلط أهو اسمه رأي، كلمتين يعني لو الكلمتين مش حلوين معلش عادي ممكن ما نسمعهمش!

ف أنا هنا من زمان، مش عارفة يعني هتفضل حياتي واقفة ومتعطلة لحد امتي؟ امتي هعيش زي البشر عادي، عملت ايه أنا عشان أفضل سنين بلف ف السجون؟ هبقي ف بيتي مع جوزي امتي؟ هعيش حياة عادية ويبقى عندي أطفال امتي؟

كفاية عقاب بقي لحد كده كفاية كفاية، اتعاقبنا والله بما ف الكفاية، مش هنتكلمتاني، ايه تاني؟ نعمل ايه عشان تسيبوننا ف حالنا وتخرجوه؟ ايه المطلوب عشان محمد عادل يخرج من السجن؟

#الحرية_لمحمد_عادل

<https://bit.ly/3MDpb6Y>

عن خالد عز الدين

وحشني أمانك يا خالد.

ربنا يلطف بيبك

#خالد_عز_الدين_فين

<https://bit.ly/3Q7qFsW>

عن رؤوف خطاب

عمو اتنقل وادي النظرون والحمد لله بقي ينفع اطلع تصريح زيارة واشوفه واطمن عليه بعد رسايل كتير منه انه عايزني أروح... كان نفسي ما روحشتاني كان نفسي اروح بس استقبله..

عمو رؤوف مش مجرم ولا مخرب عمو من حقه يعيش اللي باقي من حياته وسطنا.. هروح ومش عارفه المفروض اقله ايه ان إحنا تمام بس احنا مش تمام ولا كل حاجة كويسه وانا بكذب عليه وعلى ولادي..

<https://bit.ly/3xDypvs>

عن أنس البلتاجي

أنس في درجات الحرارة الحارقة دي بيجيله نزييف من أنفه و دوار وبيحتاج أدوية..
احنا غير مستحقين للزيارة ومنعرفش ليه!

هو أنس متاخذ رهينة؟؟!!!

أنس وضعه القانوني ايه؟ حد يرد علينا...يا بتوع حقوق الإنسان
أحد ممثلي لجنة العفو صرح بأن الناس المتهمه بالانتماء لجماعة الإخوان ليسو ضمن حسابات النيابة
في موجة إخلاء السبيل..

احنا هنا في الوضع ده من ٢٠١٣

داحنا لو في سجن إسرائيلي بنتحاكم كان زماننا خلصنا المعركة دي

احنا..جبرنا أخرنا وانس جاب اخره

لو في أي سيناريو يخرج أنس من السواد ده هنتهجه...ياريت كان في جنسية تانية او حتي سنين
السجن بتتحسب..أي حسبة توصل لآخر النفق الضلمة..

<https://bit.ly/3Mz5zkg>

10 يونيو

عن محمد الباقر

بحاول دايماً أدور لباقر على وصفات أكل تستحمل تصمد في الحر في الشارع من غير تلاجة من الصبح
بدري لحد ما تدخله ما بين العصر والمغرب .. ودايماً مش بعرف الاقي كلمات البحث على Google
اللي اوصل بيها..

لحد النهاردة .. اخيراً اكتشفت ان ظروفنا التعيسة مش بتخلينا نفكر كناس طبيعيين .. وطلع كلمات
البحث على Google ببساطة هيه .. Picnic recipes for summer dining :لكن احنا بس اللي
مش وش نزوات خلوية في الصيف وغدا في أحضان الطبيعة .. وآخرنا نشوفها في الأفلام .. أو في الصور
الأبيض وأسود بتاعة ماما وبابا وهمه صغيرين ..

ربنا يتوب علينا وناكل في بيتنا زي البني آدمين .. مش هطمع واقول بين احضان الطبيعة حتى ..

#الحرية_لباقر

FreeBaker#

<https://bit.ly/3O1NIZG>

عن زياد العلمي

صباح الخير يا زياد.. يارب تكون بخير انت وكل الطيبين الي معاك.. عارفة احساسك النهارده وربنا يهون عليك ويقرب البعيد.. كل الجدعان اللي خرجوا بيظمنوني عليك انك لسة زي ما انت: جدع بتحتوي اللي حواليك وبتستوعبهم وتسندهم وتخفف عنهم وتفضلهم على نفسك! عارفة ومتوقعة وده العادي بتاعك، تشيل هم اصحابك ولو حد سألك عن نفسك تقول "زي الفل"!! بس مش على ماما يا حبيبي.. النهارده انا عارفة احساسك كويس؛ لكن عندي أمل في عدل ربنا، ودعوات الطيبين.. ربنا يرجعك قريب لابنك واخوك وبناته، ويعوضكم عمر طويل مليون افراح وأعياد ومناسبات حلوة

#الحرية_لزياد_العلمي

#الحرية_لكل_سجناء_الرأي

<https://bit.ly/3HbqZ5P>

عن عبد المنعم أبو الفتوح

يوم جلسة الحكم كان نفس يوم جلسة نظر الحبس (أبويا بيحب يسميها جلسة نظر اخلاء السبيل) في القضية الثانية اللي محبوس احتياطيا فيها من ١٧ مايو ٢٠٢١، لان القضية اللي تمت فيها المحاكمة صادر فيها قرار اخلاء سبيله في ١٧ مايو ٢٠٢١.

بعد الجلسة انتظرنا لحين بدء جلسة القضية الثانية. فريق الدفاع يومها طلب اخلاء سبيله - زي كل مرة - لكن المرة دي أضاف سبب اخر وهو حيث انه خلاص تم الحكم عليه بالفعل في القضية الاولى اللي فيها اتهامات مشابهة للاتهامات اللي في القضية الثانية. رغم ده، القرار صدر بتجديد حبسه احتياطيا ٤٥ يوم .

قرار اخلاء السبيل في القضية الاولى وقتها، في ١٧ مايو ٢٠٢١، كان بضمنا محل اقامته، لكن رغم ده صدر في نفس الوقت قرار حبسه احتياطي في القضية الثانية اللي فيها اتهامات مشابهة، واللي لم يتم مواجهته فيها بأي شيء حتى اليوم .

القضية الاولى، اللي تمت فيها المحاكمة، هي ٤٤٠ حصر امن دولة ومقيدة برقم ١٠٥٩ جنابات امن دولة، ومدة الحبس الاحتياطي فيها كانت تقريبا ثلاث سنين وثلاث شهور، من ١٤ فبراير ٢٠١٨ ل ١٧ مايو ٢٠٢١

القضية الثانية المحبوس احتياطيا عليها حاليا هي ١٧٨١ لسنة ٢٠١٩ حصر امن دولة، ومدة الحبس الاحتياطي فيها تقريبا سنة وشهر حتى الان، من ١٧ مايو ٢٠٢١ حتى اليوم. ٤ سنين و٤ شهور حبس احتياطي حتى الان ...


#الحرية_لأبوالفتوح

<https://bit.ly/3NMMiNB>

عن موسى مضر

سنتين وشهرين بدون تهمة بدون محاكمة بدون مقابلة القاضي. بدون سبب بدون جنائية. موسى محبوس بعيد عن أطفاله الأربعة بتهم لا علاقة به وأي تحقيق بسيط يثبت ده. اكثر من مرة اخدنا وعود بأنه هيخرج وأنه فعلا متاخذ بالغلط وأن حبسه مجرد إجراءات كل اللي طالبينه انه يخرج حتى لو بإجراءات احترازية لو سمحت أي حد بس يطبق القانون

<https://bit.ly/3NLgglf>



11 يونيو

عن جعفر الزعفراني

"لم يكن الأمر عادياً كما تظن..
إنه أصبح عادياً بعد ألف معركة في عقلي وألف كسرًا في قلبي وكنت دوما أردد لا بأس بينما كل البأس هنا
في قلبي"

- زوجة المعتقل جعفر الزعفراني

<https://bit.ly/3HnxbIq>

عن آل ثابت



زنانة بلا نافذة، او فتحة للتهوية.. في هذا الجو..
هل هذا حبس احتياطي؟!
ام وسيلة للتعذيب او القتل البطيء..

<https://bit.ly/3HeBJjU>

مساء الخير
ممكن تطلعوا أبويا واخويا من عندكم جوه ؟
واحد اسمه #صفوان_ثابت #رجل_اعمال / #اقتصادي مالوش اي دعوه بالسياسه، في طره ملحق
المزرعه في انفرادي!
والتاني سيف ، شاب زي الفل في شديد الحراسه واحد، شهرة السجن من قسوته #العقرب في انفرادي
برده !
انا محتاجاهم في مشوار والله ..
<https://bit.ly/39t50uG>

12 يونيو

عن محمود شعبان

ولا نقول إلا ما يرضي ربنا ، إنا لله وإنا إليه راجعون.
تم الحكم على الوالد بخمسة عشر عاما سجنا مشددا
..وبهذا سيفصل من جامعته
أبي الذي قضى خمسة وعشرين عاما ، عاملا بجماعة
الأزهر ، مدرسا ثم أستاذا ثم أستاذ دكتور ، وصل
لآخر درجة بتريقات الجامعة ، والله ما عهدته إلا
يخشى الله في كل من تحت يده ، وأقول يا أبي، حَرَمَتَّ
حقّ الكتاب على نفسك ، وضيقت علينا عيشنا ، فيقول يا بُنية ، لكم الله من بعدي ، أما عني ، فإني قد



عاهدت ربي أن لا أدخل عليكم مليما من حرام.
الكبير والصغير في شارعنا يعرفه ، الكل يذكره وهو ذاهب إلى صلاة الفجر أو غيرها ، هلموا شبابنا إلى
الصلاة ، بلُغته البسيطة الفكاهية. كنت أمشي بعد فترة من سجنه ، أقابل امرأة بعدما عرفت من أنا ،
تقول والدك الذي كان بعد الله سببا في شفاء حيرتي ، وحل مشكلتي ، وهو الذي تحدث مع كذا وكذا
ودفع أجرتي ، وهو الذي كان مقداما لا يتواني في تقديم يد العون لكل من عرفه أو لم يعرفه ، حتى أنني
شابهته في تلك الخصلة ، فيستغربنا الناس ، أن ما شأنكم ، وما العائد عليكم ؟
بعضهم لا يصدقون أنه لازال في الأرض من لأجل الله يعمل!
لله دُرْكُ يا أبي ، عشت عزيزا وياذنه ستموت عزيزا ، ثبتك الله ، آواك الله ، نصرّك الله ، حفظك الله
، ولا حول ولا قوة إلا بالله، يا حبيبي ولنا لقاء .

<https://bit.ly/3NOURaU>

عن خالد عز الدين

احساس الامان انك يكون عندك شخص لما تقع في مشكلة تحكيه ومش خايف يحكم عليك ويتهمك بالتقصير ... انك تبقى متوقع اللوم ومتقبله تتفاجيء أنه ما حصلش وبالعكس بدأ في حل المشكلة معاك وبدأ يديك احساس طمأنينة وامان والله ما في حاجة تقدره في الدنيا...الشخص دا هو خالد جداااا فكرة كتير حاجات كنت أبقي متضايقه منها وازاي يبسطها ويقوللى سهله وانا متأكدة أنه شايفها مش سهله بس همه وقتها أنه يشيل عنى همى وفعلا كان بينجحفنداويينجح جدااا ... انا مفتقدة جدااا لما أكون مخنوقة وشايلة هم الدنيا أكلمه يشيل عنى ويهون ومش بس كدة يسعى في الحل بشكل كل مرة يبهرنى ... ربنا يلطف بيك وينجيك ويجمعنى بيك على خير وسلام في الفضل والعافية يا رب.

#خالد_عز_الدين_فين

<https://bit.ly/3Oeouuh>

13 يونيو

عن هدى عبد المنعم

ماما وصلت في عربية الاسعاف

#FreeHoda

<https://bit.ly/3tBRHPz>

عن زياد العليمي

امبارح، واحدة ست من الصعيد؛ اتشجعتلاول مرة وجت تشوفها ابنها ، وحيدها،المسجون اللي ما شافتهوش من سنتين! عشان ما تعرفش تتحرك في القاهرة!! ما تتصوروش وشها نور قد ايه بعد زيارة تلت ساعة، بعد انتظار اربع ساعات في الحر على باب السجن! وما تتصوروش فرحتها وهي بتقول ان الضابط سمح لها تحضنه بعد ماخلصت الزيارة اللي كانت عبر السلك!! الشاب مسجون عشان كتب كام بوست عالفيسبوك!! ورغم ان بقاله سنتين لم يحاكم ولم توجه له تهمة رسميا.. طيب مادام عايزين تسجنوهم، تشحطوا أهاليهم ليه؟ ما تسجنوهم في بلدهم ، عشان ام زي دي مالهاش زوج ولا ابن تاني ولا بنت، تعرف على الاقل تظمن على ابنها لغاية ما ربنا يأذن برجوعه لها ولعروسته عاجلا بخير

<https://bit.ly/3mLGHLS>

عن عائشة الشاطر

اه يا ماما

مش عارفة ولا قادرة اقول حاجة

كفاية والله اللي بتعملوه ده

تقاريرها الطبيه اللي رفضتم قرائتها دون عن اي حد اثبتت لكم ان حالتها متستحملش يوم واحد كمان

في السجن والوحدة والبشاعة دي

مش قادرة اصدق ان الحل بالنسبه لكم تغيرو التقارير وتقولو ان الصحة تمام
ليه بتعملو حاجات مستحيل تصديقتها من جلسة لجلسة الحالة تحولت والنخاع اللي بيشتغل بكفاءة
ضعيفة والكانبيولا اللي كانت في ايديها والدم اللي كان بيتنقلها والمناعة اللي كانت واطيه كلو بقوا كويس
جدا وطبيعي ؟

طب حتى قولو في تحسن ،، حاولو تخلونا نصدق ونضحك معاكم على نفسنا ونفرح ونظمن
دي ست والله والله ما في تهمة واحدة تدينها ومع ذلك بقالها ٤ سنين، مش كفاية ؟ حرمتوني اشوفها
انا هردة وحرمتوني منها ومن زيارتها مش كفايه ؟

#الحرية_لعائشة_الشاطر

<https://bit.ly/3MPTd7i>

عن هدى عبد المنعم

الحمد لله دخلنا وشفنا ماما لدقيقتين وبعدين شاورناها من ورا القفص الجلسة اتأجلت ل ١٦
أغسطس

<https://bit.ly/3xutz2j>

عن عبد الله فكري فايد

“رهن الحبس الاحتياطي على ذمة القضية رقم 1018 لسنة 2020 حصر أمن دولة، منذ القبض عليه
في ديسمبر 2020 بتهم الانضمام لجماعة محظورة .”
“نحن تستغيث لتوصيل أصواتنا للجنة العفو، ونتمنى الإفراج عنه هو ومجموعة من الأقارب في
قوائم العفو حيث أنه ليس لهم أي نشاط سياسي أو انتماءات لأي جماعات وهم من أبناء الوطن
المخلصين ويشهد على ذلك كل من يعرفهم .”

<https://bit.ly/3mLYRNf>

محمد عادل

كل السجناء السياسيين بسجن المنصورة اترحلوا النهارده لسجن جمصة شديد الحراسة.
تعديل: الأهالي كانت ع علم من فترة بالنقل، وده تمهيدًا لإخلاء سجن المنصورة وغلقه زي ما سمعنا،
نقل السياسي تم النهارده، بالنسبة ل Mohammed Adel فهو موجود في سجن جمصة شديد
الحراسة من أواخر شهر مايو لأداء الامتحانات، وبناء ع نقل باقي السجناء ف محمد هيفضل هناك
لحين خروجه إن شاء الله!

<https://bit.ly/3aWEOZL>

عن خيرات الشاطر



سميه خيرات الشاطر

5h · 🌐

...

أبي حبيبي معتقل من ٩ سنوات... وزوج أختي منذ ٧ سنوات وأخي حبيبي منذ ٥ سنوات وأختي منذ ٤ سنوات وزوجي منذ ٣ سنوات... من كانوا أطفالا أصبحوا شبابا... تغيرت ملامحهم وتشكلت شخصياتهم دون وجود آباءهم وأخوالهم وأجدادهم... لكن الله يصنعهم... فرج الله كربنا وفق أسرانا انه على ذلك قدير وحسبنا الله ونعم الوكيل



خالد حمدي

27 June 2021 · 🌐

لي أصحاب أخرجوا من مصر لم يروا أولادهم وزوجاتهم منذ ثمانية أعوام..
كلما أرادوا السفر إليه أعادوهم من المطار..

ثمانية أعوام!!

أصبح فيها طالب الابتدائية الآن طالبا في الجامعة!!

وأصبحت الزوجة العشرينية على مشارف الأربعين!!

ومثلهم أصحاب لنا في السجون لم يروا أهليهم طوال ثماني سنوات إلا مرات تعد على أصابع اليد الواحدة،
لا تزيد مدة الزيارة فيها عن خمس دقائق..

أي أنهم لم يروا أزواجهم أو أولادهم طوال ثماني سنوات إلا نصف ساعة!!

ما ذنب الصغير إذا كنت تتشغى من الكبير!!؟

وماذا صنعت لك الزوجة وأنت تنزل نعمتك على الزوج!!؟

بل، وماذا صنع لك الزوج الذي سجنته أو شرده!!؟

ما كل هذه البشاعة وقسوة القلب وسواده!!؟

والله إن كفار قريش في عداوتهم لأشرف وأرق قلبا وأشد رحمة من هؤلاء الذين لم يغير الإسلام فيهم
شينا!!

لما هاجر أبو سلمة رضي الله عنه إلى المدينة منعوا زوجته أم سلمة أن تلحق به، وأخذوا منها ولدها، فكانت تخرج كل عداة وتجلس في المكان الذي فارقت فيه زوجها، وما زالت تبكي وتتوجع طوال سنة كاملة، حتى رفق لها المشركون وردوا لها ولدها، وتركوها تلحق بزوجها، بل وأوصلها أحدهم إلى قباء بنفسه، حيث يقيم زوجها!!

وأم سلمة اليوم، يحرمونها من زوجها ثمانية أعوام دون أن يرف لأحدهم جفن!!

يا ليت من يتعاملون مع هؤلاء المظلومين كانوا بقسوة بنى مخزوم أهل أم سلمة، وقبيلة أبي جهل!!

<https://bit.ly/3aTLJ65>

14 يونيو

عن توفيق غانم



أكمل الكاتب الصحفي توفيق غانم عامًا وشهر في الحبس الاحتياطي، وسط مطالبات مستمرة بإخلاء سبيله .
“أنا رجعت البيت يا بابا، قعدت ٣ أيام بأصحي أروح عند الشباك أدور عليك زي كل يوم الصبح عشان أجيب كرسي وأقعد أتشمس جنبك أنت وماما وسط ورودك الجميلة، بس كل مره كنت بلاقي الكرسي فاضي وأصلا الشمس مش راضيه تطلع، يا ترى الشمس بتطلع عندك وبتعرف تشوفها من شباك الزنزانة؟ ”
“بابا الصحفي توفيق غانم المقبل على الـ٧٠ من عمره كمل سنه وشهر في الحبس الاحتياطي من غير ما حد يبص في قضيته أو حتى سنه المتقدم ويقولنا أي حاجه فيها منطوق، ممكن بابا يطلع بقي؟ ”.

<https://bit.ly/3tEodAq>

عن هدى عبد المنعم

لست المُتكَأ

يوم عصيب ككل أيام الجلسات التي عُقدت من قبل
يوم يأخذنا الفكر من ناحية إلى أخرى دون هوادة أو رحمة
هل سنراها ؟

هل ستكون بخير؟!

ترى كيف أصبح شكلها الان

لا نعلم عنها أي خبر من الجلسة للجلسة

ها هي سيارة الاسعاف تأتي

سوف نبدأ الهرولة الآن

دقات قلب متسارعة تركيز فيما يجب أن تكون عليه تعبيرات وجهي الآن فلا حيلة لنا أن نطمئن علينا

سوى تلك الثوان المعدودة ، لا بد أن أزيل النظار عن وجهي حتى تراني

أفكار متزاحمة تسابق قدي التي تجري مسرعة خلف سيارة الاسعاف حتى التقت عينانا

وتوقف الزمن وتوقفت السيارة

إنها رحمات الله ينزلها علينا

أن تُبطئ السيارة في مشهد مهيب

يا الهي أهذا صوتها الذي أسمع

يأتي واضحا من خلف جدران سيارة الاسعاف

أرى عينها وكأنها لا تبتمس الا عندما ترانا
وكانها تتدرب على ذلك اللقاء المرتقب
تدور في كل الاتجاهات طمعا في رؤية مزيد من الحرية خلف تلك السيارة المغلقة ونحن نجري بكل ما
اوتينا من قوة
"هتُفرج يا ماما"

ثم مضت السيارة بعيد عنا
ثم تبدأ رحلة الجلوس أمام معهد امناء الشرطة بطره
حتى يسمحوا لنا إن سمحوا بالدخول للجلسة ورؤيتها من خلف اسوار عاليا وزجاج عاكس لنكتفي بلغة
الاشارة في التعبير عن كل ما يحدث طوال تلك الغيبة فنفهم ما نفهم ونحاول فهم الباقي او لا نستطيع
ذلك

بالأمس سمحو لنا أن ندخل
مرافعة النيابة قد بدأت دخلنا في مشهد عبثي مرعب
نستمع الى ما يقولون من افتراءات وكذب
ثم نستمع الى جملة لم تكن في الحسبان ابدا
"لا تحتاج الى الخروج من محبستها"
فيقف أبي للقاضي ويسأله مستنكرا وهل لا يحتاج احدا الى الخروج من محبسه؟!

ولكن هيهات أن يستمعوا
فَأَنَّهَا لَا تَعْمَى الْأَبْصَرَ وَلَكِنْ نَعْمَى الْقُلُوبَ لِتَتَفَيَّأَلِ الصُّدُورِ
"رُفَعَتِ الْجَلِيسَةُ"

أين أمي ها هي جالسة على كرسي تنهض بواسطة عكازها الذي تتكأ عليه ..
يتوقف الزمن اه من عجزتي الذي حرمني أن أكون المُتكأ
سامحيني يا أمي إن لم يكن برك بيدي
فأنا عاجزة كل العجز

اخترق القاعة ازيح من وحيي كل من المح حتى استطيع ان ابلي ذلك المكان الذي تتواجد به هجمت
على حضنها وكأنني تائه وجدت وجهتها أخيرا وتشبثت بها كطفل لا يعلم من الدنيا سوى صدر أمه
تشبثت بقوة حتى لا يأخذوها مني مرة أخرى وتشبثت أكثر فأكثر حين بدأ صوت صياحهم يصم اذني
"كفاية ممنوع خلاص"

أي قانون هذا من يصادر حق اينة في الحرمان من حضن امها؟!
تضمني أمي بقوة غير مكترثة بالممنوع والمسموح فلا يحكمنا في تلك اللحظة سوى الشوق الذي بلغ
ذروته

ومن جديد نعود لفراق حتمي لم يكن باختيارنا
بل مجبورون عليه طيلة اربع سنوات
"ارجوكم سييوها شوية احنا ممنوعين من الزيارة"
دموع وصراخ واطفال وانهيارات وامهات لا يوجد بايديهن أي حيلة وآباء قد اجتازوا قهر الرجال وبلغوا
مبلغا كبيرا من القهر
يحدثني أبي
"يلا يا فدوى عشان يرضوا يدخلوكواتاني"

ولما ؟

لما استأذن حتى ارى امي ولا يسمح لي ؟ !
تافارق عينانا وانا احاول جاهدة الا نفترق ولكن هيهات
"تأجيل ل ١٦ اغسطس ياسادة"

٦٠ يوم تفصلي عن لمحة صغيرة مرة اخرى ونعيد الكرة مرة بعد مرة حتى أصبحت قلوبنا هشة
ضعيفة من الوجد
واصبحت قلوبهم كالحجارة بل اشد قسوة بلا اكرات بنا
اللهم اعد أي البنا رغم طغيانهم وظلمهم
إنهم لا يعجزونك..

FreeHoda#

<https://bit.ly/3NXnHpF>

حنان توفيق

لي أصحاب أخرجوا من مصر لم يروا أولادهم وزوجاتهم منذ ثمانية أعوام..
كلما أرادوا السفر إليه أعادوهم من المطار..

ثمانية أعوام!!

أصبح فيها طالب الابتدائية الآن طالبا في الجامعة!!
وأصبحت الزوجة العشرينية على مشارف الأربعين!!
ومثلهم أصحاب لنا في السجون لم يروا أهلهم طوال ثماني سنوات إلا مرات تعد على أصابع اليد
الواحدة، لا تزيد مدة الزيارة فيها عن خمس دقائق..

أي أنهم لم يروا أزواجهم أو أولادهم طوال ثماني سنوات إلا نصف ساعة!!
ما ذنب الصغير إذا كنت تتشفى من الكبير؟!!

وماذا صنعت لك الزوجة وأنت تنزل نعمتك على الزوج؟!!

بل، وماذا صنع لك الزوج الذي سجنته أو شرده؟!!

ما كل هذه البشاعة وقسوة القلب وسواده؟!

والله إن كفار قريش في عداوتهم لأشرف وأرق قلبا وأشد رحمة من هؤلاء الذين لم يغير الإسلام فيهم
شيئا!!

لما هاجر أبوسلمة رضي الله عنه إلى المدينة منعوا زوجه أم سلمة أن تلحق به، وأخذوا منها ولدها،
فكانت تخرج كل غداة وتجلس في المكان الذي فارقت فيه زوجها، وما زالت تبكي وتتوجع طوال سنة
كاملة، حتى رق لها المشركون وردوا لها ولدها، وتركوها تلحق بزوجه، بل وأوصلها أحدهم إلى قباء
بنفسه، حيث يقيم زوجها!!

وأم سلمة اليوم، يحرمونها من زوجها ثمانية أعوام دون أن يرف لأحدهم جفن!!

يا ليت من يتعاملون مع هؤلاء المظلومين كانوا بقسوة بني مخزوم أهل أم سلمة، وقبيلة أبي جهل!!
لي صديق حكموا عليه قبل أيام بالسجن لعامين، لأنه كان إنسانا، وأطعم أبناء معتقلين من قوته، وكانوا
جيرانه ولا يعولهم أحد..

علما بأنه ليس من الإخوان... بل من بني الإنسان والرفافة والإحسان!!

إذ كيف يتجرأ على أن يطعم من أمروا هم بتجويعهم؟! بل إن إحدى المعتقلات الآن امرأة تخطت الستين من عمرها ولا تكاد تمشي على قدميها لكثرة ما غزا جسمها من الأمراض، وكل تهمتها أنها عطفت على أطفال بلا عائل، لأن عائلهم في السجن يحتاج أصلاً إلى من يعوله!!

الأمر والله أشد وأقسى مما كان عليه حال المسلمين في صدر الإسلام، غير أن المعذبين اليوم يراد لهم أن يموتوا دون أن يسمع صوت أئنيهم أحد..

وأنا هنا لست في موضع الاستجداء والتعطف لهؤلاء الذين قادت قلوبهم من حديد... إنما لأجدد الكلام عن هؤلاء المظلومين، وتجددوه معي..

لأذكر ببعض حقوق هؤلاء المظلومين علينا، وأولها الحق في إعلام الدنيا بقضيتهم، وإسماع صوتهم لأمتهم.

لأوصل رسالة لمن يسخرون من أهل هذه الأوجاع مفادها أن مثل هذه المظالم تجفف ألف نيل، وتجويع مليون شعب، ولن تشيع وتطمئن البلدان، حتى تتوقف المظالم، وأولها مظلمة الحرمان.

وإذا كان النبي قد تأذى ممن فرق بين طائر وفراخه فكيف بمن فرق بين زوج وزوجته، وأب وولده!! بل وصل الأمر إلى حرمان فتيات لسنوات طويلة من الزفاف إلى أزواجهن حيث يقيمون، لسنوات

طويلة، لأن العروسين أبناء معتقلين، أو ممن يمتون لهم بصلة!!

لعلكم الآن أدركتم لماذا يطول يوم القيامة لخمسين ألف سنة!!

والحمد لله أن هناك آخرة... وإلامات المظلومون كمدا.

#خالد_حمدي

<https://bit.ly/3N5KwWY>

15 يونيو

عن جعفر الزعفراني

جعفر محبوس من ٨ سنين ونص من وقت ما اترحل سجن المنيا من ٣ سنين وهو في الدواعي يعني

ممنوع تريض وكتب او يطلع حتي من الزنزانة والكانتين بالمزاج اللي هو طريق الأكل الوحيد.. جعفر

تعب جدا وجسمه خس وممنوع يطلع حتي يقابل اي حد من المعتقلين التانيين

انا مش عارفة اعمل ايه عشان الظلم ده يترفع من عليه

جعفر ٣ سنين في الدواعي بدون مبرر او سبب

حتي مش زي باقي المساجين في زنازين عادية ليه كده

الوضع صعب وانا مش عارفه اعمل ايه

بالله كفاية ظلم بالله

يارب

#الحرية_لجعفر_الزعفراني

<https://bit.ly/3HF3OKT>

عن محمد عادل

بتخيل اليوم اللي أنهي فيه علاقتي بالسجون، اليوم الدهيبقى محمد موجود فيه ف أي وقت وكل وقت، اليوم اللي نقدر نتمشى ف الشارع تحت السماء وع البحر وقت ما نحب ونروح بيتنا وقت ما نحب، اليوم اللسمفيهوش جرس بيرن عشان الزيارة انتهت، اليوم اللي ممكن أحكي له فيه كل مشاعر الحزن اللجوايا من غير ما أخي عشان هي دقايقوهيرجعتاني ف زلزانه ضيقة من غير ما حد يهون عليه، اليوم اللي حياتنا تبقى فيه ملكنا، ملكنا احنا الاتنين بس!

Mohammed Adel

#الحرية_لمحمد_عادل

<https://bit.ly/3HuZRij>

عن محمد الباقر

عن بسبوسة وباقر ..
قبل القبض على باقر ب ٦ شهور .. كنا راجعين مرة بالليل .. لاقينا قطة صغير ما كملتش ٣ أسابيع في الدور عندنا .. عرفنا أنها كانت محبوسة في جنينة محل مقفول في الويك اند وقعت تنونو وحد نط جابها .. وحطولها اكل ومايه .. بس هيه فضلت ماشية وانا ومش خايفة وعمايز تدخل معنا الشقة .. وصعبت علينا .. بس عندنا ٥ قطط انقاذ وبيتخانقوا مع بعض وفصلينهم في اوضتين.
باقر صعبت عليه جداً وضعف اتجاه حجمها الصغير ووحدها ولعبها معاه .. وقال ما جاتش على القطة دي .. ودي صغيرة .. وهنلاقيها بيت .. وانا اصلاً ملصمة قلبي بالعافية عشان احاول اقاومها .. ضعفنا طبعاً واخذناها ..

دخلنا بيها اوضتنا عشان كل القطط عندنا خايفين منها .. وفي حوض حمامنا شغلنا المايهالدافية وحمناها وخرجنا ١٧ برغوت! وباقر اخدها يديها وفضل شايلها عشان باقي القطط ما تأذيهاش .. واكلها ولعب معاه لحد ما نامت في كفه (صور بالليل) .. وقتله نسميها ايه؟ بص لحجمها كدا وقال "بسبوسة .."

ومن وقتها وهيه لازقة في باقر (صورتها وباقر بيشتغل) .. وفضلت بسبوسة مونساني في البيت لحد النهاردة .. ومفكراني كل يوم بحنية باقر .. مع خلق الله ..

#الحرية_لباقر

<https://bit.ly/3xVvGxz>

15 يونيو

عن جعفر الزعفراني

جعفر محبوس من ٨ سنين ونص من وقت ما اترحل سجن المنيا من ٣ سنين وهو في الدواعي يعني ممنوع تريض وكتب اوطلع حتي من الزنانه والكانتين بالمزاج اللي هو طريق الأكل الوحيد .. جعفر تعب جدا وجسمه خس وممنوع يطلع حتي يقابل اي حد من المعتقلين التانيين انا مش عارفة اعمل ايه عشان الظلم ده يترفع من عليه

جعفر ٣ سنين في الدواعي بدون مبرر او سبب
حتي مش زي باقي المساجين في زنازين عادية ليه كده
الوضع صعب وانا مش عارفه اعمل ايه
بالله كفاية ظلم بالله

يارب

#الحرية_لجعفر_الزعفرائي

<https://bit.ly/3mSc0Ez>

16 يونيو

عن أحمد دومة

الاستاذ عبد الله السناوي قال لأول مرة النهارده على الملاء ان الاستاذ هيكل الله يرحمه طلب من الرئيس الافراج عن احمد دومة في اخر ايامه .. والرئيس وعده انه هيفرج عنه فعلا .
كان في محاولات كتير قبلها وبعدها لكن دي كانت المرة الوحيدة اللي رأس الدولة وعد بنفسه فيها بالافراج عنه. احنا استنينا احمد يخرج وقتها بناء على وعد الرئيس لحد بقيمة وقامة الاستاذ هيكل، استاذ هيكل توفي في ٢٠١٦ .. اما آن لأحمد دومة انه يخرج بقى والرئيس ينفذ وعده؟
ادعي ان احمد دومة صاحب اكبر عدد من الفرص ومن الداعمين والمدافعين والساعين للافراج عنه من المؤيدين للدراة الحالية، بجانب طبعا تياره من المعارضين .. مواقف واشخاص ومساعي كتير يمكن ييجي يوم ونحكيها زي ما استاذ عبد الله ذكر واحد منها النهارده. كل هذه الفرص والمحاولات اهدرت بما فيها الفرصة اللي ادتهاله محكمة النقض بشكل قانوني قاطع لا يحتمل اي لبس .. ومع ذلك اهدرت زي غيرها

كل زملاء ورفاق واصحاب واحباب احمد دومة اخدوا فرص في الخروج من السجن .. كتير منهم رجع تاني وكتير منهم الحمد لله لسه حر، الا احمد دومة .. ولا فرصة .
لو نحكي كام مرة كان خارج ثم توقف خروجه دون اسباب، نعرف اد ايه في تيار شرس وانتقامي -على قلته- بيستهدفه بشكل شخصي ودون توقف .

أحمد دومة بقاله ٨ سنين و٧ شهور في السجن.. يا كل خصومه، أحمد كتب في حوار منشور في المصري اليوم انه سامح حتى اللي عذبوه .. انتوا بقى السنين دي بالنسبالكم مش كفاية؟
#الحرية_لاحمد_دومة

<https://bit.ly/30s1f7X>

عن خالد صادق



قلبي مخضوض من الصبح كل ما بحاول اسكت ومتكلمش
وافقد الامل بلاقيه بيتجدد من تاني وافضل اتابع وأشوف كل
المسئولين كاتبين حاجة عن خالد وللاً.. ارجوكم مترعوش
الأمل فينا وبعدين تكسرونا من تاني ..
ارجوكم فرحونا..
زمانه مبينامش عشان يسمع خبر حلو
#مش_عاوزه_اروح_هناك_تاني

#طلعولي_خالد_من_السجن
#قضية_مجلس_الوزراء
#الحرية_لخالد_صادق
<https://bit.ly/3xDKpvJ>

17 يونيو

عن محمد عادل

دلوقتي فاضل 48 ساعة ومحمد يتم 4 سنين حبس احتياطي، قبلهم مراقبة سنة ونصف، وقبل
المراقبة حبس 3 سنين!
هل ف نية إنه يخرج ويعيش حياته اللاتسرت منه؟ هل ممكن أنا أعيش حياة عادية بعيد عن
السجون؟ ممكن ولا مفيش أمل ف يبقى الحل الوحيد إني أنتحر مثلاً عشان أخرج من دائرة السجون
الى محشورين فيها من 9 سنين!
فاضل ايه؟ باقي كام سنة؟ هنعجز ف السجون؟ أسناننا هتقعوهنسمك عكايز ف واحنا ف السجون؟
هنعيش امتي؟
كل السنين دي مش كفاية؟ كل العمر الى راح مننا ده مش كفاية؟
7سنين سجن وسنة ونصف مراقبة يومية !
<https://bit.ly/3b8IM1Q>

18 يونيو

عن معتز صبيح

بقول لمعتز انا تعبت ومش قادرة اتحمل ..قالهتقدر بياماهتقدرى .. جبت منين الثقة دى..
قالى هو انتكنتنتخيلى انى اقدر اعيش سنتين وشهرين تحت الارض ..عيشتهم وادينى قدامك اهو ..
هم بس كم شعراية بيضة طلغولى ..

#الحرية_لمعتز_صبيح

#كفاية_٧_سنوات

#العيال_شعرها_ابيض

<https://bit.ly/3Ot1Y8J>

عن هشام عبدالعزيز

“عشرة أيام ويكمل العام الثالث حسبنا احتياطيا بلا ذنب،
إلا أنه صحفي وإعلامي يعمل بشبكة الجزيرة
الإعلامية”. وتابع: “الحرية لهشام عبدالعزيز، خرجوا
هشام يتعالج عينه في خطر،”

“في العشرين من يونيو عام 2019، قدمنا إلى مطار
القاهرة بصحبة أولادنا، لكن ضابط الجوازات تحفظ على
جواز سفر هشام ونقله إلى مكتب ضابط أمن المطار في



صالة 4، وانتظرنا حوالي 6 ساعات، وكلما سألنا عن السبب قيل لنا أن الموضوع تحريات عادية وتشابه
أسماء، بعد ذلك تم عاد هشام بصحبة أمين شرطة قام بتفتيش الحقائب التي كانت بحوزتنا والهاتف
المحمول، ثم تم السماح لنا بعد ذلك بمغادرة المطار على أن يذهب هشام إلى مقر أمن الدولة لاحقا
لاستلام جواز السفر.”

“يعاني من الجلوكوما (مياه زرقاء) مع ارتفاع في ضغط العين، مما يسبب له عتامة في القرنية وألم
شديد، إضافة إلى إصابته بـ تكلس في عظمة الركاب بيزيد تدريجيا لدرجة أنه لا يسمع بأذنه اليميني.”

<https://bit.ly/3y6wGza>

عن عمرو إمام

لسه واصل لنا رسالة من عمرو، بيوصل سلامه لكل لكن للأسف بيبلغنا كمان إنه تعب جدا وبيقول
نصا "الإنظار بياكل من روحي أكثر من السجن نفسه" بيطلب من كل اللي يقدر يتواصل مع أي حد
يساعده إنه يخرج ويفهم ليه من أكثر من شهرين اتقاله إنه خارج وانتشر الخبر ومع ذلك هو لسه هنا..

#الحرية_لعمرُو_إمام

#مش_عاوز_اروح_هناك_تاني

<https://bit.ly/3xDEjeV>

محمد عادل

من 4 سنين، لو كان حد قال لي إن ف حبس احتياطي هيستمر 4 سنين، كنت قولت عليه مجنون !
أسوء وأقبح السيناريوهات اللي تخيلتها وقتها الوضع ده هيستمر سنتين، لا، وكنت زعلانة اوي
وبعيط، الحمد لله بطلت عياط بقي

<https://bit.ly/3b7Cr6x>

عن خالد سحلوب

غداً الحكم النهائي في قضية أخي الصحفي #خالد_سحلوب قضية وقعت أحداثها بعد اعتقاله بـ 8
شهور!!
لما بنحسب فترة اعتقال خالد اللي تجاوزت 8 سنين وبدأنا في السنة 9 بنعيش في حالة صدمة كبيرة
جداً

مش طبيعي أهم فترة في عمر الإنسان يعيشها في سجن زي #العقرب ظلم!
لا تنسوا خالد ربنا ينجيه ويرضيينا فيما يرضاه لنا الله..

#الحرية_لخالد_سحلوب

<https://bit.ly/3QBSgma>

عن عمرو إمام

٣٢ شهر وأكثر من السواد وقلب أمي حزين ومفطور على عدم وجود ابنها الأكبر. وفرحة سيف ابنه
مكسورة لعدم وجود عمرو في أهم مراحل طفولته زي دخوله أول يوم مدرسة. وحياتنا كاخواته مليئة
بالانكسارات والمعافرة مع الحياة لعدم وجود السند والاخ الأكبر .

٩٧٥ يوماً وقد قاربت إلى ١٠٠٠ يوم.. رقم مرعب. وبنتمنى كلنا أنه يبقى موجود وسطنا قبلها ومازلنا
متمسكين بكل ذرة أمل وإن ربنا كبير وهي جبر بخاطرنا وبخاطره بعد كل الصبر دا.

عمرو تخطى السنتين حبس احتياطي بـ ٧ شهور وحبسه الآن غير قانوني غير أنه خرج اسمه في قائمة
يوم ٢٤ ابريل لمجموعة من ٤١ فرد مخلى سبيلهم وللأسف عشنا فرحة لساعات وانكسرت وانطفت
بعدها فرحتنا بعدم خروجه عمرو ودا أكثر شيء وجع عمرو فرحتنا اللسمكمتش بعدم خروجه فقط لا
غير من وسط القائمة رغم تأكيدات من الجميع أنها أيام فقط وهيكون وسطنا ومعانا.

ومرت الأشهر والأسابيع والأيام والساعات ببطء رهيب من وقتها واحنا كل يوم مستنين خروجه
ومش عارفين سبب منع خروجه زى ما احنا مش عارفين بعد كل دا سبب حبسه ايه. بس لسه كلنا
أمل فى ربنا وفى عدله واكيد إن النور هيجى بعد كل الظلام دا والظلم هيترفع عنه.
عمرو كل يوم وكل دقيقة من رسايل الحب اللبتجينا ومن المواقف اللبتتحتكى عنه ومن معرفتنا به
بيخلي راسنا فى السما مرفوعه.. وبيخلينا فخورين إنه كبيرنا وهو مصدر أمان لنا كلنا فى أي مكان وفى كل
وقت.. كبيرنا وحبينا المحامي عمرو امام.. مستنينك يا عمرو كل ليلة وكل نهار.. ماما مستنيك..
وسيف مستنيك.. وكل صحابك وحبايك.. وواثقين فى رحمة ربنا بينا وقرب الفرج..

#الحرية_لعمرو_إمام

#مش_ناسينك

#مش_عاوز_اروح_هناك_تاني

<https://bit.ly/3y60zQ1>

عن هشام فؤاد



“زرت هشام مؤخرًا فى محبسه، وهو ما يزال يعاني من أزمات صحية نتيجة إصابته بعدد من الأمراض
المزمنة، كما أنه يعاني أيضًا من استمرار حبسه طوال هذه المدة.”
“تلقينا وعودًا بالإفراج عن زوجي ضمن قوائم لجنة العفو الرئاسي، لكنها ما تزال وعودًا دون تنفيذ حتى
الآن، هشام ما يزال لديه أمل فى ترجمتها على أرض الواقع، لكن ليس هناك شيء بأيدينا.”
“هشام سجين رأى من دون اتهامات حقيقية، ومكانه بيته وعمله وليس السجن ربنا يهون.”

<https://bit.ly/3n4cfwu>

19 يونيو

عن زياد العلمي

منظر الاهالي وهمه بيجروا ويصرخوا ويشاوروا يمكن حد يلمحهم -من الاشباح اللي ورا شبك فتحات
عربية الترحيلات- .. منظر مش ممكن يحسه الا اللي شافه بعينه!! وقسوة احساس العجز لما واحد
جوه العربية حاطط ورقة - من ورا القزاز - غالبًا فيها نمرة تليفون اهله، ما حدش فينا عرف يلقطها ولا

يشوف مكتوب ايه 😞. ياربي على احساس العجز وانت شايف ملهوف بيستغيث ،ومش قادر تقدم له العون 🙏 يارب قويهم وصبر اهلهم لغاية ما يرجعوا لهم بالسلامة
<https://bit.ly/3tLaate>

21 يونيو

عن محمد الباقر

قابلت واحدة ادم السجن .. كانت بتحي اد ايه جوزها واحشها ويقالها سنين ما شافتهوش .. وقالت وابتسامة حالمة جداً .. وبلهجة حلوة (كان نفسي اكتبه على شنطة الأكل اللي هتدخله "بَ فتحة باء .. بَحَبِك") .. فراحت واحدة ست تانية مكلمة وقالتها (بَ كسرة بي .. بِشدة) .. واتنهدوا وضحكوا كلهم .. كأنها أحلام مستحيلة رغم بساطتها الشديدة لحد الألم ..
وافكرت واحنا صغيرين وبنترفج على صباح بتغني الأغنية دي في فيلم الأيدي الناعمة .. آخر حاجة كنت اتخيلها أن الأيام تلف .. ولما أكبر اسمعها من تاني ادم السجن .. ككلمات تلخص كل أشواق الستات لأحبابهم في السجون .. عبر الأسوار ..
#الحرية_لباقر

<https://bit.ly/3OqJe9Y>

عن معتز صبيح

امبارح معتز كان عنده امتحان في استقبال طره وكان موعد زيارتي نفس اليوم فحاولت قدر الإمكان اروح متأخرة شوية عشان اقدر اشوفه بعد ما يخلص الامتحان وانا قاعدة قدام السجن شوفت لجنة الامتحان وهما خارجين من جوه قلت الحمد لله بس افكرت لما كان صغير واول اسبوع فكجبوبيقولي الواحد زهقان امتي بقى اخلص المدرسة دي طالت عليك الايام قوى يامعتز وقاربت على الثامنة والعشرين ولسه ماخلصتش تعليم ..المهم انه كان في الزيارة امبارح تعبان ووشه وارم وعنده كيس دهنفي الفك العلوى عامل له مشاكل جامدة وقعد يقولاتكلمانتياماما انا دماغى فاصل وكأني لسه في لجنة الامتحان قلت له مش مهم نتكلم خالص خليني ابص لك واملى عيني منك كفاية

<https://bit.ly/3naYVX7>


22 يونيو

عن محمد عادل

ما عرفتش أطلع المحكمة للأسف، حسب ما قال ظابط الحرس إنه متوصي عليا أنا توصية كبيرة إني أنا تحديداً ما طلعتش!
ما قدرتش أشوف Mohammed Adel غير إني لمحتته وهو بيركب عربية الترحيلات!

لكن هو بعت لي الوردة دي ❤️ مع NabehElganadi

<https://bit.ly/3zYfZYe>



23 يونيو

عن محمد الباقر

باقر كان كل ما يتأخر في الشغل أو يلغي معاد غدانا مع بعض لوحدنا (اللي هوه يبقي مرة كل أسبوعين مثلاً) .. كان يقولي كام كلمة مختصرة تلخص قضية شغال عليها أو حد من أصحابه عنده مشكلة .. ويقولي (يعني اسيب ده عشان نتغدى؟ انهي أولى؟) .. فأنا طبعاً اقله (اللي بتعمله أولى) وأنا بجز على أسناني كأني ست مصرية أصيلة .. ومتأثرة بأنسانيته في نفس الوقت ..

والحمد لله بعد ٣ سنين حبس تقريباً .. وعدني أنه لما هيخرج إن شاء الله .. هيتغدمعايا لوحدنا مرتين في الأسبوع .. وهنقعد نتكلم نص ساعة كل يوم .. ونتمشى نص ساعة كل يوم .. وفخور بنفسه جداً وهوه بيقولها .. وحاسسبالانجاز التاريخي 😊 هيجنني..

<https://bit.ly/3HJf53A>

عن أحمد حسن مصطفى

استيقظت عدة مرات النوم يجافيني يا صغيري كثيرا من كثرة التفكير في كل تلك الأفكار المتلاحقة التي لا تتركني أبداً وتحاصرني اشتقت إليك يا صغيري لا أصدق أبداً أنني لم أراك منذ الثلاث أعوام ونصف منذ لحظة القبض عليك اعلم إن ذلك جنوني وغير معقول بالمرّة من منا يصدق أن ذلك حدث، كل يوم استيقظ وأنا لا أصدق أن يوماً جديداً قد أتى وأنت لست هنا أحيانا أكره الصباح بشدة وتارة استمع إلى أغانيك المفضلة احضر فنجان قهوتي وحيدته نعم لست هنا في بعض الأوقات أغفل عنها أنت لست هنا لتتشاركها سويًا ونضحك أيضاً حينما تختلس بضع رشقات كنت انهرك وأخبرك أن تتركها لي أقسم لك أنني أتمنى لو تأتي وتأخذها كلها ولن أخبرك أي شيء سأتأملك فقط لأعوض تلك السنوات سنستمع

إلى كل تلك الأغاني التي تعشقها سويا حتي شارات الكارتون سأعيدها مرارا وتكرار لأجلك أقسم لك علي ذلك سأشاهد لوفي إلى جوارك ,أتعلم أصبحت أحبه الآن لأنه يذكرني بك ,لا أعلم لم كل تلك القسوة في إجبارك وابعادك عنا لا أعلم ما غاية كل هذا أما يكفي كل هذا الألم والحزن امايكفينا تلك السنين العجاف ,لم أعد أعلم من أناشد يا صغيري حتي يعيدك إلى ولكني ادعوا الله وانتظر انتظر بصبر لا ينتهي وبحب يزداد يوما بعد يوم وأمل لا ينقطع في عودتك اتوحشتك يا قلب أختك وروحها
#احمد_حسن_فين

<https://bit.ly/3tZYrHd>

عن جعفر الزعفراني

٨ سنين و٣ شهور و١٨ يوم إعتقال ظلم
حسبنا الله ونعم الوكيل
#الحرية_لجعفر_الزعفراني

<https://bit.ly/3zZRFFh>

عن حمدي الزعيم

عام ونصف العام وحمدي رهن الحبس الاحتياطي أبنائي يكبرون
والدهم ليس معهم
يسألوني دائما متى سيأتي بابا لا أجد رد سوي ابتسامة حزينة واقولهم
قريبا باذن الله
حمدي منذ عام ونصف العام وهو رهن الحبس الاحتياطي عام
ونصف ونحن بدونه



مالك الصغير أصبح عمره الان خمس سنوات الذي اتى للحياة ووالده
كان رهن الحبس الاحتياطي أيضا لم يراه وهو يكبر لم يلعب معه
وليس معه الان أيضا وأصبح لا يتذكره كثيرا ابنتي الكبيرة ميرنا
تخرجت وأصبحت محامية وتدافع عن والدها ولم يراها بثوب التخرج وابنتي ملك الان بالثانوية
العامة ووالدها ليس معها ليطمئننا ويقول لها أن كل شئ سيكون علي مع يرام وابني فارس أصبح
بالصف السادس الابتدائي و والده لم يكن معه منذ طفولته وانا المسئولية تزيد علي واحتاجه كثيرا و
تمر بنا الذكريات وهو ليس معنا

حمدي منذ 6 سنوات ماين الحبس الاحتياطي والتدابير الاحترازية هذه السنوات من عمره واعمارنا
ونحن نطالب بالإفراج عنه
#الحرية_لحمدي_الزعيم

<https://bit.ly/39R38fD>

24 يونيو

عن زياد العلمي

صباح الخير يا زياد.. يارب تكون بخير انت وكل الطيبين اللي عندك.. النهارده تكمل انت وهشام فؤاد ثلاث سنين سجن من غير اي معنى وبلا اي تهمة حقيقية تستحق عقاب!!.. ثلاث سنين وانت بعيد عن ابنك وامك واخوك واهلك واحبابك ولقمة عيشك ومستقبلك، وهشام بعيد عن اولاده وزوجته الجدعة مديحة حسين اللي ضربت أروع مثل في الصبر والجدعنة والتحمل وشيل المسؤولية. ربنا يعوضها افراح كثير ويفرحها باولادها ويقدر هشام يرد لها جميلها ويشيلها فوق راسه عمر طويل (وربنا يا زياد يرزقك ان شاء الله بزوجة زيها، تستاهلكوتستاهلها، وتعوضك عن كل اللي فات 🙏) وعن شغله واصحابه.. سنوات من عمركم انتم واللي زيكم بتضيع لمجرد انكم عبرتم عن رأيكم بالكلمة، لا سرقتم ولا نهبتم ولا رفعتم سلاح في وش حد، ولا تاجرتم في المخدرات! ربنا يهون عليكم ويعجل بالفرح وترجعوا لاجيالكمبالف سلامة، وما يبقاش في بلدنا مسجون رأي، عشان دي اكثر حاجة مسيئة لسمعة مصر لو الناس عايزة الحق!! مافيش دولة متحضرة في القرن الحادي والعشرين بيتسجن فيها انسان قال رأيه

#الحرية_لزياد_العلمي

#الحرية_لهشام_فؤاد

#الحرية_لكل_سجناء_الرأي

<https://bit.ly/3HU2bj9>

25 يونيو

عن ياسر الجارحي

أكثر ما يؤلمني في زيارة ياسر أنها تنتهي دون أن يعود معنا، يدق الجرس ليؤذن بنهاية المدة. يودعنا ويعود إلى حيثما كان، وأجرّ أنا خلفي حقائبي الفارغة وأجرّ معها خيبات الأمل. وأفكر في الأسئلة التي لا أعرف إجابة لها، لماذا هو هنا؟ ولماذا أنا هنا؟ ولماذا كل هذه القسوة؟ ولماذا يدفع من لا ذنب له كل هذا الثمن؟

<https://bit.ly/3Opurwr>

26 يونيو

عن عمرو إمام

امبارح كانت زيارة عمرو وجلسته النهاردة . عمرو بيسلم على الناس كلها اللي بتسأل وبيشكر أي حد مهتم بخروجه. وبيقول لكل اللي خرجوا ألف حمد لله على سلامتكم وفرحان جدا لخروج الناس وعلى آد انتظاره للحظة خروجه بس كل ما الباب في السجن يتفتح وبيخرج حد بيحس بفرحة كبيرة جدا

وبيحس بانتصار شخصي له لأن يمكن دا سبب حبسه في النهاية آخر كام فترة له كان بيدور بس على حرية الناس .

مقدرش أقول غير الحمد لله لكن أكيد بعد ٣ سنين حبس احتياطي مبقاش في شيء يتقال غير طلبنا لحرية وطلبه لحياته الطبيعية..

أنا واخواتي وقبلنا أي تعبنا من كلمة سجن وزيارة.. مش عايز أروح هناك تاني بجد.. ومش عايز أخويا يفضل هناك أكثر من كده كمان..

عمرو كويس والزيارة كويسه لكن الوضع نفسه هو اللي مش كويس.. مش عايز اشوفه تاني ورا اسوار وحديد بلبس الابيض.. عايز اشوفه تاني بيضحك وقاعد وسطنا بالألوان.. عايزه سعيد ومطمئن عليه وهو ابنه في حضنه وكلنا حوالية..

عايز عمرو اخويا المحامي الطيب بدوشته وهزاره وجده.. أتمنى تكون آخر زيارة وبيطلب منكم كلكم تدعوا له يخرج قريب.. ولسه عندنا أمل في كل وعد من شخص محترم اتقال لنا.. ومن كل محاولة من ناس محترمه لحل الأزمة دي واسترداد اخويا وكل اللي زيه حريتهم.. هو واحنا متشعبطين في الأمل في الله وفي العقول والقلوب الطيبة.. فيارب ما تقطع رجائنا وهونها عليه..

#الحرية_لعمرو_إمام

#مش_عاوز_اروح_هناك_تاني

<https://bit.ly/3A2KrQS>

عن محمد الباقر

جواب لباقر بعد مرور ١٠٠٠ يوم في السجن..

حبيبي .. أنا آسفة جداً جداً أنني عاجزة وقليلة الحيلة للدرجة دي، ما كنتش اتخيل في يوم أنك ممكن تكمل ١٠٠٠ يوم محبوس من غير شمس .. بتجنن كل ما اتخيل نفسي مكانك محبوسة في أوضة مش بخرج منها .. وأيامك ولياليك مفيش فرق بينهم .. وبتخيلك وأنت بتحاول تعرف الوقت من ضوء الشبابتك .. وتحاول تعرف شكلك بقى ايه من انعكاس صورتك في المايه في الطبق .. وتحاول تعرف الكوكب بيحصل فيه ايه من اي حد بينزل جلسات محكمة .. ورغم كذا صابر .. وبتحاول دايماً تصبرنا وتضحك ادامنا عشان نقدر نكمل .. وما بتشتكيش ابدأ ..

بس انا تعبت اوي من قلقي عليك .. وحشتني جداً جداً .. والحياة موحشة أوي في غيابك .. حالة انتظار اجباري بتحتوي جواها كل مرادفات العجز والألم .. ومش بأيديك ولا ايدي نهيها .. ونحلم بيوم نتجمع فيه من تاني .. ونبدأ مرحلة سلام مع كل معاني الحياة العادية .. ونحضن بحب كل الأيام الرتيبة المملة .. ونقدر كل لحظة في كل يوم شبه اليوم اللي قبله .. ونقدس كل تنهيدة استكانة بدون افكار مؤلمة .. ونعتبرها انتصارات صغيرة مش هيقدرها غيرنا ..

وارجع واقول"

لسه الطيور بتفنّ

والنحلايات بتبتطنّ

والطفل ضحكه يرنّ

مع ان مش كل البشر فرحانين"

<https://bit.ly/3NpwNKC>

27 يونيو

عن أنس البلتاجي

امبارح كانت جلسة أنس و محضر شو محدش من محامينه قدر يحصل علي معلومة عنه..
انس ملوش زيارة،
الجلسة هي الطريقة الوحيدة للاطمئنان عليه!
انس رهن الحبس الاحتياطي بقاله ٩ سنين..
٩ سنين حبس احتياطي وهو ليس ناشط سياسي أو عضو مجلس شعب أو رمزا ثوريا فمش مفهوم
حتي سبب تعسر إخلاء سبيله علي مدي السنين..
للأسف رحلة الاعتقال فردية و التجربة لا تسمح بالموازنة الجماعية ممن في نفس البلاء في السجن..
ضعف الطالب و المطلوب
#الحرية_لأنس_البلتاجي
<https://bit.ly/3u2EtLN>

28 يونيو

عن عائشة الشاطر

اه يا ماما
مش عارفة ولا قادرة اقول حاجة
كفاية والله اللي بتعملوه ده
تقاريرها الطبيه اللي رفضتم قرائتها دون عن أي حد اثبتت
لكم أن حالتها متسحلمش يوم واحد كمان في السجن
والوحدة والبشاعة دي
مش قادرة أصدق أن الحل بالنسبه لكم تغيرو التقارير
وتقولو أن الصحة تمام
ليه بتعملو حاجات مستحيل تصديقها من جلسة لجلسة



الحالة تحولت والنخاع اللي بيشتغل بكفاءة والكانيولا اللي كانت في ايديها والدم اللي كان
بيتنقلها والمناعة اللي كانت واطيه كلو بقوا كويس جدا وطبيعي ؟ طب حتى قولو في تحسن ،، حاولو
تخلونا نصدق ونضحك معاكم على نفسنا ونفرح ونظمن. دي ست والله والله ما في تهمة واحدة تدينها
ومع ذلك بقالها ٤ سنين، مش كفاية ؟ حرمتوني اشوفها وحرمتوني منها ومن زيارتها مش كفايه ؟
بهذه الكلمات عبرت ابنة عائشة الشاطر عن مدى الحزن والقهر والظلم الذي تعيشه هي وأخواتها
لمنعهم من الزيارة منذ اعتقال والدتها في أول نوفمبر 2018 وحتى الآن ،حتى ساءت حالتها الصحية
وكانت تحتاج إلى علاج نخاعي وتحويل للمستشفى إلا أنهم فوجئوا بتقرير يثبت أنها سليمة ولا تحتاج
لللعلاج .

<https://bit.ly/3a0U4F7>

عن محمد الباقر

ماما كانت في زياره لباقر هو الحمد لله كويس جدا و بيسلم علي الناس كلها و طائر في السما من السعادة من اخبار الناس الي بتخرج فرحه لا توصف ، ربنا يفرجها عليك يا أخي قريبا يارب و تبقي في وسطنا في العيد عشان يبقي احلا عيد في الدنيا .

<https://bit.ly/3HZHdzv>

عن يوسف منصور

نداء إلى السيد رئيس الجمهورية ..
نحن أسرة يوسف محمد منصور رجب، المحامي الحقوقي، المحبوس احتياطيا على ذمة قضية أمن الدولة العليا رقم ٣٣٠ لسنة ٢٠٢٢ بتهمة نشر اخبار كاذبة، على خلفية نشره أخبار وشكاوي موكلية. ناشد رئيس الجمهورية بإصدار عفو صحي، حيث انه يعاني من حمى روماتيزمية ومشاكل في الفقرات، وفي آخر زيارة لنا له في السجن، ظهر عليه إعياء شديد واشتكى من آلام الركبة والظهر، وضربات قلب، وتم عرضه على طبيب السجن، الذي صرف له مسكنات، ولم تتحسن حالته بسبب نومه على الأرض، وبدا هزيلا لا يقوى على الحركة..
نرجو رحمة به وبنا الإفراج الفوري حتى لا تسوء حالته الصحية ..
توجد تقارير عن حالته الصحية..

#الحرية_ليوسف_منصور

<https://bit.ly/39XVHn6>

عن سيد عبد اللاه

وصلتني اخبار عن زوجي الصحفي #سيدعبداللاه من داخل محبسه .أنه دخل فحالة اكتئاب شديده وأصبح مضطرب نفسيا وأنا نوهت عن حالته من اخر زياره ليا ٢٨ مايو الماضي .سيد من اكثر الشخصيات اللي بيتعامل بأقصى درجات ضبط النفس .معني أنه يوصل للمرحلة دي اذا سيد في مرحلة الخطر واخشي عليه من اذي نفسه .بطالب بأخلاء سبيل زوجي . لازم اعرضه عالطبيب نفسي فأسرع وقت .من اخر زيارة وانا حاسه بتغير في سلوكه وشخصيته عدي شهر من اخر زيارة حالته أصبحت اسوء . كما وردتني معلومات أنه فأنفرادي..

#انقذوا_الصحفي_سيد_عبداللاه

<https://bit.ly/3NqDsnH>

عن حسين محمد ابراهيم الغرابلي

القصه و ما فيها

ان والدي كان علي علاقه صداقه ب القاضي ايمن حجاج
ايمن حجاج طلب من والدي استأجار مزرعه عشان يربي فيها خيل و يدبح فيها عجول عشان العيد
الكبير قرب و غيره

يوم الأثنين 2022/6/20

والدي كان ف المزرعه بيخلص باقي تشطيباتها

جيه ايمن حجاج و مراتو الثانيه شيما جمال الأعلاميه الشهيره ب مذيعة الهيروين

ايمن حجاج طلب من والدي شاي

قام والدي ب كل احترام يعمل من باب يسيبهم براحتهم

سمع زعيق و سب و تهديدات ب جريمه و فساده الي عملو ف شغله من المذيعة ل ايمن حجاج

بعدها هما الأثنين فضلوا يزعمو مع بعض و شتايم ف بعض

والدي راح يهدي الدنيا

كان ايمن حجاج مسك سلاحه الخاص و ب ضرها ع دماغ شيما جمال بعدها خنقها ب الأيشارب

والدي كان شايف كل دا و فضل يزعم ف ايمن حجاج و ايمن حجاج فضل يهدد والدي ب القتل و

حبسو ف اوضه و خد منو تلفوناتو و فضل سايب محبوس والدي خمس ست ساعات

بعدها خرجو و هددو ب القتل و عياله لو اتكلم والدي روح و كان منهار من العياط و حكالنا

تاني يوم ايمن حجاج هدد بابا و خدو الساحل و حجزه عند ناس عرباويه

اول ما والدي هرب راح بلغ نيابه الحوادث

و جابوني انا و اخواتي يحققو معانا و اقدر المعاملات شوفناها هناك و تهديدات لينا ك عيالو انا

هنتحبس لو مقولناش ع مكان الجثه مع العلم ان حتي والدي ميعرفش مكانها

و والدي فضل شاهد ملك

لحد ما رفعوا الحصانه من علي ايمن حجاج

و هرب

و هددو والدي و هو جواب اشد التهديدات

و خدوه متهم ثاني

انا معرفش مكان والدي حتي والدي مش هيكون ضحيه الفساد و الرشاوي والدي كان جاي منهار من

العياط من خوفو من ربنا

اسم والدي حسين محمد ابراهيم الغرابلي اخر مكان كنت اعرف انه فيه نيابه الحوادث

#وديتو_الشاهد_فين_اهله_بتدور_عليه

<https://bit.ly/3OvWoTD>

29 يونيو

سنة عبد الجواد

د محمد البلتاجي

أنس البلتاجي

كل المعتقلين كل باسمه وكل ذويهم النبلاء
اللهم هب لنا جميعا عزيمة لا تضعف ولا تنكسر
ونفسا لا تقهر، وصبرا لا ينفد، واجرا لا ينقطع
واملاً قلوبنا تسليما ورضا واحتسابا، وارزقنا عوضا عن الحرمان والوحشة والبعد عن احبابنا، انسا بك
وبمعيتك ولذة صحبتك، تهون بها علينا ما نجد ونلاقي
المعتقلين وذويهم حقهم في الدعاء في سجداتكم
فلا تنسوهم

<https://bit.ly/3AeliCE>

30 يونيو

عن محمد الباقر

زي النهاردة من ٩ سنين .. يوم ٣٠ يونيو ٢٠١٣ .. اتقابلت انا وباقر واتنين اصحابنا وركنت العربية
ودخلنا مع المظاهرات اللي طالعة من رمسيس مع المظاهرات اللي خارجة من التحرير .. وكملنا لحد
الاتحادية .. واحنا راجعين آخر اليوم من عند الاتحادية .. كانت التاكسي قليلة جداً .. وكل ما نلاقي
تاكسي يلاقي باقر بدقن .. فما يرضاش يوصلنا لمكان العربية عشان دقن باقر .. فضلنا ماشيين بالليل
لحد قرب مبنى التعبئة والاحصاء على صلاح سالم .. ومن التعب قعدنا على الرصيف عند البنزينة ..
لاقينا تاكسي جاي من بعيد فقلنا لباقر يستحى على جنب .. وركبنا التاكسي احنا الثلاثة وقلنا للسواق
ثانية واحدة .. وشاورنا لباقر جه جري ركب معنا .. السواق ضحك وقالنا "انتم مخبينه مني!" .. وقعد
باقر يحكيه على اللي حصل معاه من باقي السواقين ..
أنا نفسي باقر يخرج واخبيه من ثاني بس في البيت .. باقر تعب ومحتاج شوية سلام وأمان .. بعيد عن
أي ألم أو حزن أو ووجع قلب ..
#الحرية_لباقر

<https://bit.ly/3ub9GfR>

عن حسين محمد ابراهيم الغرابي

عملو فيك اي ينور عيني عشان تقول كدا!

عملو فيك اي ي كل دنيتي عشان تقول كدا!

هددوك بينا ياريتهم كانوا موتونا ولا ان قلبي يتكسر ب بعدك و ظلمك كدا عملو فيك اي يحبيبي!

الله يقهر قلبكم زي ما قهرتو قلبي و يوجعكم ع احبابكم زي ما وجعتو قلبي ع اغلي حبايي الله يعزبكم
ف الدنيا و الآخره يارب.

#الشاهد_برئ_انقذو_الشاهد

#وديتو_الشاهد_فين_اهله_بتدور_عليه

<https://bit.ly/3ONLE2o>

رابطة أسر معتقلي العقرب

علمت رابطة أهالي معتقلي #سجن_العقرب أن إجراءات نقل المحبوسين بسجن شديد الحراسة 1
دخلت حيز التنفيذ، وبالفعل تم نقل قرابة نصف المحبوسين لسجن بدر ..
نأمل أن تكون هذه الخطوة بداية لصفحة جديدة في التعامل مع المحبوسين وأن يتمتعوا بكافة
حقوقهم الإنسانية التي كفلها لها القانون والتي حُرِّموا منها خلال السنوات الماضية وعلى رأسها الزيارة

<https://bit.ly/3R0ABox>

عن علاء عبد الفتاح

ملف كامل عن علاء عبد الفتاح وإضرابه المستمر عن الطعام (دون اعتراف به من إدارة السجن) منذ

يوم 2 أبريل 2022

يمكنكم قراءة الملف [هنا](#)